

萬有文庫

第一集一千種

王雲五主編

涵芬樓古今文鈔簡編

(十二)

吳曾祺編

商務印書館發行

卷

萬有文庫

第一集一千種



商務印書館發行

涵芬樓古今文鈔簡編

(十二)

吳曾祺編



國學基本叢書



78
18
V.2

涵芬樓古今文鈔簡編第二十冊目錄

卷三十九

辭賦類

賦上三

平蜀賦 潘耒

平滇賦 潘耒

孤山伯夷廟賦 胡天游

和感二鳥賦 胡天游

擣素賦 班婕妤

東征賦 曹昭


鍼縷賦 曹昭

賦下

太阿如秋水賦 賈鍊

姮娥奔月賦 蔣防

延陵季子掛劍賦 王起



國家圖書館



001671904

101012432

一〇

一〇

三

一

一〇

息夫人不言賦 白敏中 一〇

漢武帝重見李夫人賦 康僚 一二

沛父老留漢高祖賦 王 檠 一三

江南春賦 王 檠 一三

漁父辭劍賦 宋 言 一四

數雞鳴度關賦 宋 言 一五

送君南浦賦 黃 滔 一六

漢宮人誦洞簫賦 黃 滔 一六

郭子儀單騎見虜賦 秦 觀 一七

辭

秋風辭 漢武帝 一八

歸去來辭 陶 潛 一八

和歸去來兮辭 蘇 軾 一九

騷

離騷 屈 平 二〇

九章 屈 平 二四

遠游 屈平 三一

九辯 宋玉 三三

惜誓 賈誼 三六

招隱士 劉安 三七

反離騷 揚雄 三七

釋疾文 盧照鄰 三八

操

醉翁操 蘇軾 四五

七

七發 枚乘 四五

七啓 曹子建 四九


七命 張協 五三

連珠

連珠二首 揚雄 五七

擬連珠五首 班固 五八

演連珠五十首 陸機 五八



偈

藤偈 李 邕 六三

附錄

九惟文 蔡 邕 六三

五悲文 盧照鄰 六三

逐疔鬼文 孫 樵 六九

卷四十

哀祭類

告天文

漢昭帝祝天辭 七〇

漢昭帝祭地辭 七〇

漢光武即位祭天地文 七〇

告廟文

漢元帝禱高祖孝文孝武廟文 匡 衡 七一

漢元帝告謝毀廟文 匡 衡 七一

玉牒文



唐高宗泰山玉牒文……………七二

祭文上

祭古冢文 謝惠連……………七三

祭屈原文 顏延之……………七三

祭田橫墓文 韓愈……………七四

祭鱷魚文 韓愈……………七四

祭文下

自祭文 陶潛……………七五

祭從弟敬遠文 陶潛……………七六

祭顏光祿文 王僧達……………七六

祭柳子厚文 韓愈……………七七

祭女孥子文 韓愈……………七七

祭十二郎文 韓愈……………七八

祭尹師魯文 歐陽修……………八〇

祭石曼卿文 歐陽修……………八〇

祭梅聖俞文 歐陽修……………八一

祭歐陽少師文 曾鞏 八一

祭歐陽文忠公文 蘇軾 八二

穎州祭歐陽文忠公文 蘇軾 八二

祭范忠宣公文 陳瓘 八三

祭陳同父文 辛棄疾 八四

祭望谿先生文 劉大櫟 八五

祭妹文 袁枚 八六

祭劉海峯先生文 姚鼐 八七

祭朱竹君學士文 姚鼐 八八

祭湯海秋文 曾國藩 八八

祭胡文忠公文 左宗棠 八九

祭夫徐悱文 劉令嫻 九〇

諭祭文

諭祭贈資政大夫南京禮部尚書裴爵并配贈夫人楊氏封太夫人鄒氏文 歸有光 九一

哀詞

仲雍哀辭 曹植 九一

金瓠哀辭 曹植……………九二

行女哀辭 曹植……………九二

哀永逝文 潘岳……………九二

金鹿哀辭 潘岳……………九三

歐陽生哀辭 韓愈……………九三

獨孤申叔哀辭 韓愈……………九四

蘇明允哀詞 曾鞏……………九四

蔣季高哀辭 宋濂……………九六

余通判哀辭 李東陽……………九七

鍾廣漢哀詞 汪琬……………九八

宣左人哀詞 方苞……………九九

武季子哀詞 方苞……………九九

母弟溫甫哀詞 曾國藩……………一〇〇

弔文

弔屈原文 賈誼……………一〇二

弔魏武帝文 陸機……………一〇三

弔屈原文 柳宗元 一〇五

弔國殤文 李綱 一〇六

誄

元后誄 揚雄 一〇七

王仲宣誄 曹植 一〇九

楊荊州誄 潘岳 一一〇

楊仲武誄 潘岳 一一一

夏侯常侍誄 潘岳 一一二

馬泝督誄 潘岳 一一四

陽給事誄 顏延之 一一六

陶徵士誄 顏延之 一一七

宋孝武宣貴妃誄 謝莊 一一八

司馬相如誄 卓文君 一一九

騷

九歌 屈平 一二〇

招魂 宋玉 一二三

大招景差……………一二五

祈禱文

祭江祈晴文張說……………一二七

福州鱔溪禱雨文曾鞏……………一二七

謝文

諸廟謝雨文曾鞏……………一二八

祝文

止雨祝董仲舒……………一二八

祝皋亭神文白居易……………一二八

生擒西蕃鬼章奏告永裕陵祝文蘇軾……………一二九

祝香文

大禮畢車駕詣景靈宮恭謝祝香文周必大……………一二九

孟春車駕詣景靈宮朝獻祝香文周必大……………一三〇

上梁文

英德殿上梁文王安石……………一三〇

外家別業上梁文元好問……………一三一

釋菜文

己卯春釋菜先聖文 劉因 一三二一

歎道文

慶陽節玉晨觀歎道文 封敖 一三二一

憲宗忌日玉晨觀歎道文 封敖 一三二二

齋文

為相國隴西公黃錄齋文 李商隱 一三三二

為馬懿公郡夫人王氏黃錄齋文 李商隱 一三三三

十會齋文 司空圖 一三三五

迎修十會齋文 司空圖 一三三六

願文

遼陽山寺願文 盧思道 一三三六

醮辭

晉公后土醮辭 杜光庭 一三三七

晉公北帝醮詞 杜光庭 一三三八

冠辭

漢昭帝冠詞……………一三八

晉太子冠祝文……………一三八

鄭挺冠字祝辭 戴良……………一三八

祝嘏辭

漢獻帝宗廟祝嘏辭 蔡邕……………一三九

賽文

賽蔣山廟文 沈約……………一四〇

禱雨賽蔣山文 陸倕……………一四〇

密詞

東太一宮開啓保夏祝聖壽金籙道場密詞 歐陽修……………一四〇

西太一宮續催生道場密詞 歐陽修……………一四一

贊饗文

史記郊拜太一贊饗文 司馬遷……………一四一

史記拜祝祠太一贊饗文 司馬遷……………一四一

告文

告伯父殯文 劉敞……………一四一

盟辭

漳河盟辭 袁紹 一四二

盟新羅百濟文 劉仁軌 一四二

誓文

為會稽內史稱疾去郡於父墓前自誓文 王羲之 一四三

為建安王誓衆詞 陳子昂 一四三

青詞

下元金籙道場青詞 張元晏 一四四

河南府平陽洞河陽濟瀆北海水府投送龍簡青詞 歐陽修 一四四

附錄

漢交趾都尉胡夫人黃氏神誥 蔡邕 一四五

訟風伯 韓愈 一四六

觀音懺文 司空圖 一四六

瘞旅文 王守仁 一四七

涵芬樓古今文鈔簡編

卷三十九

辭賦類

賦上三

平蜀賦 潘耒

皇帝御宇十有八年冬。命奮威將軍臣進寶。勇略將軍臣良棟。率師討蜀寇。密授方略。分道進攻。十九年正月癸卯。進寶克保寧。僞將軍王屏藩窮蹙自盡。擒吳之茂以下二十餘人。前三日庚子。良棟自龍安進克成都。僞巡撫張文德降。蜀地大定。丁巳。露布至京。宣捷午門外。在廷之臣咸以皇上廟算恢闕。坐見萬里激厲將士。建茲奇勳。相與踴躍唱歎。形之聲詩。臣遭遇殊恩。載筆史館。頌揚成功。職不敢闕。謹獻賦曰。溯皇王於前烈。偉撻伐之鴻謨。奸無鉅而弗剪。兇無遠而弗鋤。霆發聲於豐隆。星耀芒於威弧。鯨吞舟而就斲。蛇搏象而見屠。法春生與秋殺。有霜落而露濡。必武功之遐暢。乃文教之誕敷。惟我皇之聖仁。廓天地以爲量。王道履以平平。天門開其蕩蕩。彼么麼之小醜。敢盜兵而衡抗。類射天以彎弓。似逐日而投杖。蛙處井以陸梁。螳當車而倔強。衣嵐箐以爲巢。憑崖谷以作障。巖巖梁益。實號金城。國闢蠶叢。山開五丁。劍閣梯空以懸度。棧道循絙而上征。天井盤旋而窈黑。地網綿絡而縱橫。水以虎牙赤甲爲咽喉。陸以龍門鹿頭爲門戶。挺一戈以當關。非萬騎之能取。遭天光之分耀。有草竊以偷處。曾六合之一家。敢走險以

旅拒雄虺九首。苞蘖三芽。傳烽巴閬。築壘褒斜。驚百城於風鶴。變一軍爲蟲沙。初屯蜂而聚蟻。旋鬪鼠而
 戰蝸。思明殪於河陽。少誠殲於淮表。彼逆孽之遊魂。若枯莖之待掃。何醜類之睚眦。尙橫距而肆爪。倚障
 嶺之千重。謂天險其可保。皇赫斯怒。整我六師。招搖爲戈。參伐爲旗。審制勝之在將。料奪險之用奇。拔虎
 臣於行間。建高牙而授之。曰汝進寶。貔貅如雲。東趨閬中。毀其重門。曰汝良棟。突騎風雨。西走陰平。抉其
 後戶。分道交攻。奇正相權。或掎或角。動於九天。惟東軍之驍騰。凌七盤而徑度。奪朝天之巖險。葭萌空而
 不戍。分勁旅爲三行。令異道而同赴。摧堅陣於背城。斬突豨而餘怒。積甲齊乎錦屏。投鞭斷乎江路。迨禁
 旅之薄城。斬門關而齊驚。兇渠焚於窮猿。逆黨禽於脫兔。蓋纍纍籍籍。鈐甲面縛者。不知其數。西師卷旆
 以橫邁。據密樹之重關。出間道以擣虛。儼氈裹而林攀。爭白水之阨塞。破鐵門之孱顏。忽浮馬而渡江。張
 赤幟於菁山。朝耀兵乎江油。夕嚴陣乎緜竹。訝天兵之飛來。俄攻心而潰腹。開錦城之峨峨。豎降幡之一
 幅。收奇功於浹辰。若風雷之迅速。捷書並奏。飛檄交馳。鋒不再淬。矢不再披。剋勁寇若振槁。舉名都如拾
 遺。天子乃升紫宸之殿。讀露布於彤墀。千官集乎闕下。望天顏之怡怡。莫不鼓舞讚頌。曰盛哉乎武功。振
 古未覩茲也。惟此劍南。代有反側。塹山燒棧。便同絕域。若漢室之討公孫。晉氏之斬李特。宋主之擒譙縱。
 唐宗之誅劉闢。皆用堅攻。瑕以順討。逆風行電掃。罪人斯得。然猶水陸夾攻。首尾並擊。傷損將士。窮竭兵
 力。彌歲淹時。僅而後克。未有不頓一兵。不折一戟。駭若霹靂。旬月之間。廓清西極。如今日者也。
 天子將將。大將將兵。旣得龍驤。復有營平。師以和而後克。功惟斷而乃成。規萬里若指掌。故無戰而有征。
 夫蜀國者。滇黔之維首也。蜀平則破竹無前。建瓴直走。蒙詔亡魂。貴筑不守。將遂定邛夔。略犍爲。兼冉駹。

收沈黎。簡巴渝之勁卒。與彭濮之銳師。浮舟牂牁。飲馬瀘溪。峨眉爲鐔。點蒼作鏑。置罽葉榆。圍掩蒙樂。伐銅鼓之碎訇。驅金馬之騰越。血鑿齒以釁鋒。膏猱猱以染鏃。然後前歌後舞。班師而還。受成廟社。薦功皇天。包干戈以虎皮。却走馬以糞田。沛曠蕩之恩。下復除之詔。與萬姓相勞苦。哀疲氓之無告。撫摩癩瘡。長養凋耗。勸耕課桑。興廉舉孝。蒸斯人於太和。羣詠仁而蹈道。基隆平於萬年。襲三五之休號。豈不盛哉。遂作頌曰。天錫智勇。爲君王兮。神武不殺。誅猖狂兮。連籌決策。自廟堂兮。任屬賢將。齊鷹揚兮。天戈一揮。除機槍兮。遂清大憝。克鬼方兮。長御遠駕。包八荒兮。刊山表柱。垂無疆兮。

平滇賦 潘耒

粵稽皇王。數典考墳。紹業承統。守文之君。或英明而沈毅。或恭儉而寬仁。休風駿烈。厥亦有聞。若夫彌綸造化。整頓區宇。經世以文。戡亂以武。除凶殘若風霆。沛德澤如膏雨。巍乎遼哉。首出之聖。書契以來。曾不數覩。惟國家誕膺休命。列聖重光。宅中圖大。臨馭萬方。皇上克聖。亶聰嗣。纘曆服。阜成兆民。平章百族。威暢德敷。義涵仁育。煦之以春陽。潤之以靈霏。方銷兵以鑄鋤。希還醇而反樸。屬者五緯遺氛。三辰餘沴。國丁小厄。天亡醜類。乃有三藩之事。以勤我聖帝。惟三藩者。滇南爲魁。次廣與閩。一苞三蘖。駢幹連根。實先朝之宿將。亦勝國之逋臣。諒豺聲而鷹眼。非羈紲之能訓。先皇帝大度軼乎漢高。深仁邁乎宋祖。念其搏擊之勞。畀以帷蓋之所。高牙大纛。作藩南土。蓋將以威蠻制獠。壯干城而扞疆圉。何圖爵極而亢。寵過斯驕。擅士馬之雄富。與土地之殷饒。殺生操於幕府。除拜擬於天朝。聚宵小爲淵藪。流金錢如波潮。無懸懸而不潰。有厝火其必燒。皇上明燭未形。智周無象。金鏡在懸。太阿在掌。與其滋蔓而難圖。不若消萌於方

長。與其後事而芟鋤。無寧先時而滌蕩。爾乃發睿策。啓神謨。因乞休之陳請。下撤還之詔書。俾移屯於遼海。卽樂土而安居。將保全乎勳舊。匪弓藏之可虞。蠢爾滇渠。敢行倡逆。忘奕葉之寵榮。背累朝之恩澤。矜百戰之餘勇。謂人寰其無敵。規豕突與鯨奔。遂白頭而作賊。裂眦一呼。其從如雲。韜弓毒弩。十萬爲羣。旣席卷夫湘江。復虎踞乎夔門。將北向而爭利。勢滔天與燎原。閩廣之兇。以次干紀。毒虺雌雄。長蛇首尾。其餘反者。蝟毛而起。西綿隴坻。東絡海澨。郟延之郊。荆襄之鄙。震聳者三方。驛騷者萬里。甚漢室之凜雄。同唐家之安史。彼敦峻與景全。何兇鋒之能擬。惟皇神武。不震不驚。恭行天罰。赫赫明明。發雲臺之鎧杖。整岐陽之旆旌。丈人長子。維城磐石之宗。以爲將帥。中黃虎賁。射聲。伏飛之士。列乎屯營。於是親畫成規。密授方略。旣攻心而伐謀。亦擣虛而批郤。堂堂聲罪之辭。峨峨賞功之爵。踞鞍而猛士色飛。騰檄而兇徒膽落。天子之兵。無戰。帝王之師。萬全。不逐一壁之利。不陷一城之堅。其守也靜於九地。其攻也動於九天。是使劇賊挫鋒。梟雄失氣。矢如雨而不得射。戟如林而不得刺。鼙騰躍而技窮。虎咆哮而力弊。賊衆有魚爛之形。官軍成破竹之勢。遂乃平乘巴陵。橫掩洞庭。澧浦之舩。惶失水。衡峯之草木。皆兵。逆臣賊子。亡魂喪精。血未膏於王斧。身已殛乎天刑。亦越閩關。天兵飛度。士女謳歌。壺漿塞路。叛臣面縛而來歸。逋寇倉皇而失據。蜃咽氣而消亡。鯨跳波而僵仆。彼粵孽之兇狡。信梟獍其何殊。幽厥父以稱亂。牙擇肉而恣睢。天戈臨而糜爛。何螳臂之當車。嗟革面其已晚。有延頸而就誅。若乃狐鳴鷓嘯之羣。鹿鋌狼奔之隊。尤來大槍之盜魁。延岑彭寵之叛帥。首鼠前却。乍叛乍臣者。以千百輩。莫不脫距摧牙。沙崩瓦壞。枯尸疏屬之山。傳首桃林之塞。於是陰平夜走。劍閣朝通。索橋度馬。藤峽懸弓。黔蜀之地。悉定。水陸之師。會攻。徑盤江而

擣脅。蹂蒼山而抉胸。高壘馮城。長圍四築。不頓一弦。不亡一鏃。嗟劉稹之駭癡。與元濟之窮蹙。曾飛走其無路。空椎心而慟哭。竟駢首以入函。無遺種於兇族。於是八方奠定。六合無塵。梯航窮乎日窟。鞮譯盡乎天垠。邊陲無鈴柝之警。函夏皆耕桑之民。囊弓脫劍。一軌同文。原夫三藩之設。歷紀於茲。尾大不掉。實繁披枝。國勢爲之衡決。民生爲之瘡痍。而今而後。快然毒去。霍然病衰。煙消霧剝。天清日輝。非大聖人之威德。何以及斯。惟幾也爲能周天下之慮。惟斷也爲能成天下之務。撤藩之議。偉矣。狃於苟安。搖於浮言。則莫能以果決。難作而張皇。釁成而姑息。則莫能以速滅。藩鎮之禍。未有所底也。皇上以一人之智勇。爲海內除大殘。以八年之憂勤。爲萬世貽永安。雖唐帝之戰丹水。軒皇之克阪泉。夏后格有苗於兩階。殷宗伐鬼方於三年。絜功比德。未知其後先。猶且謝鴻名而不居。推大美而不有。彌謙沖以兢惕。期保泰於永久。肅乎敬器之或傾。凜乎馬索之將朽。哀烝人之疲勞。念三星之在罍。遂乃發德音。沛恩綸。捐逋賦。予貧民。赦獄囚。廣大仁。優卹將士。大賚臣鄰。罷一切權宜之制。與天下爲更新。大圭禮天。特牲祭廟。望祀山川。潔將。標燎。極尊養於兩宮。增推崇之顯號。馳展省於園陵。薦成功以昭告。然後申明象魏。釐飭官常。百度具舉。四維高張。天人協應。儲休降祥。甘露零庭。朱草豐唐。奏韶濩之樂舞。襲山龍之文章。故道與天地同流。而德與黃農齊光也。日出作兮日入息。道平平兮無反側。旋乾坤兮帝之則。賡卿雲兮臣之職。歌九功兮頌七德。播永永兮長無極。

孤山伯夷廟賦 胡天游

伊予懷此姱節兮。少耿介而自存。顧汶汶以競湑兮。思屏子而離人。去故鄉以遠征兮。將謀食焉自惠。悼

始秉之若反兮。中快悒而未伸。驅我馬以北首兮。夕稅駕乎孤之山。披清風於先生兮。溯纍餓之黔顏。喟不可或緘兮。激永悵而悲歎。衆謂予何求兮。非羣陋之所明。假回飈以陳詞兮。情鬱鬱其若顛。嗟夫子之貞潔兮。固太上之所賓。非聖賢而莫可與處兮。夫安知乎殷周之君。怨造物之不仁兮。竊獨哀此下民。胡不俾虞夏而永世兮。令頑懦之皆敦。宇宙忽已非兮。致以暴易暴之紛紜。誠不忍約己而獨清兮。冀芸芸之歸醇。相泯泯終不可湔兮。慘踽踽而誰親。念堯禹之久陟兮。其固可以無生。奚不幸而遭此彫世兮。曾不得神農而爲鄰。斯世莫適居兮。欲舉辟而焉遵。吾將駕而升天兮。誰爲御此飛龍。卽帝所恐亦雜喧兮。盛豹虎之唁唁。固不能被髮而文身兮。狎蠻夷於江之南。寄委虵於共首兮。蓋庶幾乎堯舜之舊風。託彭咸以訴帝兮。何迤迴而不救於下。帝若怒而反見尤兮。羌獨抱此愁苦。海濱兮歸來。逝千年兮飄塵埃。舊處兮安識。波潮兮魚龍哀。去夫子適遠兮。時俗逾敝而不可論。昧柳下之廉隅兮。以骺骹而爲仁。衆垢黨而易分兮。襲幽夜之纒昏。鮑則貴而咸芳兮。變牛矢兮荃蓀。盜跖固以爲聖兮。唯鄉人之德馨。苟光白而宜怪鋤兮。非巧善其孰完。魯蹈海而爲義兮。攫衆眦之所頑。申抱石而成哈兮。或猶憎其勿先。信可謂之詹詹兮。雖天戕以曰欣。獨登山而悲吟兮。將鬼神以未延。吾又安知其終兮。痛鳩臆而疑填。幸夫子之不及此兮。夫寧飽周粟以自安。夕霏霏而合宇。天莽莽兮垂寒。凌濤涌兮摻松。修隴漫兮淒泉。鳥烏噤而不鳴兮。叢狼狸之號盤。捋澗芼而不敢享兮。恐謂此其非蠲。羌眷眷而旁皇兮。誠不釋夫所怨。亂曰。肅肅凜秋。歲徂窮兮。合沓驚沙。振衝風兮。率彼曠野。安適從兮。徘徊沾臆。道何孤兮。我思古人。如黃虞兮。煩憂惻傷。不可殊兮。時則戾兮。世而殆兮。歸哉歸哉。信子非隘兮。

和感二鳥賦 胡天游

吾安悲乎。悲軋軋而曾抽。寧扼顛以自嗟。佇擊涕而中仇。瞻行道之茫茫。聿交蒨而云穢。隕霜雪之繁傷。愴靡陽以謝煒。顧奔流之滔滔。橫淪墊而方圯。衆哈忤以安懷。誠飲食其未理。竊不諒夫艱難。固又莫可以衆謂。志遑遑曰有屬。非得位其焉如。叩君門以天峻。儻不悅乎陳書。噫吹笙而被繡。或造第而椎車。苟詭得其若易。懼予枹之良虛。獨俛俛以遵路。適投笑於嬰患。思屈曲而相繆。情纏纏以爭絞。感微物之何知。觀光榮於二鳥。顧竊被夫寵佳。彼奚功而茲寶。歎時數之未來。卽聖賢其安道。呂曉發於蓍龜。乃唯師而輟釣。說違夢乎高宗。亦赭築以終老。遂卷懷而歸鶩。羌忽忽於予心。企蹭蹬之去昨。翻濩落以滋今。寧屯理之尙駁。詎於皇之匪仁。萃殷憂以孔迫。顧何疚於予身。昔三后之相承。託優游於聖庇。孔乃息乎周行。軻無勤於辨說。惟曩遇之云乖。實旁皇而私冀。幸帝命其未湮。俾相予於終致。旣贊尹而和錢。與昌饗以旦嚼。就久約其庸傷。庶逍遙以卒歲。苟眎道而良睽。憫戚蹠於已瘁。病折閱以莫羸。祇皇皇以求利。中得失焉自患。斯倍辱而尤鄙。幸鞶帶其旣膺。夫何辨乎此類。

擣素賦 班婕妤

測平分以知歲。酌玉衡之初臨。見禽華以庶色。聽霜鶴之傳音。佇風軒而結睇。對愁雲之浮沉。雖松梧之貞脆。豈榮彫其異心。若乃廣儲懸月。暉水流清。桂露朝滿。涼衿夕輕。燕姜含蘭而未吐。趙女抽簧而絕聲。改容飾而相命。卷霜帛而下庭。曳羅裙之綺靡。振珠珮之精明。若乃盼睐生姿。動容多製。弱態含羞。妖風靡麗。皎若明魄之升崖。煥若荷華之昭晰。調鉛無以玉其貌。凝朱不能異其脣。勝雲霞之邇日。似桃李之

向春。紅黛相媚。綺組流光。笑笑移妍。步步生芳。面靨如點。雙眉如張。頰肌柔液。音性閑良。於是投香杵。扣
致砧。擇鸞聲。爭鳳音。梧因虛而調遠。柱由貞而響沉。散繁輕而浮捷。節疎亮而清深。含笙摠筑。比玉兼金。
不墮不簾。匪瑟匪琴。或旅環而紆鬱。或相參而不雜。或將往而中還。或已離而復合。翔鴻爲之徘徊。落英
爲之颯沓。調非常律。聲無定本。任落手之參差。從風飄之遠近。或連躍而更投。或暫舒而長卷。清寡鸞之
命羣。哀離鶴之歸晚。當是時也。鍾期改聽。伯牙弛琴。桑間絕響。濮上傳音。蕭史編管以擬吹。周王調笙以
象吟。若乃窈窕姝妙之年。幽閑貞專之性。符皎日之心。甘首疾之病。歌采綠之章。發東山之詠。望明月而
撫心。對秋風而掩鏡。閱絞練之初成。擇玄黃之妙匹。準華裁於昔時。疑形異於今日。想驕奢之或至。許椒
蘭之多術。動陋製之無韻。慮蛾眉之爲愧。懷百憂之盈抱。空千里兮飲淚。侈長袖於妍袂。綴半月於蘭襟。
表纖手於微縫。庶見跡而知心。訖訟路之遐負。怨芳菲之易泄。書旣封而重題。筥已緘而更結。慚行客而
無言。還空房而掩咽。

東征賦 曹 昭

惟永初之有七兮。余隨子乎東征。時孟春之吉日兮。撰良辰而將行。乃舉趾而升輿兮。夕予宿乎偃師。遂
去故而就新兮。志愴悵而懷悲。明發曙而不寐兮。心遲遲而有違。酌罇酒以弛念兮。喟抑情而自非。諒不
登櫟而極蠡兮。得不陳力而相追。且從衆而就列兮。聽天命之所歸。遵通衢之大道兮。求捷徑欲從誰。乃
遂往而徂逝兮。聊游目而遨魂。歷七邑而觀覽兮。遭鞏縣之多艱。望河洛之交流兮。看成臯之旋門。旣免
脫於峻嶮兮。歷滎陽而過卷。食原武之息足。宿陽武之桑閒。涉封丘而踐路兮。慕京師而竊歎。小人性之

懷土兮。自書傳而有焉。遂進道而少前兮。得平丘之北邊。入匡郭而追遠兮。念夫子之厄勤。彼衰亂之無道兮。乃困畏乎聖人。悵容與而久駐兮。忘日夕而將昏。到長垣之境界。察農野之居民。睹蒲城之丘墟兮。生荆棘之榛榛。惕覺寤而顧問兮。想子路之威神。衛人嘉其勇義兮。訖於今而稱云。蘧氏在城之東南兮。民亦尙其丘墳。唯令德爲不朽兮。身旣沒而名存。惟經典之所美兮。貴道德與仁賢。吳札稱多君子兮。其言信而有徵。後衰微而遭患兮。遂陵遲而不興。知性命之在天。由力行而近仁。勉仰高而蹈景兮。盡忠恕而與人好。正直而不回兮。精神通於明神。庶靈祇之鑒照兮。祐貞良而輔信。亂曰。君子之思。必成文兮。盍各言志。慕古人兮。先君行止。則有作兮。雖其不敏。敢不法兮。貴賤貧富。不可求兮。正身履道。以俟時兮。脩短之運。愚智同兮。靖恭委命。唯吉凶兮。敬慎無怠。思謙約兮。清靜少欲。師公綽兮。

鍼縷賦 曹 昭

鎔秋金之剛精。形微妙而直端。性通遠而漸進。博庶物而一貫。惟鍼縷之列迹。信廣博而無原。退透迤以補過。似素絲之羔羊。何斗筭之足算。咸勒石而升堂。

辭賦類

賦下

太阿如秋水賦 以如彼秋水容色爲韻 賈 鍊

黯然若秋水者。楚王有太阿之鋒。窮其原則三尺成狀。窺其底如百尺無蹤。可以照魑魅。鑿形容。涵空而表裏泓澄。詎私毫髮。騰氣而風雲慘澹。如隱蛟龍。原其極良冶之功。出洪鑪之裏。薛燭增駭。風胡矚視。子

里萬里之斜漢。耿耿方俾。八月九月之洞庭。沈沈相似。深淺難測。精光不死。磨越砥疑。穿石之泉。涿葛溪。如貫河之水。氣晶熒而不息。質瑩澈而難比。流影耀金精之上。涯涘皆空。涼颯鳴玉匣之中。波濤不起。韜映無匿。埃塵不居。澄曉峽。黯清渠。俯視則孤光溢目。橫窺而一帶澄虛。旁臨挾刃之徒。疑開別派。近映腰金之士。似躍游魚。比練之流。奚匹容舟之所寧。如其文也。流而無極。其清也掬之不得。短長如任器之狀。蕩漾有盈科之則。似無雲之溪澗。徑挺其形。如落木之江湖。深沈其色。龍泉非偶。巨闕難儔。蓮影如植。龜文若遊。星綴明珠。孰辨懷珠之浦。環分圓月。終疑映月之流。泊乎霜露冷。天地秋。絲是勦勦敵。決冤讐。故得名溢古今。聲流遠邇。解晉鄭於紛若。掃欃槍於疇彼。予一智刃於胸中。其精如此。

姮娥奔月賦 以一升天中永棄塵俗爲韻 蔣防

昔姮娥服仙藥於俄頃。指陰靈以馳騁。嗟人世之如流。覺天衢之何永。於是竦身騫翥。霽月凝冷。振環鏘珮。雜珠露之珊珊。雲帔花冠。渡銀河之耿耿。伊立志之有恆。果躡景而可憑。出乎寥廓。愛此清澄。企予望之。想蟾蜍之下視。進吾往也。軼埃壒而上升。且夫碧虛望而自致。清質瞻而不墜。天迥而音塵已沒。風落而芳馨微至。往而不返。誰謂與子偕行。仰之彌高。孰云不我遐棄。窈窕輕舉。圓明映空。遺九族於脫屣。冀孤輪之處躬。獨往孤高。若集瑤池之上。潛來煙霧。如分紈扇之中。迷晶皎。亂瞳融。神明合。柔德通。想泛金波。詎假琴高之鯉。將搖桂魄。寧因禦寇之風。冥冥睟容。規規皓質。乘飛廉兮竦踴。迫望舒兮寥慄。初疑妝以臨鏡。形影猶分。終類冰之在壺。輝華相失。故得享年代之悠久。與乾坤而齊一。明明配日。高高在天。對陽烏之升降。伴顧兔之昭宣。滿時而玉貌和光。難分皓皓。虧處而娥眉共麗。不辨娟娟。炯若通輝。超然絕

俗想明眸而下鑒。并玉鉤而傍燭。閨中結恨。感予於三五之時。笛裏傳情。聽我於關山之曲。豈伊異人。學道全真。湘波之妃。洛浦之神。曾不足繼其芳塵。

延陵季子掛劍賦 以冥會心許暗無我欺爲韻 王一起

循修隴樹兮。掛劍於茲。所以表徐君之所欲。明季子之不欺。予取予求。昔藏心而可測。一生一死。終棄寶而如遺。蓋烈士孤標之節。而神明幽感之時。當其昔結歡娛。從容不阻。孤鋒乍拔。密坐之所。彼眷眷於目擊。此默默而心許。諒他日而來思。非伊人而誰與。及夫歷聘上國。言旋東吳。訪舊友。遵舊途。亦當開寶匣。獻鹿盧。何閔水兮不待。弔荒塋兮已蕪。由是執龍泉而慷慨。望馬鬣而踟躇。想間歲之披雲。忽然而在。撫今辰之切玉。視之若無。且曰器可謀新。室寧欺暗。解腰間之善結。仰樹杪而延瞰。乃脫白刃。推赤心。耀宿草之煌煌。懸拱木之森森。錯落金環。疑夜月而生隴。晶瑩霜鏢。謂春冰之在林。龍形蜿蜿而未化。蛟枝亭亭而欲尋。解佩義廣。脫驂感深。英聲遂騰於萬國。善價不顧其千金。嗚呼。劍之擲也。無前人之行也。必果誠去彼而取此。非祈君之祐我。無宿諾匹之以庸庸。不食言方之以瓌瓌。向若蔑元壤。恡青萍。重提攜於掌握。輕耿介於心靈。則三尺之中。空騰雲而漫漫。重泉之下。將愧色於冥冥。無言者道之宏。不約者信之大。峻節卓以特立。義風紛而繁會。盛矣哉。掛劍之名。將萬古而不昧。

息夫人不言賦 以此人不言其志安在爲韻 白敏中

有一人兮甚美。事二夫兮深恥。不咄咄以怨人。常默默而傷己。何窈窕兮若彼。而寂寞兮如此。舌雖在而口不言。身未亡而心已死。殆其喪主失身。去故從新。初爲息侯之婦。今爲楚國之嬪。標二八之佳麗。冠三

千之等倫。豈君恩之不至。顧我恨之有因。觸類無言。似峽口爲雲之女。含情不語。如山頭化石之人。守而不改。邈矣而心有所在。行之實難。確乎而性有所安。指逝波於舊寵。比浮雲於新歡。得不佇蕙思於心曲。秘玉聲於舌端。於是語笑已而得意。莫其處喧嘩而不亂。挺節操以自持。翠羽常低。多值斂眉之日。瓠犀難見。少逢啓齒之時。然則動宜三省。情順九思。似慎樞機。暗合吉人之象。類含鋒刃。潛符靜女之詩。嗟夫。秦家之女兮。在德何有。賈氏之妻兮。其言亦苟。誰令喋喋。駐五馬而誚使君之愚。焉用嘻嘻。獲一雉而忘大夫之醜。彼則爾。此則否。外結舌而內結腸。先箝心而後箝口。旣而載離生育。幾變寒暄。想靡蕪之不見。厭芣苢之空繁。勢異絲蘿。徒新婚而非偶。華如桃李。雖結子而無言。及夫雲夢春遊。章華夜侍。永忘一顧之念。難奪三緘之志。起居有節。惟聞珮玉之聲。應對無時。不吐如蘭之氣。君王於是崇其意。重其義。命女史以書之。爲楚宮之故事。

漢武帝重見李夫人賦

以神仙異術變化通靈爲韻

康 僚

漢武帝諸宮。此夫人兮。恩意難同。悲豔質以長逝。恨深情之莫通。夢想徒勞。寧及九泉之下。神仙有術。能生一夕之中。帝乃暫釋幽懷。將觀異變。儼宸儀於玉座。張翠幄於蘭殿。清風拂戶。疑彷彿以徐來。皎月臨軒。尙朦朧而未見。且其駐視潛聽。虔思效靈。燎金鑪之馥馥。燦銀燭以熒熒。寂寞而求。警爾而風生綺席。從容以俟。俄然而影在花屏。於時漸出形儀。暗聞珠翠。初半面以呈姿。忽全身而表異。盈盈不笑。如羞久別之容。眷眷無言。莫問平生之事。是則嬋娟可翫。隱映難親。不有如有。非真似真。旣揚翹而掩袂。亦流盼以疑神。翡翠簾前。悵望三千之女。芙蓉帳裏。分明二八之人。况乎麗服逾春。美顏多暇。揚襜如之羅綺。飄

藹若之蘭麝。非因不死之藥。豈便長生。何用返魂之香。自從神化。及夫弄花態。以遺妍。望君王。今不前。復認吹簫之侶。終疑獻果之仙。目盼盼。以徒極。心搖搖。而詎傳。迷甚化宮。周穆之遊。固爾。地非巫峽。楚襄之夢。應然。已而頓解前思。詳窺舊質。爰將託方士。展神術。謂傾城之且驗。豈同輦之無日。殊不知事本憑虛。功難責實。夜如何。其夜已闌。悵飄然而復失。

沛父老留漢高祖賦 以願止前驅得申深意爲韻 王 棨

漢祖還鄉兮。鑾駕將還。沛中父老兮。留戀潛然。憶故舊於干戈之後。敍綢繆於旌旆之前。白髮多傷。鳳輦願停於此日。翠華一去。皇恩再返於何年。昔以羣盜并興。我皇斯起。英明天授其昌運。神武日聞於舊里。今則秦楚勢傾。鼓鼙聲止。聖代而陽和煦物。元首明哉。暮年而蒲柳傷秋。老夫耄矣。然而黃屋才降。丹誠未申。豈可風馳天仗。雷動車輪。一則以情深閭里。一則以義重君臣。隆準龍顏。昔是故鄉之子。捧觴獻壽。今爲率土之人。乃曰。陛下創業定傾。順天立極。臣等犬馬難效。星霜屢逼。窺泗水則淒若舊風。指芒碭則依然故邑。眷戀難盡。汎瀾易得。昔日望雲之瑞。豈有明言。當時貰酒之家。堪驚默識。帝乃駐天步。遂入心。戈矛山立。貔虎煙深。草澤初興。雲露而蛟龍奮翼。鄉園重到。煙空而鸞鶴歸林。時也親友咸臻。少年并至。縱兆民如子。恩更洽於故人。雖四海爲家。情頗深於舊意。往事如覩。流光若驅。望幸誠異。攀轅則殊。交遊旣阻於秦時。堪悲今昔。黎庶正忻於堯日。自恨桑榆已而雙淚盡垂。一言斯獻。請沛爲湯沐之邑。實臣愜死生之願。是使萬歲千秋。杳冥無恨。

江南春賦 王 棨

麗日遲遲。江南春兮春已歸。分中元之節候。爲下國之芳菲。煙幕歷以堪悲。六朝故地。景葱蘢而正媚。二月晴暉。誰謂建業氣偏。句吳地僻。年來而和煦先徧。寒少而萌芽易坼。誠知青律吹南北。以無殊。爭奈洪流。且東西而是隔。當使蘭澤先暖。蘋州早晴。薄霧輕籠於鍾阜。和風微扇於臺城。有地皆秀。無枝不榮。遠客堪迷。朱雀之航頭柳色。離人莫聽。烏衣之巷內鶯聲。於時衡嶽雁過。吳宮燕至。高低兮梅嶺殘白。邈迤兮楓林列翠。幾多嫩綠。猶開玉樹之庭。無限飄紅。競落金蓮之地。別有鷗嶼殘照。漁家晚煙。潮浪渡口。蘆筍沙邊。野蕨蕤而繡合。山明媚以屏連。蝶影爭飛。昔日吳娃之徑。楊花亂撲。當年桃葉之船。物盛一隅。芳連千里。鬪暄妍於兩岸。恨風霜於積水。翼翼而雲低茂苑。謝客吟多。萋萋而草夾秦淮。王孫思起。或有惜嘉節。縱良遊。蘭橈錦纜。以盈水。舞袖歌聲。而滿樓。誰見其曉色東皋。處處農人之苦。夕陽南陌。家家蠶婦之愁。悲夫。豔逸無窮。歡娛有極。齊東昏醉之而失位。陳後主迷之而喪國。今日并爲天下春。無江南兮江北。

漁父辭劍賦 以濟人之急取利誠非爲韻 宋言

彼子胥兮亡命江湄。賴漁父兮停橈在茲。旣橫流而濟矣。因解劍以酬之。厚意殷勤。何惜千金之器。高情特達。竟陳三讓之辭。稽其去國無途。迷津獨立。前臨積水之阻。後有追兵之急。躊躇而鶴髮相哀。顧盼而漁舟可入。憂心盡展。憑剝木以何虞。渡口雖遙。挂輕帆而已及。絲是拂拭青萍。披陳素誠。念險難以知我。願提攜而賜卿。拔三尺之熒熒。波間電落。橫七星之凜凜。掌上風生。叟乃莞爾興言。搢頤話志。本期浩淼。以排難。詎可愴惶而徇利。酬仁報惠。誠多公子之心。害義傷廉。且異老夫之意。况乎禁令方急。嚴刑且陳。

盡索奔亡之黨。先誅隱匿之人。若以爵祿爲念。榮華是親。則械爾躬而赴國。持爾劍以防身。整棹西歸。自受執珪之賞。論功北面。寧亡切玉之珍。蓋由惻隱爲心。艱危是濟。方圖散髮之樂。豈假吹毛之銳。情高而俗慮難量。語罷而鳴榔忽逝。連環吐月。空臨玉匣之間。一葉乘風。漸入寒煙之際。豈不以識達精微。言窮是非。棄霜刃以長往。弄雲濤而不歸。寂寞巖煙。沉東流之渺渺。淒涼浦樹。含落日以依依。異乎義立一朝。名超萬古。決雲之異狀。徒逞皎日之深誠。不取則知美范蠡而述魯連。信斯人之可伍。

數鷄鳴度關賦 宋 言

雞司晨而風雨不渝。人懷詐而關防可圖。效長鳴於頃刻。排大難於斯須。近取諸身。俾羣情而莫測。出於余口。將五德以無殊。昔者田文。久爲秦質。東歸齊國之日。夜及函關之際。顧追騎以將臨。念國門之尙閉。君臣相視。方懷累卵之危。豪俠同謀。未有脫身之計。下客無名。潛來獻誠。君禍方垂於虎口。臣愚請數於鷄鳴。於是鷹揚負氣。鶚立含情。迴夜遙天。未變沈沈之色。攢眉鼓臂。因爲喔喔之聲。審聽真如。遙聞酷似。高穿紫塞之上。深入黃河之裏。一鳴而守吏先驚。三唱而行人盡起。迴瞻滿座。皆默默以無言。散入荒村。漸膠膠而不已。想夫計卽成欺。人皆不疑。重門似洞。以俱關。馳馬如龍。而莫追。雖師曠之聰。誠難辨矣。縱治長之慧。未必知之。於是考智謀。察能否。君於士兮誠重。士於君兮亦厚。念秦關之百二。難逞狼心。笑齊客之三千。不如鷄口。旣而美播疆鄰。名聞上賓。暫解咽喉之急。永爲心膂之臣。想季路之危冠。相俸未可。任秦皇之利觜。欲數無因。豈非志在酬恩。居然造響。清濁如一。高低不爽。迷翰音之類。應若同聲。關反拒之門。易於覆掌。始知戰國之多才。是招賢之道廣。

送君南浦賦 以越空絲目傷妾是君爲韻 黃滔

南浦風煙傷心渺然春山歷歷春草絲絲那堪送行客啓離筵一時之萍梗波濤今朝惜別千里之秦吳燕宋何日言旋當其繫馬出船候潮待月低徊而少婦對景愴恨而王孫望闕莫不撚嶰竹以淒楚撥湘絃而激越且當蘋澗把芳酒以留懽莫被薰風吹片帆而便發君不見陌上塵中奔西走東車輪似水馬足如蓬夜泊而猿啼霜樹晨征而月在煙空爭得枝間比翼更同於越鳥只應波上離羣便逐於燕鴻莫不太苦行人偏傷別妾龍媒而嘶出金埒鸞扇而持歸玉篋於時莫展歌嘯全沈笑靨郊天路口愁攀夾渡之柳條採蕨山前忍看解維之桂楫是知無人免別有別皆傷使人落顏貌枯肺腸淚成雨鬢侵霜朝悲五嶺暮怨三湘夢去不到書來豈常况一川之煙景茫茫橫衝楚徼兩岸之風濤渺渺直截炎荒無不銷魂如何舉目齋行而寶劍三尺留下而明珠十斛林駢樛木推誠而敢望合懽洲躍嘉魚取信而當期剖腹及夫樂闋人散龜飛日曛遺鞭卻取解珮還分玉窗之歸步愁舉蘭棹之移聲忍聞須知赤帝之江頭兩心似火莫自蒼梧之岸曲一去如雲雖佇錦衾而贈我終摛錦字以醺君已而誰不別離別離如此誰不相送相送於是則東門與北梁不足云爾

漢宮人誦洞簫賦 以清韻獨新宮娥諷誦爲韻 黃滔

王子淵兮誰與倫洞簫賦兮清且新麗藻上聞於天子妍詞遍誦於宮人名價有茲寫札於御牋彤管風流無比吟哦於貝齒朱唇斯賦也述江南之翠竹生彼雲谷甘露朝洒瑞煙晴撲般斤遽取於貞勁夔律乃知其韞蓄旣而植物惟一樂工惟獨九重聖主俄聆於玉韻金聲兩掖佳人爭致於瑤編繡軸受授相

從彤闈絳宮。始喧喧而歷覽。旋一一以精通。十二瓊樓。不唱鸞歌於夜月。三千玉貌。皆吟鳳藻於春風。莫不魯殿慚魂。巫山破夢。應教墨客以心死。解得紅妝之口諷。時時桂席。驚飄舞雪於羅衣。往往蘭臺。誤下歌塵於綺棟。於時閒趙瑟。寢秦箏。駐雲雨。咽咸英。非春而御苑花折。當夏而幽閨景清。如鷺人人。卻以詞鋒而勵吻。雕龍字字。爰於禁署而飛聲。泉噴香喉。雲靡綠鬢。豈貫珠之歌同調。固如簧之言別韻。遂使霞窗觸處。不吟紈扇之詩。樂府無人。更重箜篌之引。斯則琴賦與笛賦奚過。才子獲才人咏歌。體物之能有是。屬辭之道如何。一千餘字之珠璣。不逢漢帝三十六宮之牙齒。詎啓秦娥。方今天鑒求文。詞人畢用。有才可應於妃后。工賦足流於嬪從。洞簫之作。兮何代無。誰繼當時之吟誦。

郭子儀單騎見虜賦

以汾陽征虜歷以至誠爲韻

秦觀

回紇入寇。汾陽出征。何單騎以見虜。蓋臨戎而示情。四馬雄趨。方傳呼而免胄。諸羌駭矚。俄下拜以投兵。方其唐祚中微。胡塵內侮。承范陽猖獗之亂。值永泰因循之主。金繒不足以塞其貪嗜。鎧仗不足以止其攘取。雲屯三輔。但分諸將之兵。烏合萬羣。難破重圍之虜。子儀乃外弛嚴備。中輸至誠。氣干霄而直上。身按轡以徐行。於是露刃者膽喪。控弦者骨驚。謂令公尙臨於金革。想可汗未厭於寰瀛。頓釋前憾。來尋舊盟。彼何人斯。忽去幢幡之盛。果吾父也。敢論戈甲之精。豈非事方急則宜有異謀。軍旣孤則難拘常法。遭彼虜之悍勁。屬我師之困乏。校之力則理必敗露。示以誠則意當親狎。所以徹衛四環。去兵兩夾。雖鋒無鏌邪之銳。而勢有太山之壓。據鞍以出。若乘擒虎之驄。失仗而驚。如棄華元之甲。金石至堅也。以誠可動。天地至大也。以誠可聞。矧爾熊羆之屬。困乎蛇豕之羣。於是時也。將乘驕而必敗。兵不戢則將焚。惟有明

信。乃成茂勳。吐蕃由是而引歸。師殲靈夏。僕固於焉而暴卒。禍息并汾。非不知猛虎無助也。受侮於狐狸。神龍失水也。見侵於螻蟻。曷爲鋒鏑之交下。遽遺紀綱而不以。蓋念至威無恃於張皇。大智不資於恢詭。遠同光武。輕行銅馬之營。近類曹成。獨造國良之壘。向若怨結不解。禍連未央。養威嚴於將軍之幕。角技巧於勇士之場。攻且攻。今天變色。戰復戰。分星動芒。如此則雖驍雄而必弊。顧創病以何長。苻秦夸南伐之師。坐投淝水。新室恃北來之衆。立潰昆陽。固知精擊刺者。非爲將之良。敢殺伐者。非用兵之至。况德善之身積。宜福祥之天畀。故中書二十四考焉。由此而致。

辭賦類

辭

秋風辭 漢武帝

上行幸河東。祠后土。顧視帝京。欣然中流。與羣臣飲燕。上歡甚。乃自作秋風辭。曰。秋風起兮白雲飛。草木黃落兮鴈南歸。蘭有秀兮菊有芳。攜佳人兮不能忘。泛樓船兮濟汾河。橫中流兮揚素波。簫鼓鳴兮發棹歌。歡樂極兮哀情多。少壯幾時兮奈老何。

歸去來辭 陶潛

歸去來兮。田園將蕪。胡不歸。旣自以心爲形役。奚惆悵而獨悲。悟已往之不諫。知來者之可追。寔迷途其未遠。覺今是而昨非。舟遙遙以輕颺。風飄飄而吹衣。問征夫以前路。恨晨光之熹微。乃瞻衡宇。載欣載奔。僮僕歡迎。稚子候門。三逕就荒。松菊猶存。攜幼入室。有酒盈樽。引壺觴以自酌。眴庭柯以怡顏。倚南窗以

寄傲。審容膝之易安。園日涉以成趣。門雖設而常關。策扶老以流憩。時矯首而遐觀。雲無心以出岫。鳥倦飛而知還。景翳翳以將入。撫孤松而盤桓。歸去來兮。請息交以絕游。世與我而相遺。復駕言兮焉求。悅親戚之情話。樂琴書以消憂。農人告余以春及。將有事乎西疇。或命巾車。或棹孤舟。既窈窕以尋壑。亦崎嶇而經邱。木欣欣以向榮。泉涓涓而始流。善萬物之得時。感吾生之行休。已矣乎。寓形宇內復幾時。曷不委心任去留。胡爲遑遑欲何之。富貴非吾願。帝鄉不可期。懷良辰以孤往。或植杖而耘耔。登東皋以舒嘯。臨清流而賦詩。聊乘化以歸盡。樂夫天命復奚疑。

和歸去來兮辭 有序 蘇軾

子瞻謫居昌化。追和淵明歸去來辭。蓋以無何有之鄉爲家。雖在海外。未嘗不歸云爾。歸去來兮。吾方南遷。安得歸。臥江海之瀕洞。弔鼓角之悽悲。迹泥蟠而愈深。時電往而莫追。懷西南之歸路。夢良是而覺非。悟此生之何常。猶寒暑之異衣。豈襲裘而念葛。蓋得恂而喪微。我歸甚易。匪馳匪奔。俯仰還家。下馬闔門。藩垣雖闕。堂室故存。挹我天醴。注之窪樽。飲月露以洗心。餐朝霞而眩顏。混客主以爲一。俾婦姑之相安。知盜竊之何有。乃培門而折關。廓圓鏡以外照。納萬象而中觀。治廢井以晨汲。滄百泉之夜還。守靜極以自作。時爵躍而鯢桓。歸去來兮。請終老於斯游。我先人之弊廬。復舍此而焉求。均海南與漠北。挈往來而無憂。畸人告余以一言。非八卦與九疇。方飢須糧。已濟無舟。忽人牛之皆喪。但喬木與高邱。驚六用之無成。自一根之反流。望故家而求息。曷中道而三休。已矣乎。吾生有命。歸有時。我初無行亦無留。駕言隨子聽所之。豈以師南華而廢從安期。謂易稼之終枯。遂不漑而不耔。師淵明之雅放。和百

篇之新詩。賦歸來之清引。我其後身蓋無疑。

辭賦類

騷

離騷 屈平

帝高陽之苗裔兮。朕皇考曰伯庸。攝提貞於孟陬兮。惟庚寅吾以降。皇覽揆余於初度兮。肇錫余以嘉名。名余曰正則兮。字余曰靈均。紛吾既有此內美兮。又重之以修能。扈江離與辟芷兮。紉秋蘭以爲佩。汨余若將不及兮。恐年歲之不吾與。朝搴阨之木蘭兮。夕攬洲之宿莽。日月忽其不淹兮。春與秋其代序。惟草木之零落兮。恐美人之遲暮。不撫壯而棄穢兮。何不改乎此度也。乘騏驥以馳騁兮。來吾導夫先路。昔三后之純粹兮。固衆芳之所在。雜申椒與菌桂兮。豈惟紉夫蕙茝。彼堯舜之耿介兮。旣遵道而得路。何桀紂之昌披兮。夫惟捷徑以窘步。惟黨人之偷樂兮。路幽昧以險隘。濟余身之憚殃兮。恐皇輿之敗績。忽奔走以先後兮。及前王之踵武。荃不察余之中情兮。反信讒而齎怒。余固知謇謇之爲患兮。忍而不能舍也。指九天以爲正兮。夫惟靈修之故也。初旣與余成言兮。後悔遁而有佗。余旣不難夫別離兮。傷靈修之數化。余旣滋蘭之九畹兮。又樹蕙之百畝。畦留夷與揭車兮。雜杜蘅與芳芷。冀枝葉之峻茂兮。願埃時乎吾將刈。雖萎絕其亦何傷兮。哀衆芳之蕪穢。衆皆競進以貪婪兮。憑不厭乎求索。羌內恕己以量人兮。各興心而嫉妒。忽馳騫以追逐兮。非余心之所急。老冉冉其將至兮。恐修名之不立。朝飲木蘭之墜露兮。夕餐秋菊之落英。苟余情其信姱以練要兮。長顛頷亦何傷。擘木根以結茝兮。貫薜荔之落蘂。矯菌桂以紉蕙兮。

索胡繩之纒纒。謗吾法夫前修兮。非時俗之所服。雖不周於今之人兮。願依彭咸之遺則。長太息以掩涕兮。哀人生之多艱。余雖好修姱以鞿鞢兮。謗朝諝而夕替。既替余以蕙纒兮。又申之以攬芷。亦余心之所善兮。雖九死其猶未悔。怨靈修之浩蕩兮。終不察夫人心。衆女嫉余之蛾眉兮。謠詠謂余以善淫。固時俗之工巧兮。偃規矩而改錯。背繩墨以追曲兮。競周容以爲度。忼鬱悒余侘傺兮。吾獨窮困乎此時也。寧溘死以流亡兮。余不忍爲此態也。鸞鳥之不羣兮。自前世而固然。何方圓之能周兮。夫孰異道而相安。屈心而抑志兮。忍尤而攘詬。伏清白以死直兮。固前聖之所厚。悔相道之不察兮。延佇乎吾將反。迴朕車以復路兮。及行迷之未遠。步余馬於蘭皋兮。馳椒邱焉且止息。進不入以離尤兮。退將復修吾初服。製芰荷以爲衣兮。美芙蓉以爲裳。不吾知其亦已兮。苟余情其信芳。高余冠之岌岌兮。長余佩之陸離。芳與澤其雜糅兮。唯昭質其猶未虧。忽反顧以游目兮。將往觀乎四荒。佩繽紛其繁飾兮。芳菲菲其彌章。人生各有所樂兮。余獨好修以爲常。雖體解吾猶未變兮。豈予心之可懲。女嬃之嬋媛兮。申申其詈予。曰鮫婞直以亡身兮。終然天乎羽之野。汝何博謗而好修兮。紛獨有此姱節。薺藜施以盈室兮。判獨離而不服。衆不可戶說兮。孰云察余之中情。世並舉而好朋兮。夫何熒獨而不予聽。依前聖之節中兮。喟憑心而歷茲。濟沅湘以南征兮。就重華而陳辭。啓九辯與九歌兮。夏康娛以自縱。不顧難以圖後兮。五子用失乎家巷。羿淫游以佚田兮。又好射夫封狐。固亂流其鮮終兮。泥又貪夫厥家。澆身被服彊圉兮。縱欲而不忍。日康娛以自忘兮。厥首用夫顛隕。夏桀之常違兮。乃遂焉而逢殃。后辛之菹醢兮。殷宗用之不长。湯禹嚴而祇敬兮。周論道而莫差。舉賢而授能兮。循繩墨而不頗。皇天無私阿兮。覽民德焉錯輔。夫維聖哲以茂行兮。苟得用

此下土。瞻前而顧後兮。相觀民之計極。夫孰非義而可用兮。孰非善而可服。阽余身而危死兮。覽余初其猶未悔。不量鑿而正柄兮。固前修以菹醢。曾歔歔余鬱悒兮。哀朕時之不當。攀茹蕙以掩涕兮。霑余襟之浪浪。跪敷衽以陳辭兮。耿吾旣得此中正。駟玉虬以乘鸞兮。溘埃風余上征。朝發軔於蒼梧兮。夕余至乎縣圃。欲少留此靈瓊兮。日忽忽其將暮。吾令羲和弭節兮。望崦嵫而勿迫。路漫漫其修遠兮。吾將上下而求索。飲余馬於咸池兮。總余轡乎扶桑。折若木以拂日兮。聊須臾以相羊。前望舒使先驅兮。後飛廉使奔屬。鸞皇爲余先戒兮。雷師告余以未具。吾令鳳皇飛騰兮。又繼之以日夜。飄風屯其相離兮。帥雲霓而來御。紛紛總總其離合兮。班陸離其上下。吾令帝閭開關兮。倚閭闔而望予。時曖曖其將罷兮。結幽蘭而延佇。世溷濁而不分兮。好蔽美而嫉妬。朝吾將濟於白水兮。登閶風而縹馬。忽反顧以流涕兮。哀高邱之無女。溘吾游此春宮兮。折瓊枝以繼佩。及榮華之未落兮。相下女之可賄。吾令豐隆乘雲兮。求慮妃之所在。解佩纒以結言兮。吾令蹇修以爲理。紛紛總總其離合兮。忽緯繡其難遷。夕歸次於窮石兮。朝濯髮乎洧槃。保厥美以驕傲兮。日康娛以淫游。雖信美而無禮兮。來違棄而改求。覽相觀於四極兮。周流乎天余乃下。望瑤臺之偃蹇兮。見有娥之佚女。吾令鳩爲媒兮。鳩告余以不好。雄鳩之鳴逝兮。余猶惡其佻巧。心猶豫而狐疑兮。欲自適而不可。鳳皇旣受詒兮。恐高辛之先我。欲遠集而無所止兮。聊浮游以逍遙。及少康之未家兮。留有虞之二姚。理弱而媒拙兮。恐導言之不固。時溷濁而嫉賢兮。好蔽美而稱惡。閨中旣以邃遠兮。哲王又不寤。懷朕情而不發兮。余焉能忍與此終古。索瓊茅以筵筮兮。命靈氛爲余占之。曰兩美其必合兮。孰信修而慕之。思九州之博大兮。豈唯是其有女。曰勉遠逝而無狐疑兮。孰求美而釋汝。何所獨無芳

草兮爾何懷乎故宇。世幽昧以眩曜兮。孰云察余之美惡。人好惡其不同兮。惟此黨人其獨異。戶服艾以盈要兮。謂幽蘭其不可佩。覽察草木其猶未得兮。豈理美之能當。蘇糞壤以充幃兮。謂申椒其不芳。欲從靈氛之吉占兮。心猶豫而狐疑。巫咸將夕降兮。懷椒糈而要之。百神翳其備降兮。九疑繽其並迎。皇剡剡其揚靈兮。告余以吉故。曰勉升降以上下兮。求矩矱之所同。湯禹儼而求合兮。摯皋繇而能調。苟中情其好修兮。何必用夫行媒。說操築於傅巖兮。武丁用而不疑。呂望之鼓刀兮。遭周文而得舉。寧戚之謳歌兮。齊桓聞以該輔。及年歲之未晏兮。時亦猶其未央。恐鷓鴣之先鳴兮。使百草爲之不芳。何瓊佩之偃蹇兮。衆薺然而蔽之。惟此黨人之不亮兮。恐嫉妬而折之。時繽紛其變易兮。又何可以淹留。蘭芷變而不芳兮。荃蕙化而爲茅。何昔日之芳草兮。今直爲此蕭艾也。豈其有他故兮。莫好修之害也。余以蘭爲可恃兮。羌無實而容長。委厥美以從俗兮。苟得列乎衆芳。椒專佞以慢諂兮。撥又欲充其佩幃。旣干進而務入兮。又何芬之能祇。固時俗之從流兮。又孰能無變化。覽椒蘭其若茲兮。又況揭車與江離。惟茲佩之可貴兮。委厥美而歷茲。芳菲菲而難虧兮。芬至今猶未沫。和調度以自娛兮。聊浮游而求女。及余飾之方壯兮。周流觀乎上下。靈氛旣告余以吉占兮。歷吉日乎吾將行。折瓊枝以爲羞兮。精瓊靡以爲糧。爲余駕飛龍兮。雜瑤象以爲車。何離心之可同兮。吾將遠逝以自疏。邇吾道夫崑崙兮。路修遠以周流。揚雲霓之晡藹兮。鳴玉鸞之啾啾。朝發軔於天津兮。夕余至乎西極。鳳皇翼其承旂兮。高翱翔之翼翼。忽吾行此流沙兮。遵赤水而容與。麾蛟龍使梁津兮。詔西皇使涉予。路修遠以多艱兮。騰衆車使徑待。路不周以左轉兮。指西海以爲期。屯余車其千乘兮。齊玉軼而並馳。駕八龍之婉婉兮。載雲旗之委移。抑志而弭節兮。神高馳之邈

逸。奏九歌而舞韶兮。聊假日以媮樂。陟升皇之赫戲兮。忽臨睨夫舊鄉。僕夫悲余馬懷兮。蜷局顧而不行。亂曰。已矣哉。國無人莫我知兮。又何懷乎故都。既莫足與爲美政兮。吾將從彭咸之所居。

九章屈平

惜誦

惜誦以致愍兮。發憤以抒情。所非忠而言之兮。指蒼天以爲正。令五帝以折中兮。戒六神以鄉服。俾山川以備御兮。命咎繇使聽直。竭忠誠以事君兮。反離羣而贅疣。忘儂媚以背衆兮。待明君其知之。言與行其可迹兮。情與貌其不變。故相臣莫若君兮。所以證之不遠。吾誼先君而後身兮。羌衆人之所仇也。專惟君而無他兮。又衆兆之所讐也。壹心而不豫兮。羌不可保也。疾親君而無他兮。有招禍之道也。思君其莫我忠兮。忽忘身之賤貧。事君而不貳兮。迷不知寵之門。忠何辜以遇罰兮。亦非予之所志也。行不羣以顛越兮。又衆兆之所哈也。紛逢尤以離謗兮。謗不可釋也。情沈抑而不達兮。又蔽而莫之白也。心鬱邑予侘傺兮。又莫察予之中情。固煩言不可結詒兮。願陳志而無路。退靜默而莫予知兮。進號呼又莫吾聞。中侘傺之煩惑兮。中悶瞀之忼忼。昔予夢登天兮。魂中道而無杭。吾使厲神占之兮。曰有志極而無旁。終危獨以離異兮。曰君可思而不可恃。故衆口其鑠金兮。初若是而逢殆。懲熱羹而吹齋兮。何不變此志也。欲釋階而登天兮。猶有曩之態也。衆駭遽以離心兮。又何以爲此伴也。同極而異路兮。又何以爲此援也。晉申生之孝子兮。父信讒而不好。行婞直而不豫兮。鮌功用而不就。吾聞作忠以造怨兮。忽謂之過言。九折臂而成醫兮。吾至今乃知其信然。矰弋機而在上兮。罟羅張而在下。設張辟以娛君兮。願側身而無所。欲澶回

以干僚兮。恐重患而離尤。欲高飛而遠集兮。君罔謂女何之。欲橫奔而失路兮。蓋堅志而不忍。背膺牌以交痛兮。心菀結而紆軫。擣木蘭以擣蕙兮。繫申椒以爲糧。播江蘼與滋菊兮。願春日以爲糗。芳恐情質之不信兮。故重著以自明。矯茲媚以私處兮。願曾思而遠身。

涉江

余幼好此奇服兮。年既老而不衰。帶長鋏之陸離兮。冠切雲之崔嵬。被明月兮佩寶璐。世溷濁而莫予知兮。吾方高馳而不顧。駕青虬兮驂白螭。吾與重華遊兮。瑤之圃。登崑崙兮食玉英。與天地兮比壽。與日月兮齊光。哀南夷之莫吾知兮。旦予濟於江湘。乘鄂渚而反顧兮。欵秋冬之緒風。步余馬兮山皋。邸予車兮方林。乘舲船予上沅兮。齊吳榜以擊汰。船容與而不進兮。淹回水而疑滯。朝發枉渚兮。夕宿辰陽。苟余心其端直兮。雖僻遠其何傷。入溆浦予迴回兮。迷不知吾所如。深林杳以冥冥兮。乃猿狖之所居。山峻高而蔽日兮。下幽晦以多雨。霰雪紛其無垠兮。雲霏霏而承宇。哀吾生之無樂兮。幽獨處乎山中。吾不能變心而從俗兮。固將愁苦而終窮。接輿髡首兮。桑扈羸行。忠不必用兮。賢不必以。伍子逢殃兮。比干菹醢。與前世而皆然兮。吾又何怨乎今之人。予將董道而不豫兮。固將重昏而終身。亂曰。鸞鳥鳳皇日以遠兮。燕雀烏鵲巢堂壇兮。靈申辛夷死林薄兮。腥臊並御。芳不得薄兮。陰陽易位。時不當兮。懷信侘傺。忽乎吾將行兮。

哀郢

皇天之不純命兮。何百姓之震愆。民離散而相失兮。方仲春而東遷。去故鄉而就遠兮。遵江夏以流亡。出

國門而軫懷兮。甲之鼃吾以行。發郢而去閭兮。荒忽其焉極。楫齊揚以容與兮。哀見君而不再得。望長楸而太息兮。涕淫淫其若霰。過夏首而西浮兮。顧龍門而不見。心嬋媛而傷懷兮。眇不知余所蹠。順風波以從流兮。焉洋洋而爲客。陵陽侯之汜濫兮。忽翱翔之焉薄。心絪結而不解兮。思蹇產而不釋。將運舟而下浮兮。上洞庭而下江。去終古之所居兮。今逍遙而來東。羌靈魂之欲歸兮。何須臾而忘反。背夏浦而西思兮。哀故都之日遠。登大墳以遠望兮。聊以舒吾憂心。哀州土之平樂兮。悲江介之遺風。當陵陽之焉至兮。淼南度之焉如。曾不知夏之爲邱兮。孰兩東門之可蕪。心不怡之長久兮。憂與憂其相接。惟郢路之遼遠兮。江與夏之不可涉。忽若因不信兮。至今九年而不復。慘鬱鬱而不通兮。蹇侘傺而含感。外承歡之汨約兮。謔荏弱而難持。忠湛湛而願進兮。妒披離而鄣之。彼堯舜之抗行兮。瞭杳杳其薄天。衆讒人之嫉妒兮。被以不慈之僞名。憎慍愉之脩美兮。好夫人之慷慨。衆躑躅而日進兮。美超遠而逾邁。亂曰。曼予日以流觀兮。冀壹反之何時。鳥飛反故鄉兮。狐死必首邱。信非吾罪而棄逐兮。何日夜而忘之。

抽思

鬱鬱之憂思兮。獨永歎乎曾傷。思蹇產之不釋兮。曼遭夜之方長。悲秋風之動容兮。何四極之浮浮。數惟莖之多怒兮。傷予心之悽悽。願搖起而橫奔兮。覽民尤以自鎮。結微情以陳辭兮。矯以遺夫美人。昔君與我成言兮。曰黃昏以爲期。羌中道而回畔兮。反既有此他志。憍吾以其美好兮。覽予以其脩姱。與予言而不信兮。蓋爲予而造怒。願承間而自察兮。心震悼而不敢。悲夷猶而冀進兮。心怛傷之憺憺。歷茲情以陳辭兮。莖詳聾而不聞。固切人之不媚兮。衆果以我爲患。初吾所陳之耿著兮。豈至今其庸亡。何獨樂斯之

譽譽兮願荃美之可完。望三五以爲像兮。指彭咸以爲儀。夫何極而不至兮。故遠聞而難虧。謔不由外來兮。名不可以虛作。孰無施而有報兮。孰不實而有穫。少歌曰。與美人抽思兮。并日夜而無正。憍吾以其美好兮。敖朕辭而不聽。倡曰。有鳥自南兮。來集漢北。好姱佳麗兮。牂獨處此異域。旣惇獨而不羣兮。又無良媒在其側。道遼遠而日忘兮。願自申而不得。望南山而流涕兮。臨流水而太息。望孟夏之短夜兮。何晦明之若歲。惟郢路之遼遠兮。魂一夕而九逝。曾不知路之曲直兮。南指月與列星。願徑逝而不得兮。魂識路之營營。何靈魂之信直兮。人之心不與吾心同。理弱而媒不通兮。尙不知予之從容。亂曰。長瀨湍流。沂江潭兮。狂顧南行。聊以娛心兮。軫石歲崑。蹇吾願兮。超回志度。行隱進兮。低徊夷猶。宿北姑兮。煩冤瞽容。實沛徂兮。愁歎苦神。靈遙思兮。路遠處幽。又無行媒兮。道思作頌。聊自救兮。憂心不遂。斯言誰告兮。

懷沙

滔滔孟夏兮。草木莽莽。傷懷永哀兮。汨徂南土。眴兮窈窕。孔靜幽默。菀結紆軫兮。離愍而長鞠。撫情效志兮。冤屈而自抑。矧方以爲園兮。常度未替。易初本迪兮。君子所鄙。章畫志墨兮。前圖未改。內直質重兮。大人所賊。巧倖不斲兮。熟察其揆。正玄文處幽兮。矇謂之不章。離婁微睇兮。瞽以爲無明。變白而爲黑兮。倒上以爲下。鳳皇在笱兮。雞鶩翔舞。同糅玉石兮。一概而相量。夫惟黨人之鄙固兮。羌不知吾所臧。任重載盛兮。陷滯而不濟。懷瑾握瑜兮。窮不知所。邑犬羣吠兮。吠所怪也。非俊疑桀兮。固庸態也。文質疏內兮。衆不知吾之異采。材樸委積兮。莫知予之所有。重仁襲義兮。謹厚以爲豐。重華不可遇兮。孰知予之從容。古固有不並兮。豈知其故也。湯禹久遠兮。邈不可慕也。懲違改忿兮。抑心而自彊。離愍而不遷兮。願志之

有像。進路北次兮。日昧昧其將莫。舒憂娛哀兮。限之以大故。亂曰。浩浩沅湘。分流汨兮。修路幽弗。道遠忽兮。曾吟眴悲。永歎喟兮。世既莫吾知。人心不可謂兮。懷情抱質。獨無正兮。伯樂既沒。驥將焉程兮。民生稟命。各有所錯兮。定心廣志。予何畏懼兮。知死不可讓。願勿愛兮。明告君子。吾將以爲類兮。

思美人

思美人兮。擘涕而竚眙。媒絕路阻兮。言不可結而詒。蹇蹇之煩冤兮。陷滯而不發。申旦以舒中情兮。志沈菀而莫達。願寄言於浮雲兮。遇豐隆而不將。因歸鳥而致辭兮。乃迅高而難當。高辛之靈晟兮。遭玄鳥而致詒。欲變節以從俗兮。媿易初而屈志。獨歷年而離愍兮。羌馮心猶未化。寧隱閔而壽考兮。何變易之可爲。知前轍之不遂兮。未改此度。車旣覆而馬顛兮。蹇獨懷此異路。勒騏驥而更駕兮。造父爲我操之。遷逡次而勿驅兮。聊假日以須時。指嶓冢之西隈兮。與纁黃以爲期。開春發歲兮。白日出之悠悠。吾將蕩志而愉樂兮。遵江夏以娛憂。擘大薄之芳茝兮。搴長洲之宿莽。惜吾不及古人兮。吾誰與玩此芳草。解蕭薄與雜菜兮。備以爲交佩。佩繽紛其繚轉兮。遂萎絕而離異。吾且遭回以娛憂兮。觀南人之變態。竊快在中心兮。揚厥馮而不竢。芳與澤其雜糅兮。羌芳華自中出。紛郁郁其遠烝兮。滿內而外揚。情與質信可保兮。羌居蔽而聞章。令薜荔以爲理兮。憚舉趾而緣木。因芙蓉而爲媒兮。憚蹇裳而濡足。登高吾不說兮。入下吾不能。固朕形之不服兮。然容與而狐疑。廣遂前畫兮。未改此度也。命則處幽。吾將罷兮。願及白日之未莫也。獨煢煢而南行兮。思彭咸之故也。

惜往日

惜往日之曾信兮。受命詔以昭時。奉先功以照下兮。明法度之嫌疑。國富強而法立兮。屬貞臣而日嫉。祕
密事之載心兮。雖過失猶弗治。心純癯而不泄兮。遭讒人而嫉之。君含怒而待臣兮。不清激其然否。蔽晦
君之聰明兮。虛惑誤又以欺。弗參驗以考實兮。遠遷臣而弗思。信讒諛之溷濁兮。盛氣志而過之。何貞臣
之無辜兮。被讟謗而見尤。慚光景之誠信兮。身幽隱而備之。臨江湘之玄淵兮。遂自忍而沈流。卒沒身而
絕名兮。惜壅君之不昭。君無度而弗察兮。使芳草爲藪幽。焉舒情而抽信兮。恬死亡而不聊。獨鄣壅而蔽
隱兮。使貞臣爲無由。聞百里之爲虜兮。伊尹亨于庖廚。呂望屠於朝歌兮。寧戚歌而飯牛。不逢湯武與桓
繆兮。世孰云而知之。吳信讒而弗味兮。子胥死而後憂。介子忠而立枯兮。文君寤而追求。封介山而爲之
禁兮。報大德之優游。思久故之親身兮。因縞素而哭之。或忠信而死節兮。或訑謾而不疑。弗省察而按實
兮。聽讒人之虛辭。芳與澤其雜糅兮。孰申旦而別之。何芳草之早夭兮。微霜降而下戒。諒聰不明而蔽壅
兮。使讒諛而自得。自前世之嫉賢兮。謂蕙若其不可佩。妒佳冶之芳香兮。媮母姣而自好。雖有西施之美
容兮。讒妒入以自代。願陳情以白行兮。得罪過之不意。情冤見之日明兮。如列宿之錯置。乘騏驥而馳騁
兮。無銜轡而自載。乘汜汭以下流兮。無舟楫而自備。背法度而日治兮。辟與此其無異。寧溘死而流亡兮。
恐禍殃之有再。不畢辭而赴淵兮。惜壅君之不識。

橘頌

后皇嘉樹。橘徠服兮。受命不遷。生南國兮。深固難徙。更壹志兮。綠葉素榮。紛其可喜兮。曾枝剌棘。圓實搏
兮。青黃雜糅。文章爛兮。精色內白。類任道兮。紛緼宜修。姱而不醜兮。嗟爾幼志。有以異兮。獨立不遷。豈不

可喜兮。深固難徙。廓其無求兮。蘇世獨立。橫而不流兮。閉心自慎。終不過失兮。秉德無私。參天地兮。願歲并謝。與長友兮。淑離不淫。梗其有理兮。年歲雖少。可師長兮。行比伯夷。置以爲象兮。

悲回風

悲回風之搖蕙兮。心菀結而內傷。物有微而隕性兮。聲有隱而先倡。夫何彭咸之造思兮。暨志介而不忘。萬變其情。豈可蓋兮。孰虛僞之可長。鳥獸鳴以號羣兮。草苴比而不芳。魚菴鱗以自別兮。蛟龍隱其文章。故荼薺不同畝兮。蘭茝幽而獨芳。惟佳人之永都兮。更統世以自況。眇遠志之所及兮。憐浮雲之相羊。介眇志之所惑兮。竊賦詩之所明。惟佳人之獨懷兮。折芳椒以自處。曾歔歔之嗟嗟兮。獨隱伏而思慮。涕泣交而淒淒兮。思不眠而極曙。終長夜之曼曼兮。掩此哀而不去。寤從容以周流兮。聊逍遙以自恃。傷太息之愍憐兮。氣於邑而不可止。糾思心以爲纒兮。編愁苦以爲膺。折若木以蔽光兮。隨飄風之所仍。存髣髴而不見兮。心踊躍其若湯。撫佩衽以案志兮。超惘惘而遂行。歲忽忽其若頽兮。時亦冉冉而將至。蘋蘩稿而節離兮。芳已歇而不比。憐思心之不可懲兮。證此言之不可聊。寧溘死而流亡兮。不忍此心之常愁。孤子吟而投淚兮。放子出而不還。孰能思而不隱兮。昭彭咸之所聞。等石巒以遠望兮。路眇眇之默默。入景響之無應兮。聞省想而不可得。愁鬱鬱之無快兮。居戚戚而不可解。心鞿羈而不開兮。氣繚轉而自緝。穆眇眇之無垠兮。莽芒芒之無儀。聲有隱而相感兮。物有純而不可爲。藐曼曼之不可量兮。縹綿綿之不可紆。愁悄悄之常悲兮。翩冥冥之不可娛。陵大波而流風兮。託彭咸之所居。上高巖之峭岸兮。處雌蜺之標巔。據青冥而攄虹兮。遂儵忽而捫天。吸湛露之浮涼兮。漱凝霜之雰雰。依風穴以自息兮。忽傾寤以蟬媛。

馮崑崙以瞰霧兮。隱岐山以清江。憚涌湍之磕磕兮。聽波聲之洶洶。紛容容之無經兮。罔芒芒之無紀。軋洋洋之無從兮。馳委移之焉止。飄幡幡其上下兮。翼遙遙其左右。汜瀟瀟其前後兮。伴張弛之信期。觀炎氣之相仍兮。窺煙液之所積。悲霜雪之俱下兮。聽潮水之相擊。借光景以往來兮。施黃棘之枉策。求介子之所存兮。見伯夷之放迹。心調度而不去兮。刻著志之所適。曰吾怨往昔之所冀兮。悼來者之惓惓。浮江淮而入海兮。從子胥而自適。望大河之洲渚兮。悲申徒之抗迹。驟諫君而不聽兮。任重石之何益。心絪結而不解兮。思蹇產而不釋。

遠游 屈平

悲時俗之迫阨兮。願輕舉而遠游。質菲薄而無因兮。焉託乘而上浮。遭沈濁之汙穢兮。獨菀結其誰語。夜耿耿而不寐兮。魂營營而至曙。惟天地之無窮兮。哀人生之長勤。往者余弗及兮。來者余弗聞。步徙倚而遙思兮。怊惝怳而永懷。意荒忽而流蕩兮。心愁悽而增悲。神儵忽而不反兮。形枯槁而獨留。內惟省以端操兮。求正氣之所由。漠虛靜以恬愉兮。澹無爲而自得。聞赤松之清塵兮。願承風乎遺則。貴至人之休德兮。美往世之登仙。與化去而不見兮。名聲著而日延。奇傳說之託辰星兮。羨韓衆之得一。形穆穆以寢遠兮。離人羣而遁逸。因氣變而遂曾舉兮。忽神奔而鬼怪。時髣髴以遙見兮。精皎皎而往來。絕氛埃而淑郵兮。終不反乎故都。免衆患而不懼兮。世莫知其所如。恐天時之代序兮。耀靈暉而西征。微霜降而下淪兮。悼芳草之先零。聊仿佯而逍遙兮。永歷年而無成。誰可與玩斯遺芳兮。長鄉風而舒情。高陽邈以遠兮。余將焉所程。重曰。春秋忽其不淹兮。奚久留此故居。軒轅不可攀援兮。吾將從王喬而娛戲。餐六氣而飲沆

灑兮。漱正陽而含朝霞。保神明之清澄兮。精氣入而羸穢除。順凱風以從游兮。至南巢而壹息。見王子而宿之兮。審壹氣之和德。曰道可受兮。不可傳。其小無內兮。其大無垠。毋澁而魂兮。彼將自然。壹氣孔神兮。於中夜存。虛以待之兮。無爲之先。庶類以成兮。此德之門。聞至貴而遂徂兮。忽乎吾將行。仍羽人於丹邱兮。留不死之舊鄉。朝濯髮於湯谷兮。夕晞余身乎九陽。吸飛泉之微液兮。懷琬琰之華英。玉色頰以脫顏兮。精醇粹而始壯。質銷鑠以汨約兮。神要眇以淫放。嘉南州之炎德兮。麗桂樹之冬榮。山蕭條而無獸兮。野寂漠其無人。載營魄而登霞兮。掩浮雲而上征。命天閭其開關兮。排闥闔而望予。召豐隆使先導兮。問太微之所居。集重陽入帝宮兮。造旬始而觀清都。朝發軔於太儀兮。夕始臨乎於微閭。屯余車之萬乘兮。紛容與而並馳。駕八龍之婉婉兮。載雲旗之委移。建雄虹之采旄兮。五色雜而眩耀。服偃蹇以低昂兮。驂連蜷以驕敖。騎膠葛以雜亂兮。班曼衍而方行。攬余轡而正策兮。吾將過乎句芒。歷太皓以右轉兮。前飛廉以啓路。陽杲杲其未光兮。陵天地以徑度。風伯爲余先驅兮。氛埃辟而清涼。鳳皇翼其承旗兮。遇蓐收乎西皇。擘慧星以爲旂兮。舉斗柄以爲麾。判陸離其上下兮。游驚霧之流波。時曖曖其曠莽兮。召元武而奔屬。後文昌使掌行兮。選署衆神以並轂。路曼曼其修遠兮。徐弭節而高厲。左雨師使徑侍兮。右雷公以爲衛。欲度世以忘歸兮。意恣睢以担橋。內欣欣而自美兮。聊媮娛以淫樂。涉青雲以汎濫兮。忽臨睨夫舊鄉。僕夫懷余心悲兮。邊馬顧而不行。思故舊而想象兮。長太息而掩涕。汜容與而遐舉兮。聊抑志而自弭。指炎帝而直馳兮。吾將往乎南疑。覽方外之荒忽兮。沛潤漑而自浮。祝融戒而蹕御兮。騰告鸞鳥迎慮妃。張咸池奏承雲兮。二女御九韶歌。使湘靈鼓瑟兮。令海若舞馮夷。列螭象而並進兮。形繆蚪而委移。雌霓

便娟以曾撓兮。鸞鳥軒翥而翔飛。音樂博衍無終極兮。焉乃逝以徘徊。舒并節以馳騫兮。遠絕垠乎寒門。軼迅風於清原兮。從顛頂乎曾冰。歷元冥以邪徑兮。乘間維以反顧。召黔羸而見之兮。爲余先乎平路。經營四荒兮。周流六漠。上至列缺兮。降望大壑。下崢嶸而無地兮。上寥闊而無天。視儵忽而無見兮。聽恫怳而無聞。超無爲以至清兮。與太初而爲鄰。

九辯宋玉

悲哉秋之爲氣也。蕭瑟兮。草木搖落而變衰。僚慄兮。若在遠行。登山臨水兮。送將歸。沈寥兮。天高而氣清。寂寥兮。收潦而水清。憫悽增欷兮。薄寒之中人。愴怳憤恨兮。去故而就新。坎壈兮。貧士失職而志不平。廓落兮。羈旅而無友生。惆悵兮。而私自憐。燕翩翩其辭歸兮。蟬寂寞而無聲。雁噉噉而南游兮。鷓鴣啁晰而悲鳴。獨申旦而不寐兮。哀蟋蟀之宵征。時亹亹而過中兮。蹇淹留而無成。

悲憂窮蹙兮。獨處廓。有美一人兮。心不釋。去鄉離家兮。來遠客。超逍遙兮。今焉薄。專思君兮。不可化。君不知兮。可奈何。蓄怨兮。積思。心煩懣兮。忘食事。願一見兮。道余意。君之心兮。與余異。車駕兮。竭而歸。不得見兮。心悲。倚結軫兮。太息。涕潺湲兮。霑軾。慷慨絕兮。不得中。瞽亂兮。迷惑。私自憐兮。何極。心忼忼兮。諒直。皇天平分四時兮。竊獨悲此凜秋。白露既下降百草兮。奄離披此梧楸。去白日之昭昭兮。襲長夜之悠悠。離芳藹之方壯兮。余委約而悲愁。秋既先戒以白露兮。冬又申之以嚴霜。收恢台之孟夏兮。然坎澌而沈藏。葉菸邑而無色兮。枝煩拏而交橫。顏淫溢而將罷兮。柯髣髴而委黃。薊櫛慘之可哀兮。形銷鑠而瘵傷。惟其紛糅而將落兮。恨其失時而無當。擘騏驎而下節兮。聊逍遙以相羊。歲忽忽而逾盡兮。恐余壽之弗

將悼余生之不時兮。逢此世之侂攘。澹容與而獨倚兮。蟋蟀鳴此西堂。心怵惕而震盪兮。何所憂之多方。仰明月而太息兮。步列星而極明。

竊悲夫蕙華之曾敷兮。紛旖旎乎都房。何曾華之無實兮。從風雨而飛颺。以爲君獨服此蕙兮。嗟無以異於衆芳。閔奇思之不通兮。將去君而翱翔。心閔憐之慘悽兮。願一見而有明。重無怨而生離兮。中結軫而增傷。豈不鬱陶而思君兮。君之門以九重。猛犬狺狺而迎吠兮。關梁閉而不通。皇天淫溢而秋霖兮。后土何時而得乾。塊獨守此無澤兮。仰浮雲而永歎。

何時俗之工巧兮。背繩墨而改錯。却騏驥而不乘兮。策駑駘而取路。當世豈無騏驥兮。誠莫之能善御。見執轡者非其人兮。故駟馳而遠去。鳧雁皆喙夫梁藻兮。鳳愈飄翔而高舉。圓鑿而方枘兮。吾固知其鉏鋸而難入。衆鳥皆有所登棲兮。鳳獨遑遑而無所集。願銜枚而無言兮。嘗被君之渥洽。太公九十乃顯榮兮。誠未遇其匹合。謂騏驥兮安歸。謂鳳皇兮安棲。變古易俗兮世衰。今之相者兮舉肥。騏驥伏匿而不見兮。鳳皇高飛而不下。鳥獸猶知懷德兮。何云賢士之不處。驥不驟進而求服兮。鳳亦不貪餒而妄食。君棄遠而不察兮。雖願忠其焉得。欲寂寞而絕端兮。竊不敢忘初之厚德。獨悲愁其傷人兮。馮鬱鬱其何極。

霜露慘悽而交下兮。心尙忝其弗濟。霰雪雰糅其增加兮。乃知遭命之將至。願徼幸而有待兮。汨莽莽與壘草同死。願自直而徑往兮。路壅絕而不通。欲循道而平驅兮。又未知其所從。然中路而迷惑兮。自厭按而學誦。性愚陋以褊淺兮。信未達乎從容。竊美申包胥之氣晟兮。恐時世之不固。何時俗之工巧兮。滅規槩而改鑿。獨耿介而不隨兮。願慕先置之遺教。處濁世而顯榮兮。非余心之所樂。與其無義而有名兮。寧

窮處而守高。食不媮而爲飽兮。衣不苟而爲溫。竊慕詩人之遺風兮。願託志乎素餐。蹇充倔而無端兮。汨莽莽而無垠。無衣裘以御冬兮。恐溘死而不得見乎陽春。

靚杪秋之遙夜兮。心繚悞而有哀。春秋遼遼而日高兮。然惆悵而自悲。四時遞來而卒歲兮。陰陽不可與儷偕。白日晼晚其將入兮。明月銷鑠而滅毀。歲忽忽而適盡兮。老冉冉而愈弛。心搖悅而日委兮。然怊悵而無冀。中惛惻之悽愴兮。長太息而增歎。年洋洋以日往兮。老嶮廓而無處。事亶亶而覬進兮。蹇淹留而躊躇。

何汜濫之浮雲兮。焱癰蔽此明月。忠昭昭而願見兮。然露晞而莫達。願皓日之顯行兮。雲蒙蒙而蔽之。竊不自料而願忠兮。或黜黜而汙之。堯舜之抗行兮。瞭冥冥而薄天。何險巇之嫉妒兮。被以不慈之僞名。彼日月之昭明兮。尙黯黩而有瑕。何況一國之事兮。亦多端而膠加。被荷綯之晏晏兮。然潢洋而不可帶。旣驕美而伐武兮。負左右之耿介。憎愠愉之修美兮。好夫人之慷慨。衆蹊蹠而日進兮。美超遠而逾邁。農夫輟耕而容與兮。恐田野之蕪穢。事緜緜而多思兮。竊悼後之危敗。世雷同而眩曜兮。何毀譽之昧昧。今修飾而窺鏡兮。後尙可以竄藏。願寄言夫流星兮。羌儵忽而難當。卒癰蔽此浮雲兮。下暗漠而無光。

堯舜皆有所舉任兮。故高枕而自適。諒無怨於天下兮。心焉取此怵惕。棄騏驥之瀏瀏兮。馭安用夫彊策。諒城郭之不足恃兮。雖重介之何益。遭翼翼而無終兮。饨惛惛而愁約。生天地之若過兮。功不成而無效。願沈滯而不見兮。尙欲布名乎天下。然潢洋而不遇兮。直恂愁而自苦。莽洋洋而無極兮。忽翱翔之焉薄。國有驥而不知乘兮。焉皇皇而更索。寧戚謳於車下兮。桓公聞而知之。無伯樂之善相兮。今誰使乎譽之。

罔流涕以聊慮兮。惟著意而得之。紛饨饨而願忠兮。妒被離而鄣之。願賜不肖之軀而別離兮。放游志乎雲中。稟精氣之搏搏兮。驚諸神之湛湛。驂白霓之習習兮。歷羣靈之豐豐。左朱雀之茈茈兮。右蒼龍之躍躍。屬雷師之闐闐兮。通飛廉之衙衙。前輕鯨之鏘鏘兮。後輜乘之從從。載雲旗之委蛇兮。扈屯騎之容容。計專專之不可化兮。願遂摧而爲臧。賴皇天之厚德兮。還及君之無恙。

惜誓 賈誼

惜余年老而日衰兮。歲忽忽而不反。登蒼天而高舉兮。歷衆山而日遠。觀江河之紆曲兮。離四海之霑濡。攀北極而一息兮。吸沆瀣以充虛。飛朱鳥使先驅兮。駕太乙之象輿。蒼龍蚴虬於左驂兮。白虎騁而爲右駟。建日月以爲蓋兮。載玉女於後車。馳騫於杳冥之中兮。休息乎崑崙之墟。樂窮極而不厭兮。願從容乎神明。涉丹水而馳騁兮。右大夏之遺風。黃鵠之一舉兮。知山川之紆曲。再舉兮。睹天地之圓方。臨中國之衆人兮。託回鶻乎尙羊。乃至少原之壅兮。赤松王喬皆在旁。二子擁瑟而調均兮。余因稱乎清商。澹然而自樂兮。吸衆氣之翱翔。念我長生而久僊兮。不如反余之故鄉。黃鵠後時而寄處兮。鷓鴣羣而制之。神龍失水而陸居兮。爲螻蟻之所裁。夫黃鵠神龍猶如此兮。況賢者之逢亂世哉。壽冉冉而日衰兮。固儻回而不息。俗流從而不止兮。衆枉聚而矯直。或偷合而苟進兮。或隱居而深藏。苦稱量之不審兮。同權概而就衡。或推迤而苟容兮。或直言之諤諤。傷誠是之不察兮。并紉茅絲以爲索。方世俗之幽昏兮。眩白黑之美惡。放山淵之龜玉兮。相與貴夫礫石。梅伯數諫而至醢兮。來革順志而用國。悲仁人之盡節兮。反爲小人之所賊。比干忠諫而剖心兮。箕子被髮而佯狂。水背流而源竭兮。木去根而不長。非重軀以慮難兮。惜傷

身之無功已矣哉。獨不見夫鸞鳳之高翔兮，乃集大皇之壑。循四極而回周兮，見盛德而後下。彼聖人之神德兮，遠濁世而自藏。使麒麟可得羈而係兮，又何以異乎犬羊。

招隱士 劉安

桂樹叢生兮山之幽，偃蹇連卷兮枝相繚。山氣曠惚兮石嵯峨，谿谷嶄巖兮水增波。緩狝羣嘯兮虎豹嘯，攀援桂枝兮聊淹留。王孫遊兮不歸，春草生兮萋萋。歲暮兮不自聊，蟪蛄鳴兮啾啾。塊兮軋，山曲岌兮心淹留兮洞荒忽，罔兮沕。僚兮慄，虎豹呿。叢薄深林兮人上慄，嶽嶮碣礧兮碣礧。樹輪相糾兮林木芟斲，青莎雜樹兮蘋草霍靡。白鹿麕麇兮或騰或倚，狀貌嶮嶮兮峨峨。淒淒兮漉漉，瀾猴兮熊羆。慕類兮以悲，攀援桂枝兮聊淹留。虎豹鬪兮熊羆咆，禽獸駭兮亡其曹。王孫兮歸來，山中兮不可以久留。

反離騷 揚雄

有周氏之嬋媯兮，或鼻祖於汾隅。靈宗初諜伯僑兮，流于末之楊侯。淑周楚之豐烈兮，超旣離乎皇波。因江潭而泚記兮，欽弔楚之湘纍。惟天軌之不辟兮，何純絜而離。紛紛纍纍以其渙忽兮，暗纍以其繽紛。漢十世之陽朔兮，招搖紀於周正。正皇天之清則兮，度后土之方貞。圖纍承彼洪族兮，又覽纍之昌辭。帶鈎矩而佩衡兮，履欂櫨以爲棊。纍初貯厥麗服兮，何文肆而質籬。資姬娃之珍鬢兮，鬻九戎而索賴。鳳凰翔於蓬階兮，豈駕鵝之能捷。騁驂騶以曲躄兮，驢騾連蹇而齊足。枳棘之榛榛兮，蝮豸擬而不敢下。靈修旣信椒蘭之嗟佞兮，吾纍忽焉而不蚤睹。衿芰茄之綠衣兮，被芙蓉之朱裳。芳酷烈而莫聞兮，固不如蘘而幽之離房。閨中容競綽約兮，相態以麗佳。知衆媻之嫉妒兮，何必颺纍之蛾眉。懿神龍之淵潛兮，埃慶雲而

將舉。亡春風之被離兮。孰焉知龍之所處。愍吾纍之衆芳兮。颺燁燁之芳苓。遭季夏之凝霜兮。慶天頼而
喪榮。橫江湖以南漭兮。云走乎彼蒼梧。馳江潭之汎溢兮。將折衷乎重華。舒中情之煩或兮。恐重華之不
纍與。陵陽侯之素波兮。苦吾纍之獨見許。精瓊靡與秋菊兮。將以延夫天年。臨汨羅而自隕兮。恐日薄於
西山。解扶桑之總轡兮。縱令之遂奔馳。鸞皇騰而不屬兮。豈獨飛廉與雲師。卷薜芷與若蕙兮。臨湘淵而
投之。棍申椒與菌桂兮。赴江湖而漚之。費椒稭以要神兮。又勤索彼瓊茅。違靈氛而不從兮。反湛身於江
皋。纍旣刈夫傳說兮。奚不信而遂行。徒恐鸚鵡之將鳴兮。顧先百草爲不芳。初纍棄彼處妃兮。更思瑤臺
之逸女。抨雄鳩以作媒兮。何百離而曾不壹耦。乘雲輓之旖旎兮。望崑崙以穆流。覽四荒而顧懷兮。奚必
云女彼高邱。旣仁鸞車之幽藹兮。焉駕八龍之委蛇。臨江瀕而掩涕兮。何有九招與九歌。夫聖哲之不遭
兮。固時命之所有。雖增欷以於邑兮。吾恐靈修之不纍改。昔仲尼之去魯兮。萋萋遲遲而周邁。終回復於
舊都兮。何必湘淵與濤瀨。溷漁父之舖歎兮。絜沐浴之振衣。棄由聃之所珍兮。蹠彭咸之所遺。

釋疾文 井序 盧照鄰

余羸臥不起。行已十年。宛轉匡牀。婆娑小室。未攀偃蹇桂。一臂連蜷。不學邯鄲步。兩足匍匐。寸步千里。咫
尺山河。每至冬謝春歸。暑闌秋至。雲壑改色。煙郊變容。輒輿出戶庭。悠然一望。覆燾雖廣。嗟不容乎此生。
亭育雖繁。恩已絕乎斯代。賦命如此。幾何可憑。今爲釋疾文三篇。以貽諸好事。蓋作易者。其有憂患乎。刪
書者。其有栖遑乎。國語之作。非瞽叟之事乎。騷文之興。非懷沙之痛乎。吾非斯人之徒歟。安可默而無述。
故作頌曰。

粵若

粵若稽古帝烈山兮。遠矣大矣。臣太岳兮。欽哉良哉。有太公兮。卷舒龍豹。奄經營乎四履。有先生兮。乘騎日月。期汗漫乎九垓。尙書抗節兮。屬炎靈之道喪。中郎含章兮。遇金行之綱頽。彼聖賢之相續。信古往而今來。人何代而不貴。代何人而不才。鬱律蝸吻兮。似崑陵之玉石。泮渙粲爛兮。象星漢之昭回。爾其爲廣也。碧海雲蒸而地合。爾其爲峻也。赤城霞起而天開。暨中朝之顛覆。家不墜乎良箕。紹金柯而玉秀。穆蘭馨而菊滋。彌九葉而逮余兮。代增麗以光熙。清風振乎終古。妙譽薰乎當時。皇考度予以弄璋兮。肇錫予以嘉詞。名余以照鄰兮。字余以昇之。余幼服此殊惠兮。遂閱禮而聞詩。于是裹糧尋師。褰裳訪古。探舊篆于南越。得遺書于東魯。意有缺而必刊。簡無文而咸補。入陳適衛。百舍不厭其栖遑。累匱重胝。千里不辭于勞苦。旣而屠龍適就。刻鵠初成。下筆則煙飛雲動。落紙則鸞迴鳳驚。通李膺而竊價。造張華而假名。郭林宗聞而心服。王夷甫見而神傾。俯仰談笑。顧盼縱橫。自謂明主以令僕相待。朝廷以黃散爲輕。及觀國之光。利用賓王。謁龍旗于武帳。揮鳳藻于文昌。先朝好史。予方學于孔墨。今上好法。予晚受乎老莊。彼圓鑿而方枘。吾知齟齬而不當。是時也。天子案劍。方有事于八荒。駕風輪而梁弱水。飛日馭而苑扶桑。戈船萬計兮。連屬鐵騎千羣兮。啓行文臣鼠竄。猛士鷹揚。故吾甘栖栖以赴蜀。分默默以從梁。其後雄圖甫畢。登封禮日。方欲訪高議于雲臺。考奇文于石室。銷兵車兮。爲農器。休牛馬兮。崇儒術。屢下蒲帛之書。值余有幽憂之疾。蓋有才無時。亦命也。有時無命。亦命也。時也。命也。自前代而痛諸道之乖也。則賢人君子伏斧鑕而不暇。時之來也。則屠夫餓隸作王侯而有餘。三仁猖狂兮。爲奴爲戮。八子狼狽兮。爲醢爲菹。長劍

以搗。尙想華亭之鶴。孤舟欲近。遙憶閭門之魚。史遷下于蠶室。鄧艾徵于檻車。康旣幽而媿孫登。宣屢困而慚寧蘧。固其閉門少事。蹈滄海而辭組。開卷獨得。歸茂陵而著書。起清流之浩漫。長願嗟乎靈胥。重曰。積怨兮累息。茹恨兮吞悲。怨復怨兮。坎壈乎今之代。愁莫愁兮。侘傺乎斯之時。皇穹何親兮。誕而生之。后土何私兮。鞠而育之。何故邀余以好學。何故假余以多辭。何余慶之不終兮。當中路而廢之。彼有初而鮮克兮。賢者其猶不欺。況陶鈞之象物。胡不貞而諒之。豈其始終爽德。蒼黃變色。無心意乎簪履。有悲哀乎楊墨。已焉哉。天蓋高兮不可問。地蓋廣兮不容人。鐘鼓玉帛兮非吾事。池臺花鳥兮非我春。寂兮寞兮。歲歲年年。長少樂。慌兮惚。朝朝暮暮。生白髮。愴怳憤恨兮。無所見。宛轉聯蹠兮。獨向隅。狀若重狴圓扉之受綫。又似乾池涸井之相濡。鸞鳳之翮已鍛兮。徒奮迅于籠檻。騏驥之足已蹇兮。空悵望于延衢。龍門之桐半死。鄧林之木全枯。苟含情而稟氣兮。孰能不傷心而疾首乎。歌曰。歲將晏兮。歡不再。時已晚兮。憂來多。東郊絕此麒麟筆。西山祕此鳳凰柯。死去死去今如此。生兮生兮奈汝何。

悲夫

悲夫。事有不可得而已矣。是以古之聽天命者。飲淚含聲而就死。推不言兮。焚于介山。妃不偶兮。跂於嶷水。仰天而歎。員憤骨于吳江。下淚交頤。卿悲歌于燕市。天無雷兮。聞蟻聚于牀下。家非牧兮。見梓生于奧裏。支離疏之五官已敗。哀鮒它之六骸不美。求時夜兮。求鴟炙。何逼迫之如此。爲鼠肝兮。爲蟲臂。何煨煉之如彼。鬱拂洩滑兮。中瞽亂。蟠薄煩冤兮。長恨惋。出戶庭兮。遊息。千萬里兮。無極。杳兮靄。川綿曠兮。水如帶。嶼兮籟。山嶸螺兮。雲以蓋。萋兮綠。春草生兮。長河曲。試一望兮。心斷續。晚兮晚。夕鳥沒兮。平郊遠。試一

望兮魂不返。薜蘿葉兮紫蘭香。欲往從之川無梁。日云暮兮涕沾裳。松有蘿兮桂有枝。有美一人兮君不知。氣欲絕而何爲。孟夏兮恢台。楊柳散兮芙蓉開。葉初成兮蠶宛轉。花落盡兮燕徘徊。望夫君兮不來。形枯槁兮意摧頽。天何爲兮愁苦。麥將秀兮多風。梅將黃兮屢雨。日色旰爛兮流金。而爍石地氣燠煜兮滿室。而充斥神翳翳兮似灰。命綿綿兮若縷。一伸一曲兮比艱難乎尺蠖。九生九死兮同變化乎盤古。萬物繁茂兮此時。余獨何爲兮。腸邇迴而屢腐。圍棋廢兮時不可兮再來。鳴琴停兮人何時以重撫。秋風起兮野蒼蒼。蒹葭變兮露爲霜。蟬悲翳兮聲斷。雁迷雲兮路長。摧折蕭條兮林寡色。顛顛芸黃兮草不芳。停劍兮懷舊友。天外兮思故鄉。願一見兮終不得。側身長望兮淚浪浪。遙兮遠山谷縈迴兮屢轉。狀若登薊門兮望胡苑。斷兮連井邑邱墟兮知幾年。又似登隴首兮見秦川。木葉落兮長年悲。紅顏謝兮鬢如絲。王孫來兮何遲遲。思公子兮涕漣漣。風嫋嫋兮雨淒淒。螢火飛兮烏夜啼。牽牛西北兮星已轉。織女縱橫兮河欲低。秋夜迢迢兮秋未極。愁人耿耿兮愁不息。有所思兮在天漢。欲往從之兮無羽翼。鬱金槐兮木蘭舟。青莎裳兮白羽裘。戲綠波兮坐芳洲。歡不停兮人不留。悵容與兮徒離憂。元冬慘兮陰氣凝。沸泉結兮炎洲冰。郊野昏兮寒沙漲。河海暗兮繁雲興。嚴風急兮密雪下。墜戶閉兮無留者。盼城郭兮瓊爲樹兮玉爲樓。瞻通路兮駕素車兮乘白馬。時眇眇兮歲冥冥。晝杳杳兮夜丁丁。庭有霜兮月華白。室無人兮燈影青。披重衾兮魂悄悄。臥空牀兮目熒熒。御燠爐兮長不暖。對卮酒兮憂恆滿。悲繚繞兮從中來。愁纏綿兮何時斷。重曰。四時兮代謝。萬物兮遷化。聽春鳥于春朝。聞秋蟲于秋夜。花覆地兮無待。河傾天兮不借。無靈草兮駐朽質乎千年。無雕戈兮迴跋烏乎三舍。夏日長兮繩繩。炎風暑雨兮相蒸。草木扶疏兮如此。余獨

蘭單兮不自勝。元月兮祁寒。窮急景兮摧殘。霰雪冱冱兮長委積。人事寥寥兮悵漫漫。春秋冬夏兮四序。寒暑榮悴兮萬端。春也萬物熙熙焉。感其生而悼其死。夏也百草榛榛焉。見其盛而知其闌。秋也嚴霜降兮。殷憂者爲之不樂。冬也陰氣積兮。愁顏者爲之鮮歡。聖人知性情之紛糾。故歎之曰。予欲無言。吾將焉往而適耳。箕有峯兮。穎有瀾。歌曰。歲去憂來兮。東流水。地久天長兮。人共死。明鏡羞窺兮。向十年。駿馬停驅兮。幾千里。麟兮鳳兮。自古吞恨無已。

命曰

命曰。昊天不傭兮。降此鞠誥。昊天不惠兮。降此大戾。不先不後兮。爲瘡爲療。痛之撫兮。孰知其厲。木之柔兮。緝之絲之。人之溫兮。黼之藻之。自天佑之兮。無不利。一者之來兮。云何二。野有鹿兮。其角旒旒。林有鳥兮。其羽習習。余獨何爲兮。悲攢纒兮。憂戢蓄。南山龍嵒兮。樹輪囷。北津清泚兮。石嶙嶙。天之生我兮。胡寧不辰。少克己而復禮。無終日兮。違仁。旣好之以正直兮。諒無負于神明。何彼天之不弔兮。哀此命之長勤。百罹兮。六極橫集兮。我身長攀圈以偃蹇。永伊鬱以呻嘔。天道何從。自古多印。爲臧兮。匪祐。匪仁兮。覆庸。躑狼戾兮。南汜。跖叛渙兮。東峯。并強大兮。薰赫。咸壽考以從容。助則天兮。朱已矣。韶盡美兮。均忽焉。公侯之系兮。必復。堯舜之後兮。何憊。干執諫兮。辛載。蕃抗議兮。靈年。忠於貞兮。何仇。俱不得其死焉。牛一變而爲虎。鼈三化而作鵠。觸氏居蝸而爭地。龍伯釣鼈而訴天。何變化之殊俗。而大小之相懸。長無述焉。將不死而爲賊。賢哉回也。今不幸而早亡。明夷何辜兮。羨里。洪範何恃兮。佯狂。我視于天兮。亦孔之將。孔與溺兮。殊貫。單與叔兮。相詭。紛紜總總兮。若茲。羌未得其元已。盛之孝兮。姚何感而遂開。合之恭兮。昆何嫌兮。

不起。聖人不議。姬旦憤于鷓鴣。君子無憂。周南歌于芣苢。五鹿云折。退守平陵之田。三都已成。歸入宜春之里。乾不穆兮。一爲戌。一爲辰。坤不恆兮。三成田。三成水。何斯柱之危脆。一夫觸之。而云折。東西眇其既傾。西北豁其中裂。有杞者國。竟未掬其烏蟾。有歷其都。奄以成其魚鼈。共何壯兮。而損其盈。媧何神歟。而補其闕。天且不能自固。地且不能自持。安得而育萬物。安得而運四時。彼山川與象緯。其孰爲之。主司生也。既無其主。死也。云其告誰。何必拘拘而跼跼。固可浩然而順之。吾知惡之。不能爲惡。故去之。曰羣生之所蠱。吾知善之。不能爲善。故就之。曰有生之大路。雖粉骨而糜軀。終不改乎此度。重曰。予既昧此杳冥兮。迷之不知其所屆。將寄命于六師。訪真訣乎遐外。建流星以爲期。邀白雲而爲蓋。玉虬紛其旖旎。青鸞儼其容裔。霓爲裳兮。羽爲旗。雷爲車兮。電爲旆。噶噶兮。上馳。遙遙兮。橫厲。忽若夢兮。有覺。與巫陽兮。相會。巫陽爲予兮。潔龜。龜告予以雙支。朱雀搖而金躍。青龍發而火馳。虵登樓兮。雞入穴。雲北走兮。水西垂。巫陽曰。反兮。覆兆不告。靈蔡誠不能知造化之心數。朽骨焉足以定古今之倚伏。請導列缺之前旌。陪豐隆之後轂。披上帝之元鍵。考中皇之祕籙。于是排雲旌兮。叫諸闕。登紫翠兮。伏瑤壇。靈烏杲其將駕。東皇釐其既觀。余敷衽而未決兮。東皇頷而不言。玉女申之以瓊蘂。靈妃貺之以琅玕。悵容與而不駐。肅雲駟于南軒。窈窕徘徊。邈矣悠哉。下臨兮。星雨。上絕兮。氛埃。彷徨兮。三清之館。縹緲兮。八風之臺。俯觀兮。故國。洞崢嶸兮。無極。長懷兮。故人。涕潺湲兮。霑軾。橫天苑。歷北辰。經瑤樓兮。一息。停余車之鱗鱗。涉明河之深淺。過織女而問津。巫陽曰。左招搖兮。右天駟。太一之居兮。無不利。其道也。楓爲天兮。棗爲地。盍往從之兮。導君意。太乙方握髻。低眉。右手拄頤。或以日臨命。以歲加時。再轉兮。再考。三命兮。三推。華蓋微明兮。君子居貞。

之位。太陽陰主兮。天人厄運之期。若夫一氣鴻濛。萬化緇釐。此星精與木局。又何足以知之。巫陽曰。太上
 有老君焉。其名曰伯陽。遊閬風之瓊圃。處倒景之琳堂。披拂日月。咀嚼煙霜。撫千載兮爲朝。爲暮。濟萬物
 兮若存若亡。古之聰明博達而不死者。將與君子造崑崙之大荒。迨而容與。弭節翱翔。俄參元而下降。濟
 弱水之湯湯。隣軒臺而右轉。對玉檻之鏘鏘。伯陽欣然見予曰。昇之來何遲。何故疲憊之如是。何故枯槁
 之若茲。吾適以爾小別。今將千二百期。昔者爾爲翟。吾固知爾潔潔焉。無益其後。爾爲舟。吾欲告爾休休
 焉。不留名已登乎仙格。爾身尙蹇乎中州。噫哉。甚可痛。甚可哭。多智也。命之斧斤。多才也。身之桎梏。爾形
 體之在地也。每矍矍然求媒。精魂之於天也。又遑遑焉訪卜。何異儀丹鳳于膠柱。飼元魚于森木。何晚悟
 之透迤。何早計之穀觶。嗚呼。何異喪其親也。揭竿而求諸海。失其子也。擊鼓而訪諸道。途之遠矣。曷其云
 蘇。與影捕逐。可不謂悲乎。夫道之動也。翫翫狺狺。靜也。若喪若失。矐兮。不以死生爲二塊兮。若以天地爲
 一。生於萬物之後。不爲緩。死於太古之前。不爲疾。弊萬類也。不謂之凶。利四海也。不謂之吉。夫如是。則巨
 浸稽天而不溺。鴻災治地而不然。生死不能爲其壽夭。變化適足寄其騰遷。化而爲魚也。則躍龍門而橫
 碣石。化而爲鳥也。則培羊角而負青天。爲社也。則長無斤斧之患。爲瓠也。則汎乎泱泱之川。物無可而不
 可。何必守固以拳拳。余於是乎嗒然而喪其偶。倏爾而失其知。思故池之淥水。憶中園之桂枝。栩栩然若
 有得。茫茫然若有亡。歎彷徨兮覺悟。魂已歸于北鄉。其往也。人皆爲之避席。其返也。鳥不爲之亂行。歌曰。
 茨山有薇兮。潁水有漪。夷爲柏兮。秋有實。叔爲柳兮。春雨飛。倏爾而笑。汎浪兮不歸。

操

醉翁操 并序 蘇軾

琅邪幽谷山水奇麗。泉鳴空澗。若中音會。醉翁喜之。把酒臨聽。輒欣然忘歸。既去十餘年。而好奇之士沈遵聞之。往遊。以琴寫其聲。曰醉翁操。節奏疎實。而音指華暢。知琴者以爲絕倫。然有其聲而無其辭。翁雖爲作歌。而與琴聲不合。又依楚詞作醉翁引。好事者亦倚其詞以製曲。雖粗合均度。而琴聲爲詞所繩約。非天成也。後三十餘年。翁旣捐館舍。而遵亦沒久矣。有廬山玉澗道人崔閑。特妙於琴。恨此曲之無詞。乃譜其聲。而請於東坡居士以補之云。

琅然清圓。誰彈響應。空山無言。惟醉翁中。知其天。月明風露娟娟。人未眠。荷蕢過山前。曰有心也哉此賢。醉翁嘯詠聲和流泉。醉翁去後。空有朝吟夜怨。山有時而童顛。水有時而回困。思翁無歲年。翁今爲飛仙。此意在人間。試聽徽外三兩絃。

辭賦類

七

七發 枚乘

楚太子有疾。而吳客往問之。曰。伏聞太子玉體不安。亦少閒乎。太子曰。憊。謹謝客。客因稱曰。今時天下安寧。四字和平。太子方富於年。意者久耽安樂。日夜無極。邪氣襲逆。中若結轆。紛屯澹淡。噓唏煩醒。惕惕怵怵。臥不得瞑。虛中重聽。惡聞人聲。精神越渫。百病咸生。聰明眩曜。悅怒不平。久執不廢。大命乃傾。太子豈

有是乎。太子曰：謹謝客，賴君之力，時時有之，然未至於是也。客曰：今夫貴人之子，必宮居而閨處，內有保母，外有傅父，欲交無所，飲食則溫淳甘膩，腥醲肥厚，衣裳則雜暹曼煖燂，燂燂熱暑，雖有金石之堅，猶將銷鑠而挺解也。況其在筋骨之間乎哉？故曰：縱耳目之欲，恣支體之安者，傷血脉之和。且夫出輿入輦，命曰：蹙痿之機；洞房清宮，命曰：寒熱之媒；皓齒蛾眉，命曰：伐性之斧；甘脆肥膿，命曰：腐腸之藥。今太子膚色靡曼，四支委隨，筋骨挺解，血脉淫濯，手足墮窳，越女侍前，齊姬奉後，往來游醺，縱恣于曲房，隱閒之中，此甘餐毒藥，戲猛獸之爪牙也。所從來者至深遠，淹滯永久而不廢，雖令扁鵲治內，巫咸治外，尙何及哉？今如太子之病者，獨宜世之君子，博見強識，承閒語事，變度易意，常無離側，以爲羽翼，淹沈之樂，浩唐之心，遁佚之志，其奚由至哉？太子曰：諾。病已，請事此言。

客曰：今太子之病，可無藥石針刺灸療而已，可以要言妙道說而去也，不欲聞之乎？太子曰：僕願聞之。客曰：龍門之桐，高百尺而無枝，中鬱結之輪困，根扶疏以分離，上有千仞之峯，下臨百丈之谿，湍流遡波，又澹淡之，其根半死半生，冬則烈風漂霰，飛雪之所激也；夏則雷霆霹靂之所感也。朝則鸞黃鵠鳴焉，暮則羈雌迷鳥宿焉，獨鵠晨號乎其上，鷓鴣哀鳴翔乎其下。於是背秋涉冬，使琴摯斫斬以爲琴，野繭之絲以爲絃，孤子之鈎以爲隱，九寡之珥以爲約，使師堂操暢，伯子牙爲之歌。歌曰：麥秀蘄兮雉朝飛，向虛壑兮背槁槐，衣絕區兮臨迴溪，飛鳥聞之，翕翼而不能去；野獸聞之，垂耳而不能行；蛟螭螻蟻聞之，拄喙而不能前。此亦天下之至悲也。太子能強起聽之乎？太子曰：僕病未能也。

客曰：物牛之腴，菜以筍蒲，肥狗之和，冒以山膚，楚苗之食，安胡之飴，搏之不解，一啜而散，於是使伊尹煎

熬易牙調和。熊蹯之臠。勺藥之醬。薄耆之炙。鮮鯉之膾。秋黃之蘇。白露之茹。蘭英之酒。酌以滌口。山梁之
餐。豢豹之胎。小飴大歡。如湯沃雪。此亦天下之至美也。太子能彊起嘗之乎。太子曰。僕病未能也。
客曰。鍾岱之牡。齒至之車。前似飛鳥。後類距虛。糴麥服處。躁中煩外。羈堅轡。附易路。於是伯樂相其前後。
王良造父爲之御。秦缺樓季爲之右。此兩人者。馬佚能止之。車覆能起之。於是使射千鎰之重。爭千里之
逐。此亦天下之至駿也。太子能彊起乘之乎。太子曰。僕病未能也。
客曰。旣登景夷之臺。南望荆山。北望汝海。左江右湖。其樂無有。於是使博辯之士。原本山川。極命草木。比
物屬事。離辭連類。浮游覽觀。乃下置酒於虞懷之宮。連廊四注。臺城層構。紛紜玄綠。輦道邪交。黃池紆曲。
溷章白鷺。孔鳥鷓鴣。鷓鴣鵲。翠鬣紫纓。螭龍德牧。邕邕羣鳴。陽魚騰躍。奮翼振鱗。溘溘壽蓼。蔓草芳苓。
女桑河柳。素葉紫莖。苗松豫章。條上造天。梧桐并閭。極望成林。衆芳芬鬱。亂於五風。從容猗靡。消息陽陰。
列坐縱酒。蕩樂娛心。景春佐酒。杜連理音。滋味雜陳。肴糅錯該。練色娛目。流聲悅耳。於是乃發激楚之結。
風。揚鄭衛之皓樂。使先施徵舒。陽文段干。吳娃閭姬。傳予之徒。雜裾垂髻。目窕心與。掄流波。雜杜若。蒙清
塵。被蘭澤。嬾服而御。此亦天下之靡麗皓侈。廣博之樂也。太子能彊起游乎。太子曰。僕病未能也。
客曰。將爲太子馴騏驥之馬。駕飛輪之輿。乘牡駿之乘。右夏服之勁箭。左烏號之彫弓。游涉乎雲林。周馳
乎蘭澤。弭節乎江潯。掩青蘋。游清風。陶陽氣。蕩春心。逐狡獸。集輕禽。於是極犬馬之才。困野獸之足。窮相
御之智巧。恐虎豹。懼鷲鳥。逐馬鳴鑣。魚跨麋角。履游麇兔。蹈踐麋鹿。汗流沫墜。寃伏陵窘。無創而死者。固
足充後乘矣。此校獵之至壯也。太子能彊起游乎。太子曰。僕病未能也。然陽氣見於眉宇之間。侵淫而上。

幾滿大宅。

客見太子有悅色。遂推而進之曰。冥火薄天。兵車雷運。旂旗偃蹇。羽毛肅紛。馳騁角逐。慕味爭先。徼墨廣博。觀望之有圻。純粹全犧。獻之公門。太子曰善。願復聞之。客曰。未既。於是榛林深澤。煙雲闔莫。兕虎並作。毅武孔猛。袒裼身薄。白刃磴磴。矛戟交錯。收獲掌功。賞賜金帛。掩蘋肆若。爲牧人席。旨酒嘉肴。羞魚膾炙。以御賓客。涌觸並起。動心驚耳。誠必不悔。決絕以諾。貞信之色。形于金石。高歌陳唱。萬歲無斃。此真太子之所喜也。能強起而游乎。太子曰。僕甚願從。直恐爲諸大夫累耳。然而有起色矣。

客曰。將以八月之望。與諸侯遠方交游兄弟。並往觀濤乎。廣陵之曲江。至則未見濤之形也。徒觀水力之所到。則卹然足以駭矣。觀其所駕軼者。所擢拔者。所揚汨者。所溫汾者。所滌汔者。雖有心略辭給。固未能縷形其所由然也。况兮忽兮。聊兮慄兮。混汨汨兮。忽兮慌兮。俶兮儻兮。浩瀦瀦兮。慌曠曠兮。秉意乎南山。通望乎東海。虹洞兮蒼天。極慮乎崖涘。流攬無窮。歸神日母。汨乘流而下降兮。或不知其所止。或紛紜其流折兮。忽繆往而不來。臨朱汜而遠逝兮。中虛煩而益怠。莫離散而發曙兮。內存心而自持。於是澡概胸中。灑練五臟。澹澈手足。頽濯髮齒。揄棄恬怠。輸寫澳濁。分決狐疑。發皇耳目。當是之時。雖有淹病滯疾。猶將伸偃起蹙。發瞽披聾。而觀望之也。况直眇小煩。邁醒釀病酒之徒哉。故曰。發蒙解惑。不足以言也。太子曰。善。然則濤何氣哉。

客曰。不記也。然聞於師曰。似神而非者三。疾雷聞百里。江水逆流。海水上潮。山出內雲。日夜不止。衍溢漂疾。波涌而濤起。其始起也。洪淋淋焉。若白鷺之下翔。其少進也。浩浩澄澄。如素車白馬。帷蓋之張。其波涌

而雲亂擾擾焉如三軍之騰裝。其旁作而奔起也。飄飄焉如輕車之勒兵。六駕蛟龍。附從太白。純馳浩蜺。前後駱驛。顛顛印印。楛楛彊彊。莘莘將將。壁壘重堅。沓雜似軍行。訇隱訇礚。軋盤涌裔。原不可當。觀其兩傍。則滂渤怫鬱。閭漠感突。上擊下律。有似勇壯之卒。突怒而無畏。蹈壁衝津。窮曲隨隈。踰岸出追。遇者死當者壞。初發乎或圍之津涯。芟軫谷分。迴翔青篋。銜枚檀桓。引節伍子之山。通厲骨母之場。凌赤岸。簞扶桑。橫奔似雷行。誠奮厥武。如振如怒。沌沌渾渾。狀如奔馬。混混庵庵。聲如雷鼓。發怒崖沓。清升踰趾。侯波奮振。合戰於藉藉之口。鳥不及飛。魚不及迴。獸不及走。紛紛翼翼。波涌雲亂。蕩取南山。背擊北岸。覆虧邱陵。平夷西畔。險險戲戲。崩壞陂池。決勝乃罷。澗汨潺湲。披揚流灑。橫暴之極。魚鼈失勢。顛倒偃側。沈沈浚浚。蒲伏連延。神物恠疑。不可勝言。直使人踣焉洄閤。悽愴焉。此天下恠異詭觀也。太子能強起觀之乎。太子曰。僕病未能也。

客曰。將爲太子奏方術之士。有資略者。若莊周魏牟。楊朱墨翟。便蜎詹何之倫。使之論天下之釋微。理萬物之是非。孔老覽觀。孟子持籌而算之。萬不失一。此亦天下要言妙道也。太子豈欲聞之乎。於是太子據几而起曰。渙乎若一聽聖人辯士之言。忽然汗出。霍然病已。

七啓 并序 曹子建

昔枚乘作七發。傅毅作七激。張衡作七辯。崔駰作七依。辭各美麗。余有慕之焉。遂作七啓。并命王粲作焉。玄微子隱居大荒之庭。飛遜離俗。澄神定靈。輕祿傲貴。與物無營。耽虛好靜。羨此永生。獨馳思於天雲之際。無物象而能傾。於是鏡機子聞而將往說焉。駕超野之駟。乘追風之輿。經迴漠。出幽墟。入乎泱泱之野。

遂屈玄微子之所居。其居也。左激水。右高岑。背洞溪。對芳林。冠皮弁。被文裘。出山岫之潛穴。倚峻崖而嬉遊。志飄飄焉。嶢嶢焉。似若狹六合而隘九州。若將飛而未逝。苦舉翼而中留。於是鏡機子攀葛藟而登距巖而立。順風而稱曰。予聞君子不遜俗而遺名。智士不背世而滅勳。今吾子棄道藝之華。遺仁義之英。耗精神乎虛廓。廢人事之紀經。譬若畫形於無象。造響於無聲。未之思乎。何所規之不通也。玄微子俯而應之曰。噫。有是言乎。夫太極之初。渾沌未分。萬物紛錯。與道俱隆。蓋有形必朽。有跡必窮。芒芒元氣。誰知其終。名穢我身。位累我躬。竊慕古人之所志。仰老莊之遺風。假靈龜以託喻。寧掉尾於塗中。

鏡機子曰。夫辯言之豔。能使窮澤生流。枯木發榮。庶感靈而激神。況近在乎人情。僕將爲吾子說游觀之至娛。演聲色之妖靡。論變化之至妙。敷道德之弘麗。願聞之乎。玄微子曰。吾子整身倦世。探隱拯沈。不遠遐路。幸見光臨。將敬滌耳。以聽玉音。

鏡機子曰。芳菰精粹。霜蓄露葵。玄熊素膚。肥豢臙肌。蟬翼之割。剖纖析微。累如疊穀。離若散雪。輕隨風飛。刃不轉切。山鷄斥鷃。珠翠之珍。寒芳苓之巢龜。膾西海之飛鱗。臞江東之潛鼉。騰漢南之鳴鶉。糝以芳酸。甘和旣醇。玄冥適鹹。薶收調辛。紫蘭丹椒。施和必節。滋味旣殊。遺芳射越。乃有春清縹酒。康狄所營。應化則變。感氣而成。彈徵則苦發。叩宮則甘生。於是盛以翠樽。酌以彫觴。浮蟻鼎沸。酷烈馨香。可以和精神。可以娛腸。此肴饌之妙也。子能從我而食之乎。玄微子曰。予甘藜藿。未暇此食也。

鏡機子曰。步光之劍。華藻繁縟。飾以文犀。彫以翠綠。綴以驪龍之珠。錯以荆山之玉。陸斷犀象。未足稱雋。隨波截鴻。水不漸刃。九旒之冕。散耀垂文。華組之纓。從風紛紜。佩則結綠懸黎。寶之妙微。符采照爛。流景

揚輝黼黻之服。紗縠之裳。金華之鳥。動趾遺光。繁飾參差。微鮮若霜。緄佩綢繆。或彫或錯。薰以幽若。流芳肆布。雍容閑步。周旋馳燿。南威爲之解顏。西施爲之巧笑。此容飾之妙也。子能從我而服之乎。玄微子曰。予好毛褐。未暇此服也。

鏡機子曰。馳騁足用。蕩思游獵。可以娛情。僕將爲吾子駕雲龍之飛駟。飾玉路之繁纓。垂宛虹之長綏。抗招搖之華旂。捷忘歸之矢。秉繁弱之弓。忽躡景而輕鶩。逸奔驥而超遺風。於是磳填谷塞。榛藪平夷。緣山置罝。彌野張罟。下無滿跡。上無逸飛。鳥集獸屯。然後會圍。獠徒雲布。武騎霧散。丹旗燿野。戈殳皓旰。曳文狐。拚狡兔。捎鷓鴣。拂振鷺。當軌見藉。值足遇踐。飛軒電逝。獸隨輪轉。翼不暇張。足不及騰。動觸飛鋒。舉挂輕罟。搜林索險。探薄窮阻。騰山赴壑。風厲焱舉。機不虛發。中必飲羽。於是人稠網密。地逼勢脅。哮闕之獸。張牙奮鬣。志在觸突。猛氣不懼。乃使北宮東郭之疇。生抽豹尾。分裂羶肩。形不抗手。骨不隱拳。批熊碎掌。拉虎摧斑。野無毛類。林無羽羣。積獸如陵。飛翮成雲。於是馘鍾鳴鼓。收旌弛旆。頓綱縱網。罷獠回邁。駿驟齊驤。揚鑿飛沫。俯倚金較。仰撫翠蓋。雍容暇豫。娛志方外。此羽獵之妙也。子能從我而觀之乎。玄微子曰。予樂恬靜。未暇此觀也。

鏡機子曰。閑宮顯敞。雲居皓旰。崇景山之高基。迎清風而立觀。彤軒紫柱。文榭華梁。綺井含葩。金墀玉箱。溫房則冬服絺綌。清室則中夏含霜。華閣緣雲。飛陞陵虛。頰眺流星。仰觀八隅。升龍攀而不逮。眇天際而高居。繁巧神恠。變名異形。班輸無所措其斧斤。離婁爲之失睛。麗草交植。殊品詭類。綠葉朱榮。熙天曜日。素水盈沼。叢木成林。飛翮凌高。鱗甲隱深。於是逍遙暇豫。忽若忘歸。乃使任子垂釣。魏氏發機。芳餌沈水。

輕繳弋飛。落翳雲之翔鳥。援九淵之靈龜。然後采菱華。擢水蘋。弄珠蚌。戲鮫人。諷漢廣之所詠。覲游女於水濱。耀神景於中沚。被輕縠之織羅。遺芳烈而靖步。抗皓手而清歌。歌曰。望雲際兮有好仇。天路長兮往無由。佩蘭蕙兮爲誰修。燕婉絕兮我心愁。此宮館之妙也。子能從我而居之乎。玄微子曰。予耽巖穴。未暇此居也。

鏡機子曰。旣游觀中原。逍遙閑宮。情放志蕩。淫樂未終。亦將有才人妙伎。遺世越俗。揚北里之流聲。紹陽阿之妙曲。爾乃御文軒。臨洞庭。琴瑟交揮。左簾右笙。鍾鼓俱振。簫管齊鳴。然後姣人乃被文縠之華桂。振輕綺之飄飆。戴金搖之熠燿。揚翠羽之雙翹。揮流芳。耀飛文。歷盤鼓。煥繽紛。長裾隨風。悲歌入雲。躡捷若飛。蹈虛遠蹠。凌躍超驤。蜿蟬揮霍。翔爾鴻翥。濺然鳧沒。縱輕體以迅赴。景追形而不逮。飛聲激塵。依違厲響。才捷若神。形難爲象。於是爲歡未溲。白日西頽。散樂變飾。微步中閨。玄眉弛兮鉛華落。收亂髮兮拂蘭澤。形媚服兮揚幽若。紅顏宜笑。睇眇流光。時與吾子攜手同行。踐飛除。卽閑房。華燭爛。幄幙張。動朱唇。發清商。揚羅袂。振華裳。九秋之夕。爲歡未央。此聲色之妙也。子能從我而游之乎。玄微子曰。予願清虛。未暇此遊也。

鏡機子曰。予聞君子樂奮節以顯義。烈士甘危軀以成仁。是以雄俊之徒。交黨結倫。重氣輕命。感分遺身。故田光伏劍於北燕。公叔舉命於西秦。果毅輕斷。虎步谷風。威懾萬乘。華夏稱雄。辭未及終。而玄微子曰。善。

鏡機子曰。此乃游俠之徒耳。未足稱妙也。若夫田文無忌之儔。乃上古之俊公子也。皆飛仁揚義。騰躍道

藝游心無方。抗志雲際。凌轢諸侯。驅馳當世。揮袂則九野生風。慷慨則氣成虹蜺。吾子若當此之時。能從我而友之乎。玄微子曰。予亮願焉。然方於大道。有累如何。

鏡機子曰。世有聖宰。翼帝霸世。同量乾坤。等曜日月。玄化參神。與靈合契。惠澤播於黎苗。威靈震乎無外。超隆平於殷周。踵羲皇而齊泰。顯朝惟清。王道遐均。民望如草。我澤如春。河濱無洗耳之士。喬岳無巢居之民。是以俊乂來仕。觀國之光。舉不遺才。進各異方。讚典禮於辟雍。講文德於明堂。正流俗之華說。綜孔氏之舊章。散樂移風。國富民康。神應休臻。屢獲嘉祥。故甘靈紛而晨降。景星宵而舒光。觀游龍於神淵。聆鳴鳳於高岡。此霸道之至隆。而雍熙之盛際。然主上猶以沈恩之未廣。懼聲教之未厲。采英奇於仄陋。宣皇明於巖穴。此寧子商歌之秋。而呂望所以投綸而逝也。吾子爲太和之民。不欲仕陶唐之世乎。於是玄微子攘袂而興曰。韡哉言乎。近者吾子所述華淫。欲以厲我。祇攬予心。至聞天下穆清明。君莅國。覽盈虛之正義。知頑素之迷惑。今予廓爾。身輕若飛。願反初服。從子而歸。

七命 張協

沖漠公子含華隱曜。嘉遯龍盤。翫世高蹈。游心於浩然。玩志乎衆妙。絕景乎大荒之遐阻。吞響乎幽山之窮奧。於是殉華大夫聞而造焉。乃勅雲輅。驂飛黃。越奔沙。輾流霜。凌扶搖之風。躡堅冰之津。旌拂霄堦。軌出蒼垠。天清冷而無霞。野曠朗而無塵。臨清岫而攬轡。顧石室而迴輪。遂適沖漠之所居。其居也。崢嶸幽藹。蕭瑟虛玄。溟海渾濩。涌其後。嶰谷岬嶒。張其前。尋竹竦莖。蔭其壑。百籟羣鳴。聳其山。衝飄發而迴日。飛礫起而灑天。於是登絕巘。遡長風。陳辯惑之辭。命公子於巖中曰。蓋聞聖人不卷道而背時。智士不遺身

而匿迹。生必耀華名於玉牒。沒則勒洪伐於金冊。今公子違世陸沈。避地獨竄。有生之歡滅。資父之義廢。愁洽百年。苦溢千歲。何異促鱗之游汀滸。短羽之棲翳薈。今將榮子以天人之大寶。悅子以縱性之至娛。窮地而游。中天而居。傾四海之歡。殫九州之腴。鑽屈轂之瓠。解疏屬之拘。子欲之乎。公子曰。大夫不遺。來萃荒外。雖在不敏。敬聽嘉話。大夫曰。寒山之桐。出自太冥。含黃鍾以吐幹。據蒼岑而孤生。既乃瓊巘嶒嶸。金岸崑崙。左當風谷。右臨雲谿。上無凌虛之巢。下無跖實之蹊。搖別峻挺。茗邈茗嶢。晞三春之溢露。遡九秋之鳴飈。零雪寫其根。霏霜封其條。木既繁而後綠。草未素而先彫。於是構雲梯。陟崢嶸。剪蕤賓之陽柯。剖大呂之陰莖。營匠斲其樸。伶倫均其聲。器舉樂奏。促調高張。音朗號鍾。韻清繞梁。追逸響於八風。采奇律於歸昌。啓中黃之少宮。發蓐收之變商。若乃龍火西頽。暄氣初收。飛霜迎節。高風送秋。羈旅懷土之徒。流宕百罹之疇。撫促柱則酸鼻。揮危絃則涕流。若乃追清哇。赴嚴節奏。綠水吐白雪。激楚迴流風。結悲莫莢之朝落。悼望舒之夕缺。瑩釐爲之擗標。孀老爲之嗚咽。王子拂纓而傾耳。六馬噓天而仰秣。此蓋音曲之至妙。子豈能從我而聽之乎。公子曰。余病未能也。

大夫曰。蘭宮祕宇。彫堂綺櫺。雲屏爛汗。瓊壁青葱。應門八襲。璇臺九重。表以百常之闕。圓以萬雉之墉。爾乃嶢榭迎風。秀出中天。翠觀岑青。彫閣霞連。長翼臨雲。飛陞凌山。望玉繩而結極。承倒景而開軒。頽素炳煥。粉拱嵯峨。陰蚪負檐。陽馬承阿。錯以瑤英。鏤以金華。方疏含秀。圓井吐葩。重殿疊起。交綺對幌。幽堂晝密。明室夜朗。集螟飛而風生。尺蠖動而成響。若乃目厭常玩。體倦帷幄。攜公子而雙游。時娛觀於林麓。登翠阜。臨丹谷。華草錦繁。飛采星燭。陽葉春青。陰條秋綠。華實代新。承意恣歡。仰折神籟。俯采朝蘭。遡蕙風。

於衡薄。眷椒塗於瑤壇。爾乃浮三翼。戲中泚。潛鰓駭。驚翰起。沈絲結。飛矰理。挂歸翮於赤霄之表。出華鱗於紫淵之裏。然後縱棹隨風。弭楫乘波。吹孤竹。拊雲和。淵客唱淮南之曲。榜人奏采菱之歌。歌曰。乘鳧舟兮爲水嬉。臨芳洲兮拔靈芝。樂以忘戚。游以卒時。窮夜爲日。畢歲爲期。此蓋宴居之浩麗。子豈能從我而處之乎。公子曰。余病未能也。

大夫曰。若乃白商素節。月旣授衣。天凝地閉。風厲霜飛。柔條夕勁。密葉晨稀。將因氣以效殺。臨金郊而講師。爾乃列輕武。整戎剛。建雲髦。啓雄芒。駕紅陽之飛燕。驂唐公之驪驪。屯羽隊於外林。縱輕翼於中荒。爾乃布飛緜。張修毘。陵黃岑。挂青巒。畫長壑以爲限。帶流谿以爲關。旣乃內無疏蹊。外無漏迹。叩鉦數校。舉麾旌獲。設金機。馳鳴鏑。剪剛豪。落勁翮。車騎競駭。駢武齊轍。翁忽揮霍。雲迴風烈。聲動響飛。形移景發。舉戈林竦。揮鋒電滅。仰傾雲巢。俯殫地穴。乃有圓文之玃。班題之獾。鼓鬣風生。怒目電睽。口齧霜刃。足撥飛鋒。甄林蹶石。扣跋幽叢。於是飛黃奮銳。賁石逞技。蹙封豨。僂馮豕。披虺虺。挫獬廌。勾爪摧。鋸牙捭。瀾漫狼藉。傾榛倒壑。殞齒挂山。僵踣掩澤。藪爲毛林。隰爲丹薄。於是撤圍頓罔。卷旆收鳶。虞人數獸。林衡計鮮。論最犒勤。息馬韜弦。肴駟連鑣。酒駕方軒。千鐘電鬪。萬燧星繁。陵阜霑流膏。谿谷厭芳煙。歡極樂殫。迴節而旋。此亦田游之壯觀。子豈能從我而爲之乎。公子曰。余病未能也。

大夫曰。楚之陽劍。歐冶所營。邪谿之鋌。赤山之精。銷躡羊頭。鑢越鍛成。乃鍊乃鑠。萬辟千灌。豐隆奮椎。飛廉扇炭。神器化成。陽文陰縵。流綺星連。浮綵豔發。光如散電。質如耀雪。霜鏗水凝。冰刃露潔。形冠豪曹。名珍巨闕。指鄭則三軍白首。麾晉則千里流血。豈徒水截蛟鴻。陸灑奔駟。斷浮翮以爲工。絕重甲而稱利云。

爾而已哉。若其靈寶則舒辟無方，奇鋒異模，形震薛蜀，光駭風胡，價兼三鄉，聲貴二都，或馳名傾秦，或夜飛去吳，是以功冠萬載，威曜無窮，揮之者無前，擁之者身雄，可以從服九國，橫制八戎，爪牙景附，函夏承風，此蓋希世之神兵，子豈能從我而服之乎？公子曰：余病未能也。

大夫曰：天驥之駿，逸態超越，稟氣靈淵，受精皎月，眸矚黑照，玄采紺發，沫如揮紅，汗如振血，秦青不能識其衆尺，方堙不能覩其若滅，爾乃巾雲軒，踐朝霧，赴春衢，整秋御，蚪蛹螭騰，麟超龍翥，望山載奔，視林載赴，氣盛怒發，星飛電駭，志凌九州，勢越四海，景不及形，塵不暇起，浮箭未移，再踐千里，爾乃踰天垠，越地隔，過汗漫之所不游，躡章亥之所未迹，陽烏爲之頓羽，夸父爲之投策，斯蓋天下之雋乘，子豈能從我而御之乎？公子曰：余病未能也。

大夫曰：大梁之黍，瓊山之禾，唐稷播其根，農帝嘗其華，爾乃六禽殊珍，四膳異肴，窮海之錯，極陸之毛，伊公饜鼎，庖子揮刀，味重九沸，和兼勺藥，晨鳧露鵠，霜鷄黃雀，圓案星亂，方丈華錯，封熊之蹠，翰音之跖，鸞髀猩脣，髦殘象白，靈淵之龜，萊黃之鮐，丹穴之鸚，玄豹之胎，燁以秋橙，醑以春梅，接以商王之箸，承以帝辛之杯，范公之鱗，出自九溪，頰尾丹鰓，紫翼青鬢，爾乃命支離，飛霜鏗，紅肌綺散，素膚雪落，婁子之豪，不能廁其細，秋蟬之翼，不足擬其薄，繁肴旣闕，亦有寒羞，商山之果，漢皋之榛，析龍眼之房，剖椰子之殼，芳旨萬選，承意代奏，乃有荆南烏程，豫北竹葉，浪蟻星沸，飛華萍接，玄石嘗其味，儀氏進其法，傾壘一朝，可以流湏千日，單醪投川，可使三軍告捷，斯人神之所歆羨，觀聽之所煒曄也，子豈能強起而御之乎？公子曰：耽口爽之饌，甘腊毒之味，服腐腸之藥，御亡國之器，雖子大夫之所榮，故亦吾人之所畏，余病未能也。

大夫曰。蓋有晉之融皇風也。金華啓徵。大人有作。繼明代照。配天光宅。其基德也。隆於姬公之處岐。其垂仁也。富乎有殷之在亳。南箕之風。不能暢其化。離畢之雲。無以豐其澤。皇道煥炳。帝載緝熙。導氣以樂。宣德以詩。教清於雲官之世。治穆乎鳥紀之時。王猷四塞。函夏謐寧。丹冥投烽。青徼釋警。却馬於糞車之轅。銘德於昆吾之鼎。羣萌反素。時文載郁。耕父推畔。魚豎讓陸。樵夫恥危冠之飾。輿臺笑短後之服。六合時邕。巍巍蕩蕩。玄齟巷歌。黃髮擊壤。解羲皇之繩。錯陶唐之象。若乃華裔之夷。流荒之貊。語不傳於輶軒。地不被乎正朔。莫不駿奔稽顙。委質重譯。于時昆蛟感惠。無思不擾。苑戲九尾之禽。囿棲三足之鳥。鳴鳳在林。夥於黃帝之園。有龍游淵。盈於孔甲之沼。萬物烟熅。天地交泰。義懷靡內。化感無外。林無被褐。山無草帶。皆象刻於百工。兆發乎靈蔡。摺紳濟濟。軒冕藹藹。功與造化爭流。德與二儀比大。言未終。公子蹶然而興曰。鄙夫固陋。守此狂狷。蓋理有毀之而爭寶之。訟解言有怒之而齊王之疾痊。向子誘我以聾耳之藥。棲我以蔀家之屋。田游馳蕩。利刃駿足。既老氏之攸戒。非吾人之所欲。故靡得而應子。至聞皇風載躋。時聖道醇。舉實爲秋。摛藻爲春。下有可封之民。上有大哉之君。余雖不敏。請尋後塵。

辭賦類

連珠

連珠二首 揚雄

臣聞明君取士。貴拔衆之所遺。忠臣薦善。不廢格之所排。是以巖穴無隱。而側陋章顯也。臣聞天下有三樂。有三憂焉。陰陽和調。四時不忒。年穀豐遂。無有夭折。災害不生。兵戎不作。天下之樂也。

聖明在上。祿不遺賢。罰不偏罪。君子小人。各處其位。衆臣之樂也。吏不苟暴。役賦不重。財力不傷。安土樂業。民之樂也。亂則反焉。故有三憂。

擬連珠五首 班固

臣聞公輸愛其斧。故能妙其巧。明主貴其士。故能成其治。

臣聞良匠度其材。而成大夏。明主器其士。而建功業。

臣聞聽決價而資玉者。無楚和之名。因近習而取士者。無伯王之功。故璵璠之爲寶。非駟僮之術也。伊呂之爲佐。非左右之舊。

臣聞鸞鳳養六翮以凌雲。帝王乘英雄以濟民。易曰鴻漸于陸。其羽可用爲儀。

臣聞馬伏阜而不用。則駑與良而爲羣。士齊僚而不職。則賢與愚而不分。

演連珠五十首 陸機

臣聞日薄星迴。穹天所以紀物。山盈川沖。后土所以播氣。五行錯而致用。四時違而成歲。是以百官恪居。以赴八音之離。明君執契。以要克諧之會。

臣聞任重於力。才盡則困。用廣其器。應博則凶。是以物勝權而衡殆。形過鏡則照窮。故明主程才以効業。貞臣底力而辭豐。

臣聞髦俊之才。世所希乏。丘園之秀。因時則揚。是以大人基命。不擢才於后土。明主聿興。不降佐於昊蒼。臣聞世之所遺。未爲非寶。主之所珍。不必適治。是以俊乂之藪。希蒙翹車之招。金碧之巖。必辱鳳舉之使。

臣聞祿放於寵。非隆家之舉。官私於親。非興邦之選。是以三卿世及。東國多衰弊之政。五侯並軌。西京有陵夷之運。

臣聞靈輝朝覲。稱物納照。時風夕灑。程形賦音。是以至道之行。萬類取足於世。大化既洽。百姓無匱於心。臣聞頓網探淵。不能招龍。振綱羅雲。不必招鳳。是以巢箕之叟。不眇丘園之幣。洗渭之民。不發傅巖之夢。臣聞鑑之積也。無厚而照。有重淵之深。目之察也。有畔而眈。周天壤之際。何則。應事以精。不以形。造物以神。不以器。是以萬邦凱樂。非悅鍾鼓之娛。天下歸仁。非感玉帛之惠。

臣聞積實雖微。必動於物。崇虛雖廣。不能移心。是以都人冶容。不悅西施之影。乘馬班如。不輟太山之陰。臣聞應物有方。居難則易。藏器在身。所乏者時。是以充堂之芳。非幽蘭所難。繞梁之音。實縈絃所思。

臣聞智周通塞。不爲時窮。才經夷險。不爲世屈。是以凌飄之羽。不求反風。耀夜之目。不思倒日。

臣聞忠臣率志。不謀其報。貞士發憤。期在明賢。是以柳莊黜殯。非貪瓜衍之賞。禽息碎首。豈要先茅之田。臣聞利眼臨雲。不能垂照。朗璞蒙垢。不能吐輝。是以明哲之君。時有蔽壅之累。俊乂之臣。屢抱後時之悲。臣聞郁烈之芳。出於委灰。繁會之音。生於絕絃。是以貞女要名於沒世。烈士赴節於當年。

臣聞良宰謀朝。不必借威。貞臣衛主。修身則足。是以三晉之強。屈於齊堂之俎。千乘之勢。弱於陽門之哭。臣聞赴曲之音。洪細入韻。蹈節之容。俯仰依詠。是以言苟適事。精籬可施。士苟適道。修短可命。

臣聞因雲灑潤。則芬澤易流。乘風載響。則音徽自遠。是以德教俟物而濟。榮名緣時而顯。

臣聞覽影偶質。不能解獨。指迹慕遠。無救於遲。是以循虛器者。非應物之具。翫空言者。非致治之機。

臣聞鑽燧吐火。以續湯谷之晷。揮翮生風。而繼飛廉之功。是以物有微而毗著。事有瑣而助洪。臣聞春風朝煦。蕭艾蒙其溫。秋霜宵墜。芝蕙被其涼。是故威以齊物。爲肅德以普濟。爲弘。

臣聞巧盡於器。習數則貫。道繫於神。人亡則滅。是以輪匠肆目。不乏奚仲之妙。瞽叟清耳。而無伶倫之察。臣聞性之所期。貴賤同量。理之所極。卑高一歸。是以准月稟水。不能加涼。晞日引火。不必增輝。

臣聞絕節高唱。非凡耳所悲。肆義芳訊。非庸聽所善。是以南荆有寡和之歌。東野有不釋之辯。

臣聞尋煙染芬。薰息猶芳。徵音錄響。操終則絕。何則。垂於世者可繼。止乎身者難結。是以玄晏之風。恆存。動神之化。已滅。

臣聞託闇藏形。不爲巧密。倚智隱情。不足自匿。是以重光發藻。尋虛捕景。大人貞觀。探心昭忒。

臣聞披雲看霄。則天文清。澄風觀水。則川流平。是以四族放而唐劭。二臣誅而楚寧。

臣聞音以比耳。爲美色以悅目。爲歡。是以衆聽所傾。非假百里之操。萬夫婉變。非俟西子之顏。故聖人隨世以擢佐。明主因時而命官。

臣聞出乎身者。非假物所隆。牽乎時者。非克己所勗。是以利盡萬物。不能叡童昏之心。德表生民。不能救棲遑之辱。

臣聞動循定檢。天有可察。應無常節。身或難照。是以望景揆日。盈數可期。撫臆論心。有時而謬。

臣聞傾耳求音。眡優聽苦。澄心徇物。形逸神勞。是以天殊其數。雖同方不能分其感。理塞其通。則並質不能共其休。

臣聞遯世之士。非受匏瓜之性。幽居之女。非無懷春之情。是以名勝欲。故偶影之操。矜窮愈達。故凌霄之節厲。

臣聞聽極於音。不慕鈞天之樂。身足於蔭。無假垂天之雲。是以蒲密之黎。遺時雍之世。豐沛之士。忘桓撥之君。

臣聞飛轡西頓。則離朱與矇眊收察。懸景東秀。則夜光與武夫匿耀。是以才換世。則俱困。功偶時。而並劬。臣聞示應於近。遠有可察。託驗於顯。微或可包。是以寸管下僚。天地不能以氣欺。尺表逆立。日月不能以形逃。

臣聞絃有常音。故曲終則改。鏡無畜影。故觸形則照。是以虛己應物。必究千變之容。挾情適事。不觀萬殊之妙。

臣聞祝敵希聲。以諧金石之和。鼙鼓疎擊。以節繁絃之契。是以經治必宣其通。圖物恆審其會。

臣聞目無嘗音之察。耳無照景之神。故在乎我者。不誅之於己。存乎物者。不求備於人。

臣聞放身而居。體逸則安。肆口而食。屬厭則充。是以王鮪登俎。不假吞波之魚。蘭膏停室。不思銜燭之龍。臣聞衝波安流。則龍舟不能以漂。震風洞發。則夏屋有時而傾。何則。牽乎動則靜凝。係乎靜則動貞。是以淫風大行。貞女蒙冶容之悔。淳化殷流。盜跖挾曾史之情。臣聞達之所服。貴有或遺。窮之所接。賤而必尋。是以江漢之君。悲其墜屨。少原之婦。哭其亡簪。

臣聞觸非其類。雖疾弗應。感以其方。雖微則順。是以商飈漂山。不興盈尺之雲。谷風乘條。必降彌天之潤。

故暗於治者唱繁而和寡。審乎物者力約而功峻。

臣聞煙出於火。非火之和。情生於性。非性之適。故火壯則煙微。性充則情約。是以殷墟有感物之悲。周京無佇立之跡。

臣聞適物之技。俯仰異用。應事之器。通塞異任。是以鳥栖雲而繳飛。魚藏淵而網沈。賁鼓密而含響。朗笛疎而吐音。

臣聞理之所守。勢所常奪。道之所閉。權所必開。是以生重於利。故據圖無揮劍之痛。義貴於身。故臨川有投迹之哀。

臣聞通於變者。用約而利博。明其要者。器淺而應玄。是以天地之曠。該於六位。萬殊之曲。窮於五絃。

臣聞圖形於影。未盡纖麗之容。察火於灰。不覩洪赫之烈。是以問道存乎其人。觀物必造其質。

臣聞情見於物。雖遠猶疎。神藏於形。雖近則密。是以儀天步晷而修短可量。臨淵揆水而淺深難察。

臣聞虐暑熏天。不減堅冰之寒。涸陰凝地。無累陵火之熱。是以吞縱之強。不能反蹈海之志。漂鹵之威。不能降西山之節。

臣聞理之所開。力所常達。數之所塞。威有必窮。是以烈火流金。不能焚景。沈寒凝海。不能結風。

臣聞足於性者。天損不能入。貞於期者。時累不能淫。是以迅風陵雨。不謬晨禽之察。勁陰殺節。不凋寒木之心。

偈

藤偈李邕

得彼柔性契茲佛乘。豈無衆木我喻垂藤。

辭賦類

附錄

九惟文蔡邕

八惟困乏憂心殷殷。天之生我。星宿值貧。六極之厄。獨我斯勤。居處浮澗。無以自口。冬日栗栗。上下同雲。無衣無褐。何以自溫。六月徂暑。炎赫來臻。無絺無綌。何以蔽身。無餉不飽。永離懽欣。

五悲文并序 盧照鄰

自古爲文者。多以九七爲題目。乃有九歌九辨九章。七發七啟。其流不一。余以爲天有五星。地有五嶽。人有五常。禮有五禮。樂有五聲。五者亦在天地之數。今造五悲。以伸萬物之情。傳之好事耳。

悲才難

一悲曰。恭聞古之君子兮。將遠適乎百蠻。何故違父母之宗國。從禽獸于末班。將矯詞兮不往。將背俗兮不還。寧曲成而薄喪。不直敗以厚顏。彼聖人兮猶若此。況不肖於中間。古往今來。邈矣悠哉。嵇生玉折。顏子蘭摧。人兮代兮俱盡。代兮人兮共哀。至如左邱失明。冉耕有疾。兵法作而斷足。史記修而下室。高明者鬼瞰其門。正直者人怨其筆。雖爲鏡於前代。終抱痛于今日。別有漢陽許掾。邠國臺卿。抗希代之奇節。負

趨時之令名。坎壈九死。離披再生。伊才智之爲患。故賢哲之所嬰。若乃賈長沙之數奇。崔亭伯之不偶。思欲削魯史之高行。鉗楊墨之辯口。爲書爲禮。驅季俗于三古之前。垂譽垂聲。正頽綱于百王之後。天子聞之而欲用。羣公畏之而莫取。徒窘蠢於泥沙。竟龍鍾於塵垢。異乎稽之古人。則如彼。考之今代。又如此。近有魏郡王公曰方。華陰楊氏曰亨。咸能博達奇偉。覃思研精。探孔門之禮樂。吞鬼谷之縱橫。嶽秀泉澄。如川如陵。高談則龍騰豹變。下筆則煙飛霧凝。王則官終于郡吏。楊則官止于邑丞。何異夫操太阿以烹小鮮。飛夜光而彈伏翼。灼金龜兮訪兆。邀玉騏兮騁力。雖勞形而竭思。吾固知其不得。予之昆兮曰杲之。余之季兮曰昂之。杲也杲杲兮如三足之烏。昂也昂昂焉如千里之駒。杲之爲人也。風流儒雅。爲一代之和玉。昂之爲人也。文章卓犖。爲四海之隋珠。并蘭馨兮桂郁。俱龍駒兮鳳雛。生于戰國。則管樂之器。長於闕里。則游夏之徒。以方圓異用。遭遇殊時。故才高而位下。咸默默以遲遲。青青子衿兮時向晚。黃黃我綬兮鬢如絲。昆兮何責。坐乾封兮老矣。季兮何負。橫武陵而棄之。舉天下兮稱屈。何暗室之足欺。爲小人之所笑。爲通賢之所悲。童子尙知其不可。矧衡鏡與蓍龜。故曰至道之精。窅窅冥冥。至道之極。昏昏默默。焚符破璽。而人朴鄙。剖斗折衡。而人不爭。捩工倕之指。而天下始巧。膠離婁之目。而天下始明。然後除其矯黠之患。安其性命之精。太平之代。萬物肫肫。凡聖脗合。賢愚淆昏。公卿不接友。長吏不迎尊。當成康勿用。何暇談其兵甲。典謨旣作。焉得耀其書論。雖有晏嬰子產。將頓伏于閭巷。雖有冉求季路。且耕牧于田園。彼尋常之才子。又焉可以勝言。命鸞鳳兮逐雀。驅龍驥兮捕鼠。使掌事者校其功兮。孰能與隼狸而齊舉。金爲舟兮瑇瑁楫。不可以陟邱陵些。珠爲衣兮翡翠裳。不可以混樵蒸些。何器用之乖刺。悼斯人之勤多。倚

長巖以爲枕兮。吸流光以高臥。見城市以盈虛。若蚊虻之相過。當其時也。巢由滿野。不知稷契之尊。周召盈朝。莫救夷齊之餓。若夫管仲不遇齊桓。則城陽之贅壻。太公不遭姬伯。亦棘津之漁夫。一仁一義。柴也來兮。由也醢。一忠一孝。微子去兮。箕子奴。聖人百慮而一致。君子同歸而殊途。惟旣焚兮。胥旣溺。桀亦放兮。文亦拘。笙簧六籍。則秦谷有坑。儒之痛。黼藻百行。則漢家有黨。錮之誅。鄴都傾覆。飛禍纏于高鼻。洛陽板蕩。橫死坐其無鬚。嗶啞嚙嘶。口含天憲。睚眦蠶芥。屍僵路隅。變化與屈伸交逐。窮達與存亡並驅。因其所有而有之。則萬物無不有。就其所無而無之。則萬物無不無。有竅而生。寧惟混沌。無用而飽。何獨侏儒。是以蘧伯玉卷兮。長卷寧武子。愚兮。更愚。庭有樹兮。樹有荆。園有鳥兮。鳥有鴿。鴿其鳴矣。思諸兄矣。荆其頽矣。思諸季矣。巖有芳桂。隰有棠棣。枝龍嵒兮。相樛。葉翩翩兮。相翳。天之生我。胡寧不惠。何始吉兮。初征悲終凶于未濟。

悲道窮

二悲曰。流淚公子。傷心久之。歷萬古以抽恨。橫八荒而選悲。有幽巖之臥客。兀中林而坐思。形枯槁以崎嶇。足聯蹠以緇釐。悄悄兮。忽愴眇眇兮。惆悵迢遙兮。獨蹇淹留兮。空谷天片片而雲愁。山幽幽而谷哭。露垂泣于幽草。風含悲于拱木。徒觀其頂集飛塵。尻埋積雪。骸骨半死。血氣中絕。四支萎墮。五官欹缺。皮襞積而千皺。衣聯褰而百結。毛落鬚禿。無叔子之明眉。唇亡齒寒。有張儀之羞舌。仰而視睛。翳其若菅。俯而動身。羸而欲折。神若存而若亡。心不生而不滅。其所居也不爨。其所狎也非人。古樹爲伴。朝霞作隣。下陰森以多晦。傍恍惚兮。無垠。松門草合。石路苔新。公子方撫其背兮。曳其裾。曰子非有唐之文士歟。燕地之

高門歟。昔也子之少。則玉樹金枝。及其長。則龍章鳳姿。立身則淹中不足言其禮。揮翰則江左莫敢論其詩。每兢兢于暗室。恆詡詡于明時。常謂五府交辟。三臺共推。朝紆會稽之綬。夕獻長楊之辭。痛私門之禍速。惜公車之詔遲。豈期晦明乖序。寒燠愆度。鱗傷羽折。筋攣肉蠹。離披于丹澗之隅。穀鯁於藪山之路。已焉哉。已焉哉。崑山玉石忽摧頽。事去矣。事去矣。古今聖賢悲何已。天道如何。自古相嗟。項羽帳中之飲。荆卿易水之歌。何壯夫之懦抑。伊兒女之情多。借如蘇武生還。溫序死節。王陵之母伏劍。杞梁之妻泣血。事蓋迫于功名。情有兼于貞烈。若關羽漢陰。田橫海島。孤城已迫。疲兵尙老。離離碣石之鴻。翼翼江潭之草。迴首永訣。吞聲何道。及夫獻帝偷生。懷王客死。哀西都之城闕。憶南荆之朝市。鳳凰樓上。隴山雲。鸚鵡洲前。吳江水。一離一別兮。漢家宮掖似神仙。獨坐獨愁兮。楚國容華競桃李。別有士安多疾。顏奇不起。馬援困于壺頭。冉耕悲於牖裏。平生書劍。宿昔琴樽。研精殫于玉冊。博思浹于銅渾。思欲爲龜爲鏡。立德立言。成天下之譽。定古今之諄諄。一朝溘臥。萬事寧論。君徒見邱中之饒朽骨。豈知陌上之有游魂。假使百年兮。上壽又何足以存存。

悲昔遊

三悲曰。奇峯合沓半隱天。綠蘿蒙籠水潺湲。因嵌巖以爲室。就芬芳以列筵。川谷縈迴兮迷徑路。山幃重復兮無人煙。當谿澗之洞壑。臨決咽之奔泉。中有幽憂之子。長寂寞以思禪。暮色躊躇。朝思綿綿。形半生而半死。氣一絕而一連。自言少年遊宦。來從北燕。淮南芳桂之嶺。峴北明珠之川。東魯則過仲尼之故宅。西蜀則耕武侯之薄田。舊鄉舊國。白雲邊。飛雪飛蓬。暗遠天。暫辭薊門千萬里。少別昭邱三十年。昔時人

物都應謝。聞道城隍今可憐。忽憶揚州揚子津。遙思蜀道蜀橋人。鴛鴦渚兮羅綺月。茱萸灣兮楊柳春。煙波淼淼帶平沙。閣棧連延狹復斜。山頭交護之木。浦口同心之華。嚴君平之卜肆。戴安道之貧家。月犯少微。弔吳中之隱士。星干織女。乘海上之仙槎。長安綺城十二重。金作鳳凰銅作龍。蕩蕩千門如錦繡。巖巖雙闕似芙蓉。題字于扶風之柱。繫馬于驪山之松。灞池則金人列岸。太華則玉女臨峯。平明共戲東陵陌。薄暮遙聞北闕鐘。洛陽大道何紛紛。榮光休氣曉氤氳。交衢近接東西署。複道遙通南北軍。漢帝能拜嵩邱石。陳王巧賦洛川雲。河水河橋木蘭槐。金閨金谷石榴裙。曾入西城看歌舞。也出東郊送使君。一朝顛頽無氣力。暴骸委骨龍門側。當時相重若鴻鐘。今日相輕比蟬翼。驅代情兮共此。何余哀之能得。使我孤猿哀怨。獨鶴驚鳴。蘿月寡色。風泉罷聲。嗟昊天之不弔。悲后土之無情。松架森沈兮戶內掩。石樓摧折兮柱將傾。竊不敢當露雨之恩惠。長痛恨于此生。

悲今日

四悲曰。傾蓋若舊。白頭如新。嘗謂談過其實。辨而非真。自高枕箕穎。長揖交親。以蕙蘭爲九族。以風煙爲四鄰。朝朝獨坐。惟見羣峯合沓。年年孤臥。常對古樹輪囷。相弔相哭。則有饑飢啼夜。相慶相賀。則有好鳥歌春。林麇麇兮多鹿。山蒼蒼兮少人。時向西溪吸水。或就東巖負薪。百年之中。皆爲白骨。千里之外。時見黃塵。平生連袂。宿昔銜杯。談風雲于城闕。弄花竹于池臺。皆是西園上客。東觀高才。超班匹賈。含鄒吐枚。一琴一書。校奇蹤于既往。一歌一詠。垂妙製于將來。絃將調而雪舞。筆屢走而雲迴。自謂蘭交永合。松契長并。通宵扼腕。終日盱衡。罵蕭朱爲賈豎。目張陳爲老兵。悲蒼黃兮驟變。恨消長之相傾。貴而不驕。人皆

共推晏平仲。死且不朽。吾每獨稱范巨卿。及其蹇產摧聯。支離括撮。已濡首兮將死。尙搖尾兮求活。莊西貸而魚窮。姬東徂而狼跋。今皆慶弔都斷。存亡永闕。憑駟馬而不追。寄雙魚而莫達。向時之清談尙存。今日之相知已沒。則有河濱漂母。隴上樵夫。盤飧帶粟。粥麵兼麩。藜羹一簋。濁酒一壺。夫負妻戴。男歡女娛。攀重巒之峇嶸。歷飛澗之崎嶇。哀王孫而進饋。問公子之所須。因謂予曰。哀哉可憐。聖人之過久矣。君子之罪多焉。詩書禮樂。適足衰人之神用。宗族朋友。不足駐人之頽年。削跡伐樹。孔席由來不暖。摩頂至踵。墨突何時有煙。一朝至此。萬事徒然。自昔相逢。把臂談元。橫雕龍于翠瓦。飛縞鳳于瓊筵。各自雲騰羽化。谷變鶯遷。鳴香車于闕下。曳珠履于君前。豈憶荒山之幽絕。寧知枯骨之可憐。傳語千秋萬古。寄言白日黃泉。雖有羣書萬卷。不及囊中一錢。

悲人生

五悲曰。禮樂旣作。仁義不憊。死生有命。富貴在天。一變一化。一虧一全。去其外物。歸于內篇。儒與道兮。方計于前。其書萬卷。其學千年。鐘鼓玉帛。鑿鑿踳躓。金木水火。混合推遷。六合之內。慕其風兮如市。百代之後。隨其流兮若川。三界九地。往返周旋。四生六道。出沒牽聯。碌碌碌碌。蠢蠢黶黶。受苦受樂。可悲可憐。有超然之大聖。歷曠劫以爲期。戒定慧解。非因人。慈悲喜捨。非見思。聞儒道之高論。乃撞鐘而應之。曰止止。善男子。予觀向時之華說。乃天下之辯士。請弄宜僚之丸。以合兩家之美。若夫正君臣。定名色。威儀俎豆。郊廟社稷。適足誇耀時俗。奔競功名。使六藝相亂。四海相爭。我者遺其無我。生者哀其無生。孰與乎身肉手足。濟生人之塗炭。國城府庫。恤貧者之經營。捨其有愛。以至于無愛。捨其有行。以至于無行。若夫呼吸吐

納全身養精。反于太素。飛騰上清。與乾坤合其壽。與日月齊其明。適足增長諸見。未能永證無生。孰與夫離常離斷。不始不終。恆在三昧。常遊六通。不生不住。無所處。不去不滅。無所窮。放毫光而普照。盡法界與虛空。苦者代其勞苦。蒙者導其愚蒙。施語行事。未嘗稱倦。根力覺道。不以爲功。所言未畢。儒道二客。離席再拜。稽首而言曰。大聖哉。孔晚聞道。聃今已老。徒知其一。未究其術。何異夫戴盆望天。倚杖逐日。蒼蒼之氣未辨。昭昭之光已失。嗚呼。優優羣品。遑遑衆人。雖鑿其竅。未知其身。來從何道。去止何津。誰爲其業。誰作其因。一翻一覆。兮如掌。一生一死。兮若輪。不有大聖。誰起大悲。請北面趨伏。願終身而教之。

逐店鬼文 孫樵

孫子病店。其友踵門請曰。始則慄縮。臧懷。有若仆子於嚴冰者。終則憤胸。爍肌。有若置子於烈爐者。子知動作皆鬼耶。余試爲子逐之。以文。樵應之曰。余病誠鬼也。然樵居平。亦有不自了事者。抑有鬼乎。樵嘗思委質以事君。則有若刳心而死者。立于旁曰。當如此諫。樵嘗思不入于危難。則有若結纓而死者。立于旁曰。當如此忠。樵嘗欲不固其窮。則有若拜拒饋粟者。立于旁曰。當如此廉。樵嘗欲苟違其期。則有若擁梁汨死者。立于旁曰。當如此信。樵嘗欲與人美言。則有若教予訐談而鯁人耳者。樵嘗欲與人市交。則有若教予違熱而去勢者。樵嘗欲趨權豪以冀得。則有若牽予裾而躡予足者。樵嘗欲忍汗赧以自媒。則有若縛予舌而膠予口者。予之不得專也如此。以故學勤而吾道愈窮。業修而知己日消。是殘吾生于店鬼也。子并爲吾逐之。吾聞有陳萬年者。射利乘機。迎顏作怡。愉愉便便。阿意奉權。死而有靈。是爲諂鬼。此鬼依人。使人蒙福。人見輒喜。擺去不得。復有公孫宏者。刻己沾名。飾情釣聲。內苞禍心。外示舒宏。死而有知。是

爲矯鬼。此鬼憑人。使人有聞。上信于君。下喜于民。復有司馬安者。攘義盜仁。縛舌交脣。柔聲婉顏。狐媚當權。死而有知。是爲巧鬼。此鬼依人。辭枯卽榮。長劍華纓。高步天庭。復有和長輿者。鉅萬藏家。貫腐鏹磨。鱗差螭縮。陣陣腥澀。死而有知。是爲錢鬼。此鬼憑人。使人氣豪意適。交歡販祿。買曲成直。此四鬼者。苟與吾遊。吾必快所求。是資吾生于他鬼也。子并爲吾招之。其友不對。退而歌曰。窮吾知其所差。達吾知其所求。此不當逐。而彼不當遊。君乎君乎。誠有激於中乎。吁。

卷四十

哀祭類

告天文

漢昭帝祝天辭

皇皇上天。照臨下土。集地之靈。降甘風雨。庶物羣生。各得其所。靡今靡古。維予一人某。敬拜皇天之祐。

漢昭帝祭地辭

薄薄之士。承天之神。興甘風雨。庶卉百穀。莫不茂者。旣安且寧。維予一人某。敬拜下土之靈。

漢光武卽位祭天地文

皇天上帝。后土神祇。睠顧降命。屬秀黎元。爲民父母。秀不敢當。羣下百僚。不謀同辭。咸曰王莽篡弑竊位。秀發憤興義兵。破王邑百萬衆於昆陽。誅王郎銅馬赤眉青犢賊。平定天下。海內蒙恩。上當天心。下爲元

元所歸。讖記曰。劉秀發兵捕不道。卯金修德爲天子。秀猶固辭。至於再。至於三。羣下曰。皇天大命。不可稽留。敢不敬承。

哀祭類

告廟文

漢元帝禱高祖孝文孝武廟文 匡衡

嗣曾孫皇帝恭承洪業。夙夜不敢康寧。思育休烈。以章祖宗之盛功。故動作接神。必因古聖之經。往者有司。以爲前因。所幸而立廟。將以繫海內之心。非爲尊祖嚴親也。今賴宗廟之靈。六合之內。莫不附親。廟宜一居京師。天子親奉。郡國廟可止。毋修。皇帝祇肅舊禮。尊重神明。卽告于祖宗。而不敢失。今皇上有疾。不豫。迺夢祖宗見戒。以廟。楚王夢亦有其序。皇帝悼懼。卽詔臣衡復修立。謹案上世帝王承祖禰之大義。皆不敢不自親。郡國吏卑賤。不可使獨承。又祭祀之義。以民爲本。閒者歲數不登。百姓困乏。郡國廟無以修立。禮凶年則歲事不舉。以祖禰之意爲不樂。是以不敢復如。誠非禮義之中。違祖宗之心。咎盡在臣衡。當受其殃。大被其疾。隊在溝瀆之中。皇帝至孝肅慎。宜蒙祐福。惟高皇帝孝文皇帝孝武皇帝省察。右饗皇帝之孝。開賜皇帝眉壽亡疆。令所疾日瘳。平復反常。永保宗廟。天下幸甚。

漢元帝告謝毀廟文 匡衡

往者大臣以爲在昔帝王。承祖宗之休典。取象於天地。天序五行。人親五屬。天子奉天。故率其意而尊其制。不以禘嘗之序。靡有過五。受命之君。躬接于天。萬世不墮。繼烈以下。五廟而遷。上陳太祖。閒歲而禘。其

道應天。故福祿永終。太上皇非受命而屬盡。義則當遷。又以爲孝莫大於嚴父。故父之所尊。子不敢不承。父之所異。子不敢同。禮公子不得爲母信。爲後則於子祭。於孫止。尊祖嚴父之義也。寢日四上食。園廟閒祀。皆可亡修。皇帝思慕悼懼。未敢盡從。惟念高皇帝聖德茂盛。受命溥將。欽若稽古。承順天心。子孫本支。陳錫無疆。誠以爲遷廟合祭。久長之策。高皇帝之意。迺敢不聽。卽以今日遷太上孝惠廟。孝文太后孝昭太后寢。將以昭祖宗之德。順天人之序。定亡窮之業。今皇帝未受茲福。乃有不能共職之疾。皇帝願復修立承祀。臣衡等咸以爲禮不得。如不合高皇帝孝惠皇帝孝文皇帝孝昭皇帝孝宣皇帝太上皇孝文太后孝昭太后之意。罪盡在臣衡等。當受其咎。今皇帝尙未平。詔中朝臣具復毀廟之文。臣衡中朝臣咸復以爲天子之祀。義有所斷。禮有所承。違統背制。不可以奉先祖。皇天不祐。鬼神不饗。六藝所載。皆言不當。無所依緣。以作其文。事如失指。罪迺在臣衡。當深受其殃。皇帝宜厚蒙祉福。嘉氣日興。疾病平復。永保宗廟。與天亡極。羣生百神。有所歸息。

哀祭類

玉牒文

唐高宗泰山玉牒文

嗣天子臣治敢昭告於昊天上帝。有隋位極顛危。天數窮否。生靈塗炭。鼎祚淪亡。高祖仗黃鉞而救黎元。錫元珪而拯沈溺。太宗功宏鍊石。定區宇於再麾。業比斷鼈。飲滄溟而一息。臣忝奉餘緒。承威積慶。遂得崑山寢燎。炎海韜波。雖業茂宗祧。實降靈穹昊。今謹告成東嶽。歸功上元。大寶克隆。鴻基永固。凝薰萬姓。

陶化八紘。

哀祭類

祭文上

祭古冢文 謝惠連

東府掘城北塹。入丈餘。得古冢。上無封域。不用塼壁。以木爲槨。中有二棺。正方。兩頭無和。明器之屬。材瓦銅漆。有數十種。多異形。不可盡識。刻木爲人。長三尺。可有二十餘頭。初開見。悉是人形。以物根撥之。應手灰滅。棺上有五銖錢百餘枚。水中有甘蔗節。及梅李核瓜瓣。皆浮出。不甚爛壞。銘誌不存。世代不可得而知也。公命城者改埋於東岡。祭之以豚酒。既不知其名字遠近。故假爲之號曰冥漠君。云爾。元嘉七年九月十四日。司徒御屬領直兵令史統作城錄事臨漳令亭侯朱林。具豚醪之祭。敬薦冥漠君之靈。忝總徒旅。板築是司。窮泉爲塹。聚壤成基。一槨既啓。雙棺在茲。捨畚悽愴。縱錘漣而芻靈已毀。塗車旣摧。几筵糜腐。俎豆傾低。盤或梅李。盎或醢醢。蔗傳餘節。瓜表遺犀。追惟夫子。生自何代。曜質幾年。潛靈幾載。爲壽爲夭。寧顯寧晦。銘誌湮滅。姓字不傳。今誰子後。曩誰子先。功名美惡。如何蔑然。百堵皆作。十仞斯齊。壙不可轉。塹不可迴。黃腸旣毀。便房已頽。循題興念。撫俑增哀。射聲垂仁。廣漢流渥。祠骸府阿。掩骼城曲。仰羨古風。爲君改卜。輪移北隍。窀穸東麓。壙卽新營。棺仍舊木。合葬非古。周公所存。敬遵昔義。還祔雙魂。酒以兩壺。牲以特豚。幽靈髣髴。歆我犧樽。嗚呼哀哉。

祭屈原文 顏延之

惟有宋五年月日。湘州刺史吳郡張邵。恭承帝命。建旗舊楚。訪懷沙之淵。得捐珮之浦。引節羅潭。艤舟汨渚。乃遣戶曹掾某。敬祭故楚三閭大夫屈君之靈。蘭薰而摧玉。纁則折物。忌堅芳人。諱明潔。曰若先生。逢辰之缺。溫風怠時。飛霜急節。羸苒遘紛。昭懷不端。謀折儀尚。貞蔑椒蘭。身絕郢闕。迹遍湘干。比物荃蓀。連類龍鸞。聲溢金石。志華日月。如彼樹芳。實穎實發。望汨心歎。瞻羅思越。藉用可塵。昭忠難闕。

祭田橫墓文 韓愈

貞元十一年九月。愈如東京。道出田橫墓下。感橫義高能得士。因取酒以祭。爲文而弔之。其辭曰。事有曠百世而相感者。余不自知其何心。非今世之所稀。孰爲使余歎歎而不可禁。余旣博觀乎天下。曷有庶幾乎夫子之所爲。死者不復生。嗟余去此。其從誰。當秦氏之敗亂。得一士而可王。何五百人之擾擾。而不能脫夫子於劍鏑。抑所寶之非賢。亦天命之有常。昔闕里之多士。孔聖亦云其遑遑。苟余行之不迷。雖顛沛其何傷。自古死者非一。夫子至今有耿光。踞陳辭而薦酒。魂髣髴而來享。

祭鱷魚文 韓愈

維年月日。潮州刺史韓愈。使軍事衙推秦濟。以羊一豬一。投惡谿之潭水。以與鱷魚食。而告之曰。昔先王旣有天下。列山澤罔繩。擗刃以除蟲蛇惡物。爲民害者。驅而出之。四海之外。及後王德薄。不能遠有。則江漢之間。尚皆棄之。以與蠻夷楚越。況潮嶺海之間。去京師萬里哉。鱷魚之涵淹卵育於此。亦固其所。今天子嗣唐位。神聖慈武。四海之外。六合之內。皆撫而有之。況禹跡所揜。揚州之近地。刺史縣令之所治。出貢賦以供天地宗廟百神之祀之壤者哉。鱷魚其不可與刺史雜處此土也。刺史受天子命。守此土。治此民。

而鱷魚睥然不安谿潭據處食民畜熊豕鹿豕以肥其身以種其子孫與刺史亢拒爭爲長雄刺史雖弱亦安肯爲鱷魚低首下心佻佻睨睨爲民吏羞以偷活於此邪且承天子命以來爲吏固其勢不得不與鱷魚辨鱷魚有知其聽刺史言潮之州大海在其南鯨鵬之大蝦蟹之細無不容歸以生以食鱷魚朝發而夕至也今與鱷魚約盡三日其率醜類南徙於海以避天子之命吏三日不能至五日不能至七日七日不能是終不肯徙也是不有刺史聽從其言也不然則是鱷魚冥頑不靈刺史雖有言不聞不知也夫傲天子之命吏不聽其言不徙以避之與冥頑不靈而爲民物害者皆可殺刺史則選材技吏民操強弓毒矢以與鱷魚從事必盡殺乃止其無悔

哀祭類

祭文下

自祭文 陶潛

歲維丁卯律中無射天寒夜長風氣蕭索鴻雁于征草木黃落陶子將辭逆旅之館永歸於本宅故人悽其相悲同祖行於今夕羞以嘉蔬薦以清酌候顏已冥聆音愈漠嗚呼哀哉茫茫大塊悠悠高旻是生萬物余得爲人自余爲人逢運之貧簞瓢屢罄絺綌冬陳含歡谷汲行歌負薪翳翳柴門事我宵晨春秋代謝有務中園載耘載耔迺育迺繁欣以素牘和以七絃冬曝其日夏濯其泉勤靡餘勞心有常閒樂天委分以至百年惟此百年夫人愛之懼彼無成惕日惜時存爲世珍沒亦見思嗟我獨邁曾是異茲寵非已榮涅豈吾緇粹兀窮廬酣飲賦詩識運知命疇能罔眷余今斯化可以無憾壽涉百齡身慕肥遁從老得

終。奚所復戀。寒暑逾邁。亡既異存。外姻晨來。良友宵犇。葬之中野。以安其魂。窅窅我行。蕭蕭墓門。奢恥宋臣。儉笑王孫。廓兮已滅。慨焉已遐。不封不樹。日月遂過。匪貴前譽。孰重後歌。人生實難。死如之何。嗚呼哀哉。

祭從弟敬遠文 陶潛

歲在辛亥。月惟仲秋。旬有九日。從弟敬遠。卜辰云窆。永寧后土。感平生之遊處。悲一往之不返。情惻惻以摧心。淚愍愍而盈眼。乃以園果時醪。祖其將行。嗚呼哀哉。於鑠吾弟。有操有概。孝發幼齡。友自天愛。少思寡欲。靡執靡介。後已先人。臨財思惠。心遺得失。情不依世。其色能溫。其言則厲。樂勝朋高。好是文藝。遙遙帝鄉。爰感奇心。絕粒委務。考槃山陰。淙淙懸溜。曖曖荒林。晨採上藥。夕閑素琴。曰仁者壽。竊獨信之。如何斯言。徒能見欺。年甫過立。奄與世辭。長歸蒿里。邈無還期。惟我與爾。匪但親友。父則同生。母則從母。相及齟齬。並罹偏咎。斯情實深。斯愛實厚。念疇昔日。同房之歡。冬無緼褐。夏渴瓢箪。相將以道。相開以顏。豈不多乏。忽忘饑寒。余嘗學仕。纏綿人事。流浪無成。懼負素志。斂策歸來。爾知我意。嘗願攜手。寘彼衆議。每憶有秋。我將其刈。與汝偕行。舫舟同濟。三宿水濱。樂飲川界。靜月澄高。溫風始逝。撫杯而言。物久人脆。奈何吾弟。先我離世。事不可尋。思亦何極。日徂月流。寒暑代息。死生異方。存亡有域。候晨永歸。指塗載陟。呱呱遺稚。未能正言。哀哀嫠人。禮儀孔閑。庭樹如故。齋宇廓然。孰云敬遠。何時復還。余惟人斯。昧茲近情。善龜有吉。制我祖行。望旒翩翩。執筆涕盈。神其有知。昭余中誠。嗚呼哀哉。

祭顏光祿文 王僧達

維宋孝建三年九月癸丑朔十九日辛未。王君以山羞野酌。敬祭顏君之靈。嗚呼哀哉。夫德以道樹。禮以仁清。惟君之懿。早歲飛聲。義窮機象。文蔽班揚。性婞剛潔。志度淵英。登朝光國。實宋之華。才通漢魏。譽浹龜沙。服爵帝典。棲志雲阿。清交素友。比景共波。氣高叔夜。嚴方仲舉。逸翮獨翔。孤風絕侶。流連酒德。嘯歌琴緒。遊顧移年。契闊燕處。春風首時。爰談爰賦。秋露未凝。歸神太素。明發晨駕。瞻廬望路。心悽日泣。情條雲互。涼陰掩軒。娥月寢耀。微燈動光。几牘誰炤。衾衽長塵。絲竹罷調。擘悲蘭宇。屑涕松嶠。古來共盡。牛山有淚。非獨昊天。殲我明懿。以此忍哀。敬陳奠饋。申酌長懷。顧望歔歔。嗚呼哀哉。

祭柳子厚文 韓愈

維元和十五年歲次庚子五月壬寅朔五景午。韓愈謹以清酌庶羞之奠。祭于亡友柳子厚之靈。嗟嗟。子厚而至然耶。自古莫不然。我又何嗟。人之生死。如夢一覺。其間利害。竟亦何校。當其夢時。有樂有悲。及其既覺。豈足追惟。凡物之生。不願爲材。犧樽青黃。乃木之災。子之中棄。天脫罍羈。玉珮瓊琚。大放厥辭。富貴無能。磨滅誰紀。子之自著。表表愈偉。不善爲斲。血指汗顏。巧匠旁觀。縮手袖閒。子之文章。而不用世。乃令吾徒。掌帝之制。子之視人。自以無前。一斥不復。羣飛刺天。嗟嗟子厚。今也則亡。臨絕之音。一何琅琅。徧告諸友。以寄厥子。不鄙謂余。亦託以死。凡今之交。觀勢厚薄。余豈可保。能承子託。非我知子。子實命我。猶有鬼神。寧敢遺墮。念子永歸。無復來期。設祭棺前。矢心以辭。嗚呼哀哉。尙饗。

祭女孥子文 韓愈

維年月日阿爹阿八。使汝孀以清酒時果庶羞之奠。祭于第四小娘子孥子之靈。嗚呼。昔汝疾極。值吾南

逐蒼黃分散。使女驚憂。我視汝顏。心知死隔。汝視我面。悲不能啼。我旣南行。家亦隨譴。扶汝上輿。走朝至暮。天雪冰寒。傷汝羸肌。撼頓險阻。不得少息。不能食飲。又使渴飢。死于窮山。實非其命。不免水火。父母之罪。使汝至此。豈不緣我。草葬路隅。棺非其棺。旣瘞遂行。誰守誰瞻。魂單骨寒。無所託依。人誰不死。於汝卽冤。我歸自南。乃臨哭汝。汝目汝面。在吾眼傍。汝心汝意。宛宛可忘。逢歲之吉。致汝先墓。無驚無恐。安以卽路。飲食芳甘。棺輿華好。歸于其丘。萬古是保。尙饗。

祭十二郎文 韓愈

年月日。季父愈聞汝喪之七日。乃能銜哀致誠。使建中遠具時羞之奠。告汝十二郎之靈。嗚呼。吾少孤。及長。不省所怙。惟兄嫂是依。中年兄沒南方。吾與汝俱幼。從嫂歸葬河陽。旣又與汝就食江南。零丁孤苦。未嘗一日相離也。吾上有三兄。皆不幸早世。承先人後者。在孫惟汝。在子惟吾。兩世一身。形單影隻。嫂嘗撫汝指吾而言曰。韓氏兩世。惟此而已。汝時尤小。當不復記憶。吾時雖能記憶。亦未知其言之悲也。吾年十九。始來京城。其後四年。而歸視汝。又四年。吾往河陽省墳墓。遇汝從嫂喪來葬。又二年。吾佐董丞相于汴州。汝來省吾。止一歲。請歸取其孥。明年丞相薨。吾去汴州。汝不果來。是年吾佐戎徐州。使取汝者始行。吾又罷去。汝又不果來。吾念汝從于東。東亦客也。不可以久。圖久遠者。莫如西歸。將成家而致汝。嗚呼。孰謂汝遽去吾而沒乎。吾與汝俱少年。以爲雖暫相別。終當久與相處。故捨汝而旅食京師。以求斗斛之祿。誠知其如此。雖萬乘之公相。吾不以一日輟汝而就也。去年孟東野往。吾書與汝曰。吾年未四十。而視茫茫。而髮蒼蒼。而齒牙動搖。念諸父與諸兄。皆康彊而早世。如吾之衰者。其能久存乎。吾不可去。汝不肯來。恐

且暮死而汝抱無涯之戚也。孰謂少者歿而長者存，彊者夭而病者全乎？嗚呼！其信然邪？其夢邪？其傳之非其真邪？信也。吾兄之盛德而天其嗣乎？汝之純明而不克蒙其澤乎？少者彊者而夭歿，長者衰者而存全乎？未可以爲信也。夢也。傳之非其真也。東野之書，耿蘭之報，何爲而在吾側也？嗚呼！其信然矣。吾兄之盛德而天其嗣矣。汝之純明，宜業其家者，不克蒙其澤矣。所謂天者，誠難測而神者，誠難明矣。所謂理者，不可推而壽者不可知矣。雖然，吾自今年來，蒼蒼者或化而爲白矣，動搖者或脫而落矣，毛血日益衰，志氣日益微，幾何不從汝而死也。死而有知其幾何離，其無知，悲不幾時而不悲者，無窮期矣。汝之子始十歲，吾之子始五歲，少而彊者不可保，如此孩提者，又可冀其成立邪？嗚呼！哀哉！嗚呼！哀哉！汝去年書云：「比得輓脚病，往往而劇。」吾曰：「是疾也，江南之人，常常有之，未始以爲憂也。」嗚呼！其竟以此而殞其生乎？抑別有疾而至斯乎？汝之書，六月十七日也。東野云：「汝歿以六月二日。」耿蘭之報無月日，蓋東野之使者不知問家人以月日。如耿蘭之報，不知當言月日。東野與吾書，乃問使者，使者妄稱以應之耳。其然乎？其不然乎？今吾使建中祭汝，弔汝之孤，與汝之乳母，彼有食可守，以待終喪，則待終喪而取，以來自給，如不能守，以終喪，則遂取以自給。其餘奴婢，並令守汝喪，吾力能改葬，終葬汝於先人之兆，然後惟其所願。嗚呼！汝病吾不知時，汝歿吾不知日，生不能相養以共居，歿不得撫汝以盡哀，斂不憑其棺，窆不臨其穴，吾行負神明，而使汝天，不孝不慈，而不得與汝相養以生，相守以死，一在天之涯，一在地之角，生而影不與吾形相依，死而魂不與吾夢相接。吾實爲之，其又何尤！彼蒼者天，曷其有極！自今已往，吾其無意於人世矣。當求數頃之田於伊潁之上，以待餘年，教吾子與汝子，幸其成長，吾女與汝女，待其嫁，如此而已。嗚呼！言可窮而情

不可終。汝其知也邪？其不知也邪？嗚呼哀哉！尙饗。

祭尹師魯文 歐陽修

嗟乎師魯，辯足以窮萬物，而不能當一獄吏；志可以狹四海，而無所措其一身；窮山之崖，野水之濱，猿獠之窟，麋鹿之羣，猶不容於其間兮，遂卽萬鬼而爲鄰。嗟乎師魯，世之惡子之多，未必若愛子者之衆。何其窮而至此兮，得非命在乎天，而不在乎人？方其奔顛斥逐，困厄艱屯，舉世皆冤，而語言未嘗以自及；以窮至死，而妻子不見其悲忻，用捨進退，屈伸語默，夫何能然？乃學之力，至其握手爲訣，隱几待終，顏色不變，笑言從容，死生之間，旣已能通於性命，憂患之至，宜其不累於心胸。自子云逝，善人宜哀，子能自達，予又何悲？惟其師友之益，平生之舊，情之難忘，言不可究。嗟乎師魯，自古有死，皆歸無物，惟聖與賢，雖埋不沒，尤於文章，焯若星日，子之所爲，後世師法，雖嗣子尙幼，未足以付予，而世人藏之，庶可無於墜失。子於衆人，最愛子文，寓辭千里，侑此一罇，冀以慰子，聞乎不聞。

祭石曼卿文 歐陽修

嗚呼曼卿，生而爲英，死而爲靈，其同乎萬物生死，而復歸於無物者，暫聚之形，不與萬物共盡，而卓然其不朽者，後世之名，此自古聖賢，莫不皆然，而著在簡冊者，昭如日星。嗚呼曼卿，吾不見子久矣，猶能髣髴子之平生，其軒昂磊落，突兀崢嶸，而埋藏於地下者，意其不化爲朽壤，而爲金玉之精，不然，生長松之千尺，產靈芝而九莖，奈何荒煙野蔓，荆棘縱橫，風淒露下，走燐飛螢，但見牧童樵叟，歌吟而上下，與夫驚禽駭獸，悲鳴躑躅而咿嚶，今固如此，更千秋而萬歲兮，安知其不穴藏狐貉，與鼯鼯？此自古聖賢，亦皆然兮。

獨不見夫纍纍乎曠野與荒城。嗚呼曼卿。盛衰之理。吾固知其如此。而感念疇昔。悲涼悽愴。不覺臨風而隕涕者。有媿乎太上之忘情。

祭梅聖俞文 歐陽修

昔始見子。伊川之上。余仕方初。子年亦壯。讀書飲酒。握手相歡。談辨鋒出。賢豪滿前。謂言仕宦。所至皆然。但當行樂。何以憂患。子去河南。余貶山峽。三十年間。乖離會合。晚被選擢。濫官朝廷。薦子學舍。吟哦六經。余才過分。可愧非榮。子雖窮厄。日有聲名。余狷而剛。中遭多難。氣血先耗。髮鬚早變。子心寬易。在險如夷。年實加我。其顏不衰。謂子仁人。自宜多壽。余譬膏火。煎熬豈久。事今反此。理固難知。況於富貴。又何必期。念昔河南。同時一輩。零落之餘。惟予子在。子又去我。余存兀然。凡今之游。皆莫余先。紀行琢辭。子宜余責。送終卹孤。則有衆力。惟聲與淚。獨出余臆。

祭歐陽少師文 曾鞏

惟公學爲儒宗。材不世出。文章逸發。醇深炳蔚。體備韓馬。思兼莊屈。垂光簡編。焯若星日。絕去刀尺。渾然天質。辭窮卷盡。含意未卒。讀者心醒。開蒙愈疾。當代一人。願無儔匹。諫垣抗議。氣震回遙。鼓行無前。跋窳非恤。世僞難勝。孤堅竟窒。紫微玉堂。獨當大筆。二典三謨。生明藏室。頓挫彌厲。誠純志壹。斟酌損益。論思得失。經體慮萌。沃心造膝。帝曰汝賢。引登輔弼。公在廟堂。尊明道術。清靜簡易。仁民愛物。斂不煩苛。令無迫猝。棲置木索。里安戶逸。櫝斂兵革。天清地謐。日進昌言。從容密勿。開建國本。情忠力悉。卯未之歲。龍駕飄歎。再拯大艱。垂紳秉笏。乾坤正位。上下有秩。功被社稷。等夷召畢。公在廟堂。總持紀律。一用公直。兩忘

猜昵不挾朋比。不虞訕嫉。獨立不回。其剛仡仡。愛養人材。獎成誘掖。甄拔寒素。振興滯屈。以爲己任。無有廢咈。維公平生。愷悌忠實。內外洞澈。初終若一。年始六十。懇辭冕黻。連章累歲。乃俞所乞。放意邱樊。脫遺羈轡。沉浸圖史。左右琴瑟。氣志浩然。不陋蓬華。意謂百齡。重休累吉。還幹鼎軸。贊微計密。云胡傾殂。愍遺則弗聞。訃失聲。皆淚橫溢。戇直不敏。早蒙振拔。言繇公誨。行繇公率。戴德不酬。懷情獨鬱。西望輜車。莫持紉紉。維公皦皦。德義譔述。爲後世法。終不泯沒。託辭敝心。曷究髣髴。嗚呼哀哉。

祭歐陽文忠公文 蘇軾

嗚呼哀哉。公之生於世六十有六年。民有父母。國有蒼龜。斯文有傳。學者有師。君子有所恃而不恐。小人有所畏而不爲。譬如大川喬嶽。不見其運動。而功利之及於物者。益不可以數計。而周知。今公之沒也。赤子無所仰。芘朝廷無所稽疑。斯文化爲異端。而學者至於用夷。君子以爲無與爲善。而小人沛然自以爲得時。譬如深淵大澤。龍亡則虎逝。而變怪雜出。舞鱣鱣而號狐狸。昔其未用也。天下以爲病。而其旣用也。則又以爲遲。及其釋位而去也。莫不冀其復用。至其請老而歸也。莫不惆悵失望。而猶庶幾於萬一者。幸公之未衰。孰謂公無復有意於斯世也。奄一去而莫予追。豈厭世溷濁。絜身而逝乎。將民之無祿。而天莫之遺。昔我先君懷寶遁世。非公則莫能致。而不肖无狀。因緣出入。受教於門下者。十有六年於茲。聞公之喪。義當匍匐往救。而懷祿不去。愧古人以忸怩。緘詞千里。以寓一哀而已矣。蓋上以爲天下慟。而下以哭其私。嗚呼哀哉。

潁州祭歐陽文忠公文 蘇軾

嗚呼。軾自齟齬。以學爲嬉。童子何知。謂公我師。晝誦其文。夜夢見之。十有五年。乃克見公。公爲拊掌。歡笑改容。此我輩人。餘子莫羣。我老將休。付子斯文。再拜稽首。過矣。公言。雖知其過。不敢不勉。契闊艱難。見公汝陰。多士方譁。而我獨南。公曰。子來。實獲我心。我所謂文。必與道俱。見利而遷。則非我徒。又拜稽首。有死無易。公雖云亡。言如皎日。元祐之初。起自南遷。叔季在朝。如見公顏。入拜夫人。羅列諸孫。敢以中子。請婚叔氏。夫人曰。然。師友之義。凡二十年。再升公堂。深衣廟門。垂涕失聲。白髮蒼顏。復見穎人。穎人思公。曰。此門生。雖無以報。不辱其門。清潁洋洋。東注于淮。我懷先生。豈有涯哉。

祭范忠宣公文 陳瓘

昔文正公在仁宗時。忠於謀國。衆正所依。心虛而明。照了不疑。先事而慮。有如蓍龜。兩遭勅榜。益奮不移。外禦元昊。數蹈禍機。國勢旣安。奚恤我危。考公行事。允也似之。安不擇地。難不敢辭。至於言兵。則曰。不知豈曰爲異。各遵其時。不述其跡。是乃無違。三年遽改。生事者誰。蔡相南行。公獨救之。一勝一復。其兆在茲。公可以默。又進忱辭。人亦有言。公爾忘私。孰能臨義。捨安取危。一斥四年。盲廢始歸。天子哀憐。拜命涕洟。其心不盲。意欲有施。人願公留。爲帝龍夔。病不能對。人所歎咨。天子曰。吁。疾尙可爲。錫以上劑。臨遣國醫。丁寧訓飭。速療勿遲。云何不淑。竟止於斯。嗚呼哀哉。公果已矣。舉世思公。公不來矣。人之於公。有合有睽。聞公之歿。睽者亦悲。情隔生死。公論乃出。悲公之人。始自今日。臨終不昧。忍死有述。小其一身。大我王室。置小恤大。自初訖終。可使聞者。勸而作忠。太宗征遼。喬死不忘。心之所慮。奚獨一方。願惜生靈。願合朋黨。願爲宣仁。一洗誣謗。願正其事。願辨其人。願以中道。行帝之仁。嗚呼哀哉。言惟心聲。孰無此聲。孰有此誠。

神器雖大。如人之形。愛養胃氣。可以保生。陽明之經。徧於四體。呼吸之間。無有不差。左絡連右。首脈應趾。中經流行。寧有定位。彼執一者。弃異取同。異我曰偏。同我曰中。語各有心。心各有物。孰能審是。而不彼恤。公獨有言。繼者誰乎。公薨我悲。豈緣葭莩。昔公南遷。我在北陲。側身以望。心往從之。及公之還。我有言責。陳留雖近。欲往不得。平生想慕。獨未識公。見公之心。何必形容。文正歿後。公又亡矣。仲季方興。公復有子。其門益大。其道益光。公可無憾。我亦奚傷。

祭陳同父文 辛棄疾

嗚呼。同父之才。落筆千言。俊麗雄偉。珠明玉堅。人方窘步。我則沛然。莊周李白。庸敢先鞭。同父之志。平蓋萬夫。橫渠少日。慷慨是須。擬將十萬。登封狼胥。彼臧馬輩。殆其庸奴。天子同父。旣豐厥稟。智略橫生。議論風凜。使之早遇。豈媿口伊。行年五十。猶一布衣。間以才豪。跌宕四出。要其所厭。千人一律。不然少貶。動顧規檢。夫人能之。同父非短。至今海內。能誦三書。世無楊意。孰主相如。中更險困。如履冰崖。人皆欲殺。我獨憐才。脫廷尉繫。先多士鳴。耿耿未阻。厥聲浸宏。蓋至是而世未知同父者。益信其爲天下之偉人矣。嗚呼。人才之難。自古而然。匪難其人。抑難其天。使乖崖公而不遇。安得征吳入蜀之休績。太原決勝。卽異時落魄之齊賢。方同父之約處。孰不望夫上之人。謂握瑜而不宣。今同父發策大廷。天子親寘之第一。是不憂其不用。以同父之才與志。天下之事。孰不可爲。所不能自爲者。天靳之年。閩浙相望。信問未絕。子胡一病。遽與我訣。嗚呼同父。而止是邪。而今而後。欲與同父憩鵝湖之清陰。酌飄泉而共飲。長歌相答。極論世事。可復得邪。千里寓辭。知悲之無益。而涕不能已。嗚呼同父。尙或臨鑒之否。

祭望谿先生文 劉大櫟

嗚呼漢氏以來羣儒區區六經之道雖闢而蕪惟公治之究其根株如受衡量不溢黍銖春秋諸傳類多齟齬公比其事孔想昭蘇周官士禮久荒不鉏斲璞出玉朗然蚪珠一言之立百世可孚從祀闕里亦其宜與公之懷抱邁登黃虞少而多難百不一摠晚貳宗伯日進訏謨邨童野老跂足以須彼譖人者謂公釣譽誰實爲此嗟嗟鄙夫公則猶是民也何辜公倡大義衆見爲迂最知公者高安相朱慨彼世俗僅識公竊擬之周士子美夷吾申施未竟孰謂非誣至於文章乃公緒餘然其所爲鬼闕神敷燔剝六藝炙剔膏腴高堂黼座正冠危裾雲升水涌風日晴舒卑視魏晉有如隸奴公之孺慕無閒須臾遭值母喪不獲歸廬而於藩府纓佩以趨抱痛一世泣血漣如善事其兄情至禮俱庇其兄子過於己雖尤於朋友擢膺磨膚相責以義言不囁嚅同里左丈一心相於生闕死別終始不渝屢見於文哀情旣鋪逮其孫子眷眷呵噓不材如櫟舉世邪歛公獨左顧栽植其枯雖之灌之使之榮莠提之挈之免於饑驅誘而掖之振聵開愚卒令頑鈍稍識夷途歲在癸丑詔徵鴻儒公以櫟應瑟濫以竽我營薄祿過願所圖喜動於色背汗有濡櫟試而蹶公每不愉愀然累日頓足長吁歷數平生游好之徒苟其傑立輒見次且豈彼蒼意固與人殊我實卷曲分甘泥塗而廬公念乃至斯乎當公少日備歷崎嶇匪敢玩愒愈勇讀書其治三禮半在囚拘死而後已其生不虛公旣歸里幅巾袴襦治城之北有山有湖水亭風榭嘉木扶疎跳波出曝穹龜長魚嘉賓燕集不廢菑畬九治士禮積疑未祛乃今十治早夜勤劬屈指成就當在秋初天桃華灼攜我嬉娛登樓拾級不賴人扶謂公矍鑠百年可逾詎知背面五月而徂公平何忍不我少需嗚呼公之名德

照耀海隅。年躋大耋。尙何煩紆。惟其平昔。師友諮諏。望望不見。所爲歎歎。尙饗。

祭妹文 袁枚

乾隆丁亥冬。葬三妹素文於上元之羊山。而奠以文曰。嗚呼。汝生於浙而葬於斯。離吾鄉七百里矣。當是時。雖綺夢幻想。寧知此爲歸骨所耶。汝以一念之貞。遇人仇離。致孤危托落。雖命之所存。天實爲之。然而累汝至此者。未嘗非予之過也。予幼從先生授經。汝差肩而坐。愛聽古人節義事。一旦長成。遽躬蹈之。嗚呼。使汝不識詩書。或未必艱貞若是。余捉蟋蟀。汝奮臂出。其間。歲寒蟲僵。同臨其穴。今予殮汝葬汝。而當日之情形。憬然赴目。予九歲。憩書齋。汝梳雙髻。披單縑。來溫緇衣一章。適先生爹戶入。聞兩童子音琅琅然。不覺莞爾。連呼則則。此七月望日事也。汝在九原。當分明記之。予弱冠。粵行。汝倚裳悲慟。逾三年。予披宮錦還家。汝從東廂扶案出。一家瞠視而笑。不記語從何起。大概說長安登科函使報信遲早云爾。凡此瑣瑣。雖爲陳迹。然我一日未死。則一日不能忘。舊事填膺。思之淒梗。如影歷歷。逼取便逝。悔當時不將嬾媿情狀。羅縷紀存。然而汝已不在人間。則雖年光倒流。兒時可再。而亦無與爲證印者矣。汝之義絕高氏而歸也。堂上阿嫺。仗汝扶持。家中文墨。眈汝辦治。嘗謂女流中最少明經義。諳雅故者。汝嫂非不婉孌。而於此微缺。然故自汝歸後。雖爲汝悲。實爲予喜。予又長汝四歲。或人間長者先亡。可將身後託汝。而不謂汝之先予以去也。前年予病。汝終宵刺探。減一分則喜。增一分則憂。後雖小差。猶尙殮殍。無所娛遣。汝來牀前。爲說稗官野史。可喜可愕之事。聊資一懽。嗚呼。今而後。吾將再病。教從何處呼汝耶。汝之疾也。予信醫言無害。遠弔揚州。汝又慮戚吾心。阻人走報。及至。綿惓已極。阿嫺問望兄歸否。強應曰諾。已予先一日。

夢汝來訣。心知不祥。飛舟渡江。果予以未時還家。而汝以辰時氣絕。四支猶溫。一目未瞑。蓋猶忍死待予也。嗚呼痛哉。早知訣汝。則予豈肯遠游。卽游亦尙有幾許。心中言。要汝知聞。共汝籌畫也。而今已矣。除吾死外。當無見期。吾又不知何日死。可以見汝。而死後之有知無知。與得見不得見。又卒難明也。然則抱此無涯之憾。天乎人乎。而竟已乎。汝之詩。吾已付梓。汝之女。吾已待嫁。汝之生平。吾已作傳。惟汝之窀穸。尙未謀耳。先塋在杭。江廣河深。勢難歸葬。故請母命。而寧汝於斯。便祭掃也。其旁葬汝女阿印。其下兩冢。一爲阿爺侍者朱氏。一爲阿兄侍者陶氏。羊山曠渺。南望原隰。西望棲霞。風雨晨昏。羈魂有伴。當不孤寂。所憐者。吾自戊寅年。讀汝哭姪詩後。至今無男。兩女牙牙。生汝死後。纔周晬耳。予雖親在。未敢言老。而齒危髮禿。暗裏自知。知在人間。尙復幾日。阿兄遠官河南。亦無子女。九族無可繼者。汝死我葬。吾死誰埋。汝尙有靈。可能告我。嗚呼。生前旣不可想。身後又不可知。哭汝旣不聞。汝言奠汝。又不見汝食。紙灰飛揚。朔風野大。阿兄歸矣。猶屢屢回頭望汝也。嗚呼哀哉。嗚呼哀哉。

祭劉海峯先生文 姚 鼐

嗚呼。自聖有述。道存乎文。孔徒之傑。與顏同倫。周室世衰。末流歧分。或鳴爲技。或以道陳。迄千餘年。其傳緜緜。豈無才士。識闡其本。苟爲僨強。卒躓而隕。聖言載世。有炳其光。蔽晦於曠。日月何傷。吾鄉宗伯。勇繼絕軌。甘嗜胸臆。寧遺腴旨。賅萬逾俗。去古則咫。先生再興。益殫厥美。上與詩書。應其宮徵。抉搜百家。掩取瑰偉。抑揚從心。不見端委。日麗春敷。雖妍不靡。世有斯文。千載之雄。百世所述。當世則窮。半生場屋。老授學官。卒亦不居。退處江干。天奪其子。獨與以朋。昔我伯父。始與並興。和爲文章。執聖以繩。劇談縱笑。據几

執觥。召我總角。左右是譽。賤子旣冠。於京復見。先生執手。爲我嗟歎。嗣學古人。以任道期。疊疊其文。以贈吾離。其後閱年。又逾二十。豈徒君耄。猶亦衰及。念吾伯父。相見以泣。先生益病。侍帷妻妾。要我牀前。強坐業業。猶有高言。記爲士法。孰承遺書。竟委几榻。舉世茫茫。使我孤立。有言莫陳。終古於邑。嗚呼尙饗。

祭朱竹君學士文 姚 鼎

嗚呼。海內萬士。於中有君。其氣超然。不可輩羣。余始畏焉。曰師非友。辱君下交。以爲吾耦。自處京師。君日從語。執拒相諍。卒承諧許。或歲或月。以事閒之。清辭酒態。靡不可思。予與君決。乙未之春。有言握手。期我古人。君之屬文。如江河匯。不擇所流。蕩無外內。焱怒濤驚。復於恬靡。小泚澄潭。亦可以喜。世皆知君。文士之碩。莫見君心。堅如金石。不爲勢趨。不爲利昧。吃口澁辭。遇義大啓。嗚呼今日。士氣之衰。天留一人。庶卒振之。七年江濱。日思君面。已矣及今。終不可見。嗚呼尙饗。

祭湯海秋文 曾國藩

赫赫湯君。倏焉已陳。一呬之藥。椽我天民。豈不有命。藥則何辜。死而死耳。知君不悔。道光初載。君貢京朝。狂名一鼓。萬口囂囂。春官名揭。如纛斯標。奇文驟布。句驚字梟。羣兒苦誦。自暝達朝。上公好士。維汪與曹。大風噓口。吹女羽毛。舐筆樞府。有銛如刀。儕輩力逐。一虎衆獠。曹司一終。稍遷御史。一鳴驚天。墮落泥滓。坎坎郎官。復歸其始。羣雀款門。昨鼂之市。窮鬼噴沫。婢歎奴恥。維君不差。復乃不求。天脫桎梏。放此詩囚。伐肝蕩肺。與命爲仇。被髮四顧。有棘在喉。匪屈匪阮。疇可與投。忽焉狂走。東下江南。秦淮夜醉。笙吹喃喃。是時淮海。戰鼓殷酣。狄夷所躪。肉阜血潭。出入賊中。百憂內慄。寅歲還朝。左抱嬌娥。示我百篇。兒女兵戈。

三更大叫君泗余哦。忽瞠兩眸曰。余乃頗瀝膽相要。斧門培鎖。嗟余不媚。動與時左。非君謬辱。誰云逮我。王城海大。塵霧滔滔。惟余諸子。有隙輒遭。聯車酒肆。袒肩載號。煮魚大噉。宇內兩饜。授我浮邱。九十其訓。韓悍莊誇。孫卿之醞。麀義鬪文。百合逾奮。俯視符充。其言猶糞。我時譏評。君曾不愠。我行西川。來歸君逝。一語不能。君乃狂罵。我實無辜。詎敢相下。骨肉寇讐。朋遊所訝。見豕負塗。或張之弧。羣疑之積。衆瘡生膚。君不能釋。我不肯輸。一日參商。萬古長訣。吾實負心。其又何說。凡今之人。善調其舌。君則不然。喙剛如鐵。鋒稜所值。人誰女容。直者棄好。巧者興戎。昔余痛諫。君嘉我忠。曾是不察。而丁我躬。傷心往事。淚墮如糜。以君毅魄。豈曰無知。鬼神森列。吾言敢欺。酌子一滴。庶攄我悲。

祭胡文忠公文 左宗棠

維咸豐十一年。良月宜祭之辰。太常寺卿左宗棠。謹以豕一。羊一。酒醴之儀。致祭於光祿大夫太子太保兵部侍郎巡撫湖北提督軍務胡公詠芝尊兄大人之靈。而長言以申其哀。曰。我生於湘。公產於資。歲在壬申。夏日冬時。詹事文學。讀書麓山。兩家生子。舉酒相歡。我甫逾冠。獲舉於鄉。見公京師。猶躡文場。縱言闊步。氣豪萬夫。我謦公喟。公步我趨。羣兒睨眎。詫爲迂怪。我剛而褊。公通且介。諧謔雜遝。不忘箴言。庭誥相勉。道義是敦。公官翰林。我蟄鄉里。中間契闊。蓋數稊耳。公守黔中。我居壻鄉。歲比不登。盜無餘糧。使來自黔。械金貺我。欣欣度臘。返券舉火。光豐之交。盜起蒼黃。紅巾白梃。踰嶺下湘。我治軍書。入居湘幕。公帥湘人。建牙於鄂。六七年間。湘固鄂完。我司其隱。公任其難。江漢滔滔。用武之國。公總上游。以規皖北。前羅後李。楚之良也。公帥以聽。位高心下。曾侯觥觥。當世所宗。公與上下。如雲與龍。養士致民。恤農通商。斂此

大惠施於一方。我方憂讒。圖隱京門。晤公英山。尊酒相溫。公憫我遭。俛焉若盡。憂蘊於中。義形於色。我反
 慰公何遽至此。天信吾道。猶來無止。流連經時。辭公返湘。有命自天。襄事戎行。載旆東徂。數挫賊氛。公聞
 則喜。謂我能軍。我嘗戲公。吾豈妄耶。憂虞方殷。謬語相夸。安慶既下。黃州隨之。桐舒疊克。復徽與池。賊萃
 吳越。猶癰斂口。協力並規。庶殲羣醜。何圖我公。積勞成瘵。中興可期。長城遽壞。書來訣我。勞者思憩。君等
 勉旃。吾從此逝。啓函涕零。亟致良藥。蒼頭馳齋。七日至鄂。使還告我。詳訊寢食。公臥射堂。屏退婦稚。血盡
 嗽急。膚削骨峙。頻聞吉語。笑僅見齒。鼎湖龍去。攀號不遂。以首觸牀。有泣無淚。嗚呼公乎。而竟已矣。彭殤
 淵。臆均之一死。況公名業。震今鑠古。絳灌無文。隨陸無武。勞臣斯瘳。歿乃暫逸。委形觀化。祛煩已疾。君子
 曰。終得正斯。可以此哀。公公應笑我。悠悠我思。不寧惟是。交公弱年。哭公墓齒。自公云亡。無與爲善。孰拯
 我窮。孰救我褊。我憂何訴。我喜何告。我苦何憐。我死何弔。追維疇昔。歷三十年。一言一笑。愈思愈妍。公之
 嗣子。我外孫夫。今我於外。罔恤其孤。公之先塋。屢思改卜。執紼未能。莫相負築。遺文無多。可以餉蠹。章疏
 琅琅。關係國故。當以暇時。爲之校刪。上之史館。藏之名山。我當力戰。罔敢定居。以終公志。以實公譽。儻遂
 生還。梓洞柳莊。當展公墓。兼省福郎。靈輻西返。不獲走送。陳詞酌酒。聊以志慟。有酒如池。有淚如絲。盡此
 一哀。公其鑒茲。

祭夫徐悱文 劉令嫺

維梁大同五年。新婦謹薦少牢於徐府君之靈曰。惟君德爰禮智。才兼文雅。學比山成。辯同河瀉。明經擢
 秀。光朝振野。調逸許中。聲高洛下。含潘度陸。超終邁賈。二儀旣肇。判合始分。簡賢依德。乃隸夫君。外治徒

奉內佐無聞。幸移蓬性。頗習蘭薰。式傳琴瑟。相酬典墳。輔仁難驗。神情易促。電碎春紅。霜凋夏綠。躬奉正衾。親觀啓足。一見無期。百身何贖。嗚呼哀哉。生死雖殊。情親猶一。敢遵先好。手調薑橘。素俎空乾。奠觴徒溢。昔奉齊眉。異於今日。從軍暫別。且思樓中。薄游未反。尙比飛蓬。如當此訣。永痛無窮。百年何幾。泉穴方同。

哀祭類

諭祭文

諭祭贈資政大夫南京禮部尙書裴爵并配贈夫人楊氏封太夫人郟氏文 歸有光

維爾性含淳質。家承素風。有子爲文學之臣。進位膺秩宗之命。贈封荐被。伉儷偕榮。考其積累之原。實由善德之致。再稽令式。憫恤宜厚。於厥終爰軫疏聞。寵數特申。於併錫賁茲新竊。祭以共牢。尙其冥靈。歆此嘉饗。

哀祭類

哀詞

仲雍哀辭 曹植

曹喈字仲雍。魏太子之仲子也。三月而生。五月而亡。昔后稷之在寒冰。鬪穀之在楚澤。咸依烏馮虎。而無風塵之災。今之元締文茵。無寒冰之慘。羅幃綺帳。暖於翔鳥之翼。幽房閑宇。密於雲夢之野。慈母良保。仁乎烏虎之情。卒不能延期於慕載。離六旬而天殃。彼孤蘭之眇眇。亮成幹其畢榮。哀綿綿之弱子。早背世

而潛形。且四孟之未周。將願之乎一齡。陰雲回於素蓋。悲風動其扶輪。臨筵闔以歛歔。淚流射而沾巾。

金瓠哀辭 曹植

金瓠予之首女。雖未能言。固已授色知心矣。生十九旬而夭折。乃作此辭。辭曰。

在襁褓而撫育。尙孩笑而未言。不終年而天絕。何見罰於皇天。信吾罪之所招。悲弱子之無譽。去父母之懷抱。滅微骸於糞土。天長地久。人生幾時。先後無覺。從爾有期。

行女哀辭 曹植

行女生於季秋。而終於首夏。三年之中。二子頻喪。伊上帝之降命。何修短之難裁。或華髮以終年。或懷妊而逢災。感前哀之未闕。復新殃之重來。方朝華而晚敷。比辰露而先晞。感逝者之不追。悵情忽而失度。天蓋高而無階。懷此恨其誰訴。

哀永逝文 潘岳

啓夕兮宵興。悲絕緒兮莫承。俄龍韞兮門側。嗟俟時兮將升。嫂姪兮悼惶。慈姑兮垂矜。聞鳴雞兮戒朝。咸驚號兮撫膺。逝日長兮生年淺。憂患衆兮歡樂尠。彼遙思兮離居。歎河廣兮宋遠。今奈何兮一舉。邈終天兮不反。盡余哀兮祖之晨。揚明燎兮援靈輶。徹房帷兮席庭筵。舉酌觴兮告永遷。悽切兮增歎。俯仰兮揮淚。想孤魂兮眷舊宇。視倏忽兮若髣髴。徒髣髴兮在慮。靡耳目兮一遇。停駕兮淹留。徘徊兮故處。周求兮何獲。引身兮當去。去華輦兮初邁。馬回首兮旋旆。風泠泠兮入帷。雲霏霏兮承蓋。鳥俛翼兮忘林。魚仰沫兮失瀨。悵悵兮遲遲。遵吉路兮凶歸。思其人兮已滅。覽餘迹兮未夷。昔同塗兮今異世。憶舊歡兮增新悲。

謂原隰兮無畔。謂川流兮無岸。望山兮寥廓。臨水兮浩汗。視天日兮蒼茫。面邑里兮蕭散。匪外物兮或改。固歡哀兮情換。嗟潛隧兮既敞。將送形兮長往。委蘭房兮繁華。襲窮泉兮朽壤。中慕叫兮擗標。之子降兮宅兆。撫靈櫬兮訣幽房。棺冥冥兮挺窈窈。戶闔兮燈滅。夜何時兮復曉。歸反哭兮殯宮。聲有止兮哀無終。是乎非乎何遑。趣一遇兮目中。既遇目兮無兆。曾寤寐兮弗夢。既顧瞻兮家道。長寄心兮爾躬。重曰。已矣。此蓋新哀之情然耳。渠懷之其幾何。庶無愧兮莊子。

金鹿哀辭 潘岳

嗟我金鹿。天姿特挺。鬢髮凝膚。蛾眉蟻領。柔情和泰。朗心聰警。嗚呼上天。胡忍我門。良嬪短世。令子天昏。既披我幹。又翦我根。塊如瘞木。枯荜獨存。捐子中野。遵我歸路。將反如疑。回首長顧。

歐陽生哀辭 并序 韓愈

歐陽詹世居閩越。自詹已上。皆爲閩越官。至州佐縣令者。累累有焉。閩越地肥衍。有山泉禽魚之樂。雖有長材秀民。通文書吏事。與上國齒者。未嘗肯出仕。今上初。故宰相常袞。爲福建諸州觀察使。治其地。袞以文辭進。有名於時。又作大官。臨莅其民。鄉縣小民。有能誦書作文辭者。袞親與之爲客主之禮。觀遊晏饗。必召與之。時未幾。皆化翕然。詹于時獨秀出。袞加敬愛。諸生皆推服。閩越之人舉進士。繇詹始。建中貞元間。余就食江南。未接人事。往往聞詹名。閭巷間。詹之稱於江南也久。貞元三年。余年十九。始至京師。舉進士。聞詹名尤甚。八年夏。遂與詹文辭同考試。登第始相識。自後詹歸閩中。余或在京師。他處不見詹久者。唯詹歸閩中時爲然。其他時。與詹離率不歷歲。移時則必合。合必兩忘其所趨。久然後去。故余與詹相知。

爲深。詹事父母盡孝道。仁於妻子。於朋友義以誠。氣醇以方。容貌嶷嶷然。其燕私善謔以和。其文章切深。喜往復。善自道。讀其書。知其於慈孝最隆也。十五年冬。余以徐州從事。朝正于京師。詹爲國子監四門助教。將率其徒伏闕下。舉余爲博士。會監有獄不果上。觀其心有益於余。將忘其身之賤而爲之也。嗚呼。詹今其死矣。詹閩越人也。父母老矣。捨朝夕之養。以來京師。其心將以有得於是。而歸爲父母榮也。雖其父母之心亦皆然。詹在側。雖無離憂。其志不樂也。詹在京師。雖有離憂。其志樂也。若詹者。所謂以志養志者歟。詹雖未得位。其名聲流於人人。其德行信於友朋。雖詹與其父母皆可無憾也。詹之事業文章。李翱旣爲之傳。故作哀辭以舒余哀。以傳於後。以遺其父母而解其悲哀。以卒詹志云。

求仕與友兮。遠違其鄉。父母之命兮。子奉以行。友則旣獲兮。祿實不豐。以志爲養兮。何有牛羊。事實旣修兮。名譽又光。父母欣欣兮。常若在傍。命雖云短兮。其存者長。終要必死兮。願不永傷。友朋視疾兮。藥物甚良。飲食孔時兮。所欲無妨。壽命不齊兮。人道之常。在側與遠兮。非有不同。山川阻深兮。魂魄流行。祀祭則及兮。勿謂不通。哭泣無益兮。抑哀自強。推生知死兮。以慰孝誠。嗚呼哀哉兮。是亦難忘。

獨孤申叔哀辭 韓愈

衆萬之生。誰非天邪。明昭昏蒙。誰使然邪。行何爲而怒。居何故而憐邪。胡喜厚其所可薄。而恆不足於賢邪。將下民之好惡。與彼蒼懸邪。抑蒼茫無端。而慙寓其間邪。死者無知。吾爲子慟而已矣。如有知也。子其自知之矣。濯濯其英。曄曄其光。如聞其聲。如見其容。烏虜遠矣。何日而忘。

蘇明允哀詞 并序 曾鞏

明允姓蘇氏諱洵眉州眉山人也始舉進士又舉茂才異等皆不中歸焚其所爲文閉戶讀書居五六年所有旣富矣乃始復爲文蓋少或百字多或千言其指事析理引物託諭侈能盡之約遠能見之近大能使之微小能使之著煩能不亂肆能不流其雄壯俊偉若決江河而下也其輝光明白若引星辰而上也其略如是以余之所言於余之所不言可推而知也明允每於其窮達得喪憂歎哀樂念有所屬必發之於此於古今治亂興壞是非可否之際意有所擇亦必發之於此於應接酬酢萬事之變者雖錯出於外而用心於內者未嘗不在此也嘉祐初始與其二子軾轍復去蜀遊京師今參知政事歐陽公修爲翰林學士得其文而異之以獻於上旣而歐陽公爲禮部又得其二子之文擢之高等於是三人之文章盛傳於世得而讀之者皆爲之驚或歎不可及或慕而效之自京師至于海隅障徼學士大夫莫不人知其名家有其書旣而明允召試舍人院不至特用爲祕書省校書郎頃之以爲霸州文安縣主簿編纂太常禮書而軾轍又以賢良方正策入等於是三人者尤見於當時而其名益重於天下治平三年春明允上其禮書未報四月戊申以疾卒享年五十有八自天子輔臣至閭巷之士皆聞而哀之明允所爲文有集二十卷行於世所集太常因革禮一百卷更定諡法二卷藏於有司又爲易傳未成讀其書者則其人之所存可知也明允爲人聰明辯智遇人氣和而色溫而好爲策謀務一出己見不肯躡故迹頗喜言兵慨然有志於功名者也二子軾爲殿中丞直史館轍爲大名府推官其年以明允之喪歸葬於蜀地旣請歐陽公爲其銘又請余爲辭以哀之曰銘將納之於壙中而辭將刻之於冢上也余辭不得乃爲其文曰嗟明允兮邦之良氣甚夷兮志則彊閱今古兮辨興亡驚一世兮擅文章御六馬兮馳無疆決大河兮嚙

浮桑粲星斗兮射精光。衆伏玩兮彫肺腸。自京師兮泊幽荒。矧二子兮與翱翔。唱律呂兮和宮商。羽義義兮勢方颺。孰云命兮變不常。奄忽逝兮汴之陽。維自著兮曄煌煌。在後人兮慶彌長。嗟明允兮庸何傷。

蔣季高哀辭 并序 宋 濂

至正丁酉秋七月壬午。濂畏暑。被髮行青松間。忽有客自東陽來。曰。蔣季高氏歿矣。濂聞已。哭之哀。哭已。進客問狀。客曰。前日戊辰。季高以事如縣中。己巳。卽有滯下之疾。晝夜行百餘里。久之熱發。體中如火。其兄伯康懼。亟呼醫視之。醫至。脈已絕矣。自己巳至今月甲戌。僅六日。而遽至於亡。濂聞已。復哭之哀。乃尤天曰。嗚呼悲乎。不知何繇而天吾季高乎。使季高其行負天地。愧神明。天之可也。季高恂恂儒者。非其道弗言也。非其道弗爲也。言其事親。則孝而恭。處伯仲。則穆而和。交朋友。則信而貞。遇族姻。則惇而莊。接閭黨。則惠而慈。求其致天之繇。無有也。今季高何爲。乃邁爾乎。豈高高在上。果不可必乎。抑其視夢夢。不能別善惡乎。所謂天道常與善人。其尙足徵乎。嗚呼悲乎。初濂年二十餘。頗嗜學。聞文懿許公弟子三衢方先生。以性理學講授東陽之南溪。徒步往從之游。先生所主。蓋蔣君子晦家子晦。季高父也。濂因獲交季高父子間。時季高尙未冠。卽能執經問難。進退雍容。肌肉若玉。雪可愛。歲幾何。旣哭其父。今又哭季高焉。則夫人世如傳舍者。可不信乎。嗚呼悲乎。季高篤意於學。方先生旣歿。復負笈師事侍講黃公。會濂亦執洒掃之役於公門。與季高交益密。季高日出所爲文。皆雅馴可傳誦。濂甚敬之。每一會。繡湖上。輒握手吐肺肝。間酒酣氣豪。競出慷慨背俗語。季高喜。益與濂親。季高善辨說。袞袞數千言不休。濂不能屈。每務力勝之。於是各大笑而止。且曰。良會不可數。一嘻笑。一怒罵。皆別後之相思。當時出此言。亦以爲常。豈知別

後之相思者。乃爲死後之相哀乎。心雖如鐵石。其不爲季高一酸辛乎。嗚呼悲乎。去年之春。季高有書來曰。東西二峴山。無君足跡十年矣。縱不爲吾行。其可貽山靈之所笑乎。濂方閉戶著書。跬步弗妄出。不及如季高言。濂所居實浦。汭青蘿山。山中林樾蒼潤。狐猿野鶴。見人了無驚猜意。而梅花泉。又極可飲。濂自念。雖不能爲季高往。季高。清俊士。折簡招之。或可一來。當共飲水。哦詩。或投壺。白雲間。亦一樂也。豈知季高。遽棄濂而長逝乎。峴山之蒼翠。固在眼。寧不對之墮淚。如襄陽乎。雖欲重登。顧後瞻前。而季高不見。又寧不爲之感慨乎。嗚呼悲乎。季高之太夫人。年踰八十。母夫人髮亦種種。而三子方纍纍在疚。長者僅七齡。幼者尙居乳哺中。惻然可念。季高之死。兩目能遽瞑乎。嗚呼悲乎。季高已矣。濂將撫季高羣行爲書。以信後世。適有故未及爲。姑撰哀辭一通。焚之於墓。以寫中心之悲。季高其能有知乎。抑無知乎。岱嶽可移。瀛海可填。濂之哀吾季高者。尙何時而已乎。嗚呼悲乎。嗚呼悲乎。季高諱允叔。季高其字也。卒時年二十九云。辭曰。

有木蕤蕤兮。嗚呼。將鬯其施兮。嗚呼。霜雪何爲兮。嗚呼。竟從而折之兮。嗚呼。天者不可知兮。嗚呼。千載之悲兮。嗚呼。

余通判哀辭 并序 李東陽

南昌余鼎實爲温州通判。藩臬部使者交薦其賢。獲荷錫典。成化丁酉。述職京師。道南昌。卒於家。君之季實娶於學士謝先生之子。先生與君厚且親。謂其材行有餘。而位與壽皆弗稱。可哀也。旣爲文以傳其家。復屬予爲之辭。其辭曰。

油屏兮檠輶。侯之來兮越州。山川繆兮阻且修。歲奄忽兮春復秋。吏民歌兮擁道周。侯將行兮不可留。鸞書兮錦裳。侯之歸兮故鄉。入我戶兮登我堂。子列侍兮孫扶將。志弗違兮身靡康。胡爲中年兮罹此殃。越之岡兮楚之阪。魂朝馳兮暮返。望東皋兮野色。芳草萋兮旣晚。慨時命兮不逢。哀壯士兮中蹇。渺巫占兮詹卜。誰復問兮修短。長繩兮落日。蒼天茫茫兮豈其可綰。吉地兮良辰。侯之輶兮兩輪。佳城鬱兮彼原。送者默兮如雲。紼有緼兮刻有文。生弗達兮死有聞。九原兮可興。亦將感兮吾文。

鍾廣漢哀詞 井序 汪琬

樵李鍾淵映廣漢。年二十餘。囊所著書數千言。來游京師。介其友葉生元禮。凡三至吾廬。旣相見。數與予辨論六經諸史之源流。詩歌古文辭之利病。與自唐以來諸大家之門庭曲折。口哆目張。洋洋纒纒。夜漏逾四十刻而猶不止。予欲傲之以所不能知。而廣漢性甚敏。識甚高。俛仰前古。蓋其不知者無幾也。使稍抑其盛氣。而加深思焉。則進於古人也不難。顧別之旬日。而元禮來告廣漢已暴卒矣。夫士死曰不祿。短折亦曰不祿。今廣漢兼此二者。其可哀也。嗚呼。豈造物者故畀之以才。而又不欲其成。且立耶。豈豐於此必嗇於彼。固有默焉司其進退。予奪者耶。豈亦聽人之自生自死。自壽自夭於其閒。雖造物不能有其權耶。洵乎其可哀也已。或謂廣漢血不華色。又其面豐上銳下。以相法言之。皆不壽。此則非予所得而測也。姑爲辭曰。

文木雖美。遇匠則斲。榼梨果蓏。實盛則剝。是而所是。非而所非。氣壯且銳。持此安歸。故曰毋以物傷生。毋以身徇名。已乎廣漢。其亦知之耶。使其有知。又將誰尤。

宣左人哀詞 有序 方苞

左人與余生同郡。長而客遊四方。往還離合逾二十年。而爲汎交。己丑庚寅間。余瀕至淮上。左人授徒邗江。道邗。數與語。始異之。其家在龍山。吾邑山水奇勝處也。每語余居此之樂。而自恨近六十。猶栖栖於四方。余久寓金陵。亦倦遊。思還故里。遂以辛卯正月。至其家。左山右湖。皋壤如沐。留連信宿。相期匝歲。定居於此。而是冬十月。以南山集牽連被逮。時左人適在金陵。急余難。與二三骨肉兄弟之友相後先。在諸君子不爲異。而余固未敢以望於左人也。壬辰夏。余繫刑部。左人忽入視。問何以來。則他無所爲。將歸。謂余曰。吾附人舟車。不自由。以天之道。子無恙。尋當歸。吾終待子龍山之陽矣。及余邀寬法出獄。隸漢軍。欲附書報左人。而鄉人來言。左人死矣。時康熙二十五年也。龍山地偏而俗淳。居者多壽者。左人父及伯叔父。皆八九十。左人貌魁然。其神凝然。人皆曰當得大年。雖左人亦自謂然。而竟止於此。余與左人相識幾三十年。而不相知。相知踰年。而余及於難。又踰年。而左人死。雖欲與之異地相望。而久困窮。亦不可得。此恨有終極耶。辭曰。

嗟子精爽之爛然兮。今已陰爲野土。閉兩心之所期兮。永相望於終古。川原信美而可樂兮。生如避而死歸。解人世之糾纏兮。得甘寢其何悲。

武季子哀詞 有序 方苞

康熙丙申夏。聞武君商平之喪。哭而爲墓表。將以歸其孤。冬十月。孤洙至京師。曰家散矣。父母大父母諸兄七喪。蔑以葬。爲是以來。叩所學。則經書能背誦矣。授徒某家。冬春閒數至。假唐宋諸家古文。自繕寫。首

夏。余出塞返役。而洙死已浹月矣。始商平有子三人。余皆見其孩提以及成人。長子洛爲邑諸生。卒年二十有四。次子某年二十有一。將受室而卒。洙其季也。憶洙五六歲時。余過商平。常偕羣兒喧聒左右。少長抱書從其父往來。余家。及至京師。則幹軀偉然。余方欲迪之學行。以嗣其宗。而遽以羈死。有子始二歲。商平生故家。而窶艱迫阨。視細民有甚焉。又父母皆篤老。煩急家事。凌雜米鹽。無幾微輒生瑕釁。然卒能納身隱情。以盡其恩。而不愆於義。余每歎其行之難也。而旣羸其躬。復札其後嗣。嗚呼。世將絕而後乃繁昌者。於古有之矣。其果能然也耶。洙卒於丁酉十月十日。年二十有一。藁葬京師郭東江寧義塚。余志歸其喪。事有待。先以鳴余哀。其辭曰。

嗟爾生兮。震愆。罹百憂兮。連延。蹇孤遊兮。局窄。命支離兮。爲鬼客。天屬盡兮。犖犖。羌地下兮。相從。江之干兮。淮之汭。翳先靈兮。日延企。魂朝發兮。暮可投。異生還兮。路阻修。孺子號兮。在室。永護訶兮。無失。

母弟溫甫哀詞 有序 曾國藩

咸豐五年十月。賊目僞翼王石達開引其黨自湖北通城竄入江西。別有廣東匪徒。曰周培春。葛耀明。關志江者。自湖南茶陵州竄入。與石逆相聚於新昌縣。周培春等投歸石逆部下。願爲前驅。石逆授之僞職。將軍總制軍師旅帥之類。兩逆黨者。合併爲一。江西亂民從之如歸。贛水以西。望風瓦解。十一月初十日。攻陷瑞州府。明日陷臨江。晦日袁州繼陷。遂圍吉安。明年正月二十五日陷之。余檄副將周鳳山率九江之師入援。二月十八日。軍敗於樟樹鎮。而撫州建昌兩府。以是月之季。相踵淪沒。國藩躬率水陸諸軍。自湖口入援。而南康又沒於賊矣。九江自爲賊踞如故。凡江西土地棄之賊中者。爲府八。爲州若縣若廳五。

十有奇。天動地岌。人心惶惶。訛言一夕數驚。或奔走奪門。相踐死。楚軍困於江西。道閉不得通鄉書。則募死士蠟丸隱語。乞援於楚。賊亦益布金錢。購民間捕索楚人。致密書者。殺而榜諸衢。前後死者百輩。無得脫免。吾弟國華溫甫。自湘中閒關走武昌。乞師以拯江西。於是與劉騰鴻峙衡吳坤修竹莊。普承堯欽堂率五千人以行。而巡撫胡公奏請以溫甫統領軍事。出入賊地。盛暑鏖兵。凡攻克咸寧蒲圻崇陽通城新昌上高六縣。以六月三十日。銳師翔於瑞州。由是江西湖南始得通問。而溫甫亦積勞致疾矣。七月十六月。棹小舟舁疾至南昌。兄弟相見。深夜悵悵。喜極而悲。涕泣如雨。弟疾寢劇。治之多方不效。至九月乃痊。復還瑞州營次。瑞州故有南北兩城。蜀水貫其中。劉騰鴻軍其南。溫甫與普承堯軍其西北。賊於東隅通外援。市易如故。七年正月。予率吳坤修之師。自奉新至東路。始合長圍。掘塹周三十里。溫甫則大喜。吾攻此城久不舉。今茲事其集乎。不幸遭先君子大故。兄弟匍匐奔喪。入里門。宗族鄉黨爭來相弔。亦頗相慶。慰國藩得拔其不肖之軀。復有生還之一日。溫甫力也。溫甫既出嗣叔父。以咸豐八年二月降服期滿。復出。抵李君續賓迪菴軍中。李君與溫甫爲婚姻。益相與講求戎政。晨夕諮議。是時九江新破。強悍深根之寇。一掃刮絕。李君威名聞天下。又克麻城。躡黃安。喋血皖中。連下太湖潛山桐城舒城四縣。席全盛之勢。人人自以無前。師銳甚。溫甫獨以爲常勝之家。氣將竭矣。難可深恃。時時與李君深語。悚切以警其下。亦以書告予。盱上。竟以十月十日軍敗。從李君殉難。廬江之三河鎮。嗚呼痛哉。曩吾弟以新集之師。千里赴援。摧江西十萬之賊。而無所頓。今以皖北百勝之軍。萃良將勁卒。四海所仰望者。而壹覆之。而吾弟適丁其厄。豈所謂命耶。常勝之不足深恃。吾弟之智既及之矣。而不肯退師以圖全營壘。以十三夜被陷。而吾

弟與李君以初十之夕。併命同殉。又不肯少待以圖脫免。豈所謂知命者耶。遂綴詞哭之。詞曰。鱣鱣我祖。山立絕倫。有蓄不施。篤生哲人。我君爲長。魯國一儒。仲父早世。有季不孤。恭惟先德。稼穡詩書。小子無狀。席此慶餘。粲粲諸弟。雁行以隨。吾詩有云。午君最奇。挾藝千人。百不一售。彼麤穢者。乃居吾右。抑塞不伸。發狂大叫。雜以嘲談。萬花齊笑。世不吾與。吾不世許。自謂吾虎。世棄如鼠。相舛相背。逝將去女。一朝奮發。仗劍東行。提師五千。往從阿兄。何堅不破。何勁不摧。躍入章門。無害無災。壘篋鼓角。號令風雷。昊天不弔。鮮民銜哀。見星西奔。三子歸來。弟後季父。降服以禮。而歲告闋。靡念苞杞。出陪戎幄。匪辛伊李。旣克潯陽。雄師北邁。剗潛剗桐。羣舒是嘜。豈謂一蹶。震驚兩戒。李旣山頽。弟乃梁壞。覆我湘人。君子六千。命耶數耶。何辜於天。我奉簡書。馳驅嶺嶠。江北江南。夢魂環繞。卯慟抵昏。酉悲達曉。莽莽舒廬。羣凶所窟。積骸成岳。孰辨弟骨。骨不可收。魂不可招。崢嶸廢壘。雪漬風飄。生也何雄。死也何苦。我實負弟。茹恨終古。

哀祭類

弔文

弔屈原文 井序 賈誼

誼爲長沙王太傅。旣以謫去。意不自得。及渡湘水。爲賦以弔屈原。屈原。楚賢臣也。被讒放逐。作離騷賦。其終篇曰。已矣哉。國無人兮。莫我知也。遂自投汨羅而死。誼追傷之。因以自喻。其辭曰。恭承嘉惠兮。俟罪長沙。側聞屈原兮。自沈汨羅。造託湘流兮。敬弔先生。遭世罔極兮。乃殞厥身。嗚呼哀哉。逢時不祥。鸞鳳伏竄兮。鷗梟翱翔。闕茸尊顯兮。讒諛得志。聖賢逆曳兮。方正倒植。世謂隨夷爲溷兮。謂跖

躑爲廉。莫邪爲鈍兮。鉛刀爲銛。吁嗟默默。生之無故兮。幹棄周鼎。寶康瓠兮。騰駕罷牛。驂蹇驢兮。驥垂兩耳。服鹽車兮。章甫薦履。漸不可久兮。嗟苦先生。獨離此咎兮。訊曰。已矣。國其莫我知兮。獨壹鬱其誰語。鳳漂漂其高逝兮。固自引而遠去。襲九淵之神龍兮。物深潛以自珍。偈蟻獺以隱處兮。夫豈從蝦與蛭蟻所貴。聖人之神德兮。遠濁世而自藏。使騏驥可得係而羈兮。豈云異夫犬羊般紛紛其離此尤兮。亦夫子之故也。歷九州而相其君兮。何必懷此都也。鳳凰翔于千仞兮。覽德輝而下之。見細德之險微兮。遙矰繳而去之。彼尋常之汙瀆兮。豈能容夫吞舟之巨魚。橫江湖之鱣鯨兮。固將制于螻蟻。

弔魏武帝文 井序 陸機

元康八年。機始以臺郎出補著作。遊乎祕閣。而見魏武帝遺令。愴然歎息。傷懷者久之。客曰。夫始終者。萬物之大歸。死生者。性命之區域。是以臨喪殯而後悲。覩陳根而絕哭。今乃傷心百年之際。興哀無情之地。意者無乃知哀之可有。而未識情之可無乎。機答之曰。夫日食由乎交分。山崩起於朽壤。亦云數而已矣。然百性怪焉者。豈不以資高明之質。而不免卑濁之累。居常安之勢。而終嬰傾離之患。故乎。夫以迴天倒日之力。而不能振形骸之內。濟世夷難之智。而受困魏闕之下。已而格乎上下者。藏於區區之本。光于四表者。翳乎蕞爾之土。雄心摧於弱情。壯圖終於哀志。長算屈於短日。遠迹頓於促路。嗚呼。豈特瞽史之異闕。景黔黎之怪頽。岸乎。觀其所以顧命冢嗣。貽謀四子。經國之略。旣遠。隆家之訓。亦弘。又云。吾在軍中。持法是也。至小忿怒。大過失。不當效也。善乎。達人之讜言矣。持姬女而指季豹。以示四子曰。以累汝。因泣下。傷哉。曩以天下自任。今以愛子託人。同乎盡者無餘。而得乎亡者無存。然而婉孌房闥之內。綢繆家人之

務則幾乎密與。又曰：吾婕妤、妓人，皆著銅爵臺。於臺堂上，施八尺牀，總帳，朝晡上脯糒之屬。月朝十五，輒向帳作伎。汝等時時登銅爵臺，望吾西陵墓田。又云：餘香可分與諸夫人，諸舍中無所爲，學作履組賣也。吾歷官所得綬，皆著藏中。吾餘衣裘，可別爲一藏，不能者，兄弟可共分之。旣而竟分焉。亡者可以勿求，存者可以勿違，求與違不其兩傷乎？悲夫！愛有大而必失，惡有甚而必得，智惠不能去其惡，威力不能全其愛。故前識所不用心，而聖人罕言焉。若乃繫情累於外物，留曲念於閨房，亦賢俊之所宜廢乎？於是遂憤懣而獻弔云爾。

接皇漢之末緒，值王途之多違。佇重淵以育鱗，撫慶雲而遐飛。運神道以載德，乘靈風而扇威。摧羣雄而電擊，舉勅敵其如遺。指八極以遠略，必翦焉而後綏。釐三才之闕典，啓天地之禁闈。舉脩綱之絕紀，紐大音之解徽。掃雲物以貞觀，要萬塗而來歸。丕大德以宏覆，援日月而齊暉。濟元功於九有，固舉世之所推。彼人事之大造，夫何往而不臻。將覆篲於浚谷，擠爲山乎九天。苟理窮而性盡，豈長算之所研。悟臨川之有悲，固梁木其必顛。當建安之三八，實大命之所艱。雖光昭於曩載，將稅駕於此年。惟降神之繇邈，眇千載而遠期。信斯武之未喪，膺靈符而在茲。雖龍飛於文昌，非王心之所怡。憤西夏以鞠旅，泝秦川而舉旗。躡鎬京而不豫，臨渭濱而有疑。冀翌日之云瘳，彌四旬而成災。詠歸塗以反旆，登崑澗而竭來。次洛汭而大漸，指六軍曰念哉。伊君王之赫奕，實終古之所難。威先天而蓋世，力盪海而拔山。厄奚險而弗濟，敵何彊而不殘。每因禍以禔福，亦踐危而必安。迄在茲而蒙昧，慮噤閉而無端。委軀命以待難，痛沒世而永言。撫四子以深念，循膚體而頽嘆。迨營魄之未離，假餘息乎音翰。執姬女以嘔瘁，指季豹而濯焉。氣衝襟以

嗚咽涕垂睫而洩瀾。違率土以靖寐。戢彌天乎一棺。咨宏度之峻邈。壯大業之允昌。思居終而恤始。命臨沒而肇揚。援貞吝以基悔。雖在我而不臧。惜內顧之纏緜。恨末命之微詳。紆廣念於履組。塵清慮於餘香。結遺情之婉孌。何命促而意長。陳法服於帷座。陪窈窕於玉房。宣備物於虛器。發哀音於舊倡。矯感容以赴節。掩零淚而薦觴。物無微而不存。體無惠而不亡。庶聖靈之響像。想幽神之復光。苟形聲之翳沒。雖音景其必藏。徽清絃而獨奏。進脯糒而誰嘗。掉總帳之冥漠。怨西陵之茫茫。登爵臺而羣悲。眄美目其何望。既睇古以遺累。信簡禮而薄葬。彼裘紱於何有。貽塵謗於後王。嘆大戀之所存。故雖哲而不忘。覽遺籍以慷慨。獻茲文而悽傷。

弔屈原文 柳宗元

後先生蓋千祀兮。余再逐而浮湘。求先生之汨羅兮。擊蘅若以薦芳。願荒忽之顧懷兮。冀陳辭而有光。先生之不從世兮。惟道是就。支離搶攘兮。遭世孔疚。華蟲薦壤兮。進御羔裘。牝雞咿嘷兮。孤雄束咮。哇咬環觀兮。蒙耳大呂。堇喙以爲羞兮。焚棄稷黍。犴獄之不知避兮。宮庭之不處。陷塗藉穢兮。榮若繡黼。榘折火烈兮。俛俛笑舞。讒巧之曉曉兮。惑以爲咸池。便媚鞠慝兮。美愈西施。謂謨言之怪誕兮。反寘瑱而遠違。匿重痼以諱避兮。進愈緩之不可爲。何先生之凜凜兮。厲鍼石而從之。但仲尼之去魯兮。曰吾行之遲遲。柳下惠之直道兮。又焉往而可施。今夫世之議夫子兮。曰胡隱忍而懷斯。惟達人之卓軌兮。固僻陋之所疑。委故都以從利兮。吾知先生之不忍。立而視其覆墜兮。又非先生之所志。窮與達固不渝兮。夫惟服道以守義。矧先生之悃悞兮。滔大故而不貳。沈璜瘞珮兮。孰幽而不光。荃蕙蔽匿兮。胡久而不芳。先生之貌不

可得兮。猶髣髴其文章。託遺編而歎喟兮。渙余涕之盈眶。呵星辰而驅詭怪兮。夫孰救於崩亡。何揮霍夫雷電兮。苟爲是之荒茫。耀姱辭之矚朗兮。世果以是之爲狂。哀余衷之坎坎兮。獨蘊憤而增傷。諒先生之不言兮。後之人又何望。忠誠之旣內激兮。抑銜忍而不長。犇爲屈之幾何兮。胡獨焚其中腸。吾哀今之爲仕兮。庸有慮時之否臧。食君之祿畏不厚兮。悼得位之不昌。退自服以默默兮。曰吾言之不行。旣媮風之不可去兮。懷先生之可忘。

弔國殤文 有序 李綱

宣和元年春。用師西鄙。熙河帥劉法。與其軍俱殲。用事者以違節制罪之。贈典不及。余竊哀焉。作斯文以弔之。其辭曰。

夏人不賓兮。西鄙聳驚。蝟結蟻聚兮。屯犬羊之羶腥。帝赫斯怒兮。命諸將以徂征。哀師鞠旅兮。致天討于不庭。蕞爾不醜兮。仇大邦。匿其精壯兮。示以不爭。王師如入無人之境兮。遽捷奏于三城。縱四路之分入兮。以全力而當熙河之兵。惟熙帥之寡謀兮。知不可而弗明。統十萬之驍勝兮。謂可以深蹂而橫行。路邇迴以崎嶇兮。山斗絕而崢嶸。決積水於千仞兮。灌長波于聯營。師不戰而自屈兮。雖有智何以施其能。墮黠虜之計中兮。失天時與地利。顧出塞之幾何兮。亡隻輪與匹騎。豈無偏裨之勇略兮。與士卒之猛鷲。棄甲冑之精堅兮。投器械之犀銳。山積雲委。不可計數兮。咸舉而填于廬山之壑。推于飢虎之喙。彼本兵之何人兮。方懼罪而自爲計。匿實狀而不聞兮。謂馬蹶而崖墜。士卒散于逋逃兮。將吏殞于自斃。痛忠魂之誰訴兮。激壯士之憤氣。惟一勝而一負兮。乃兵家之常勢。奈何不使吾君之得聞兮。以邊事而爲戒。邈九

重之高深兮。豈天下之耳目。皆可以欺而蔽也。嗚呼噫嘻。想夫貔虎之將。熊羆之師。耀日戈甲。蔽野旌旗。力蹙勢窮。漸車裂帷。鼓聲不起。士氣已衰。進不得戰。退無所歸。魚驚沸鼎。獸駭危機。方腹背之俱潰。何爪牙之可施。蹈踐紛藉。奔崩流離。血膏草莽。骨委山陂。氣鬱鬱以衝漢。魂惛惛而易依。兵有節制。固不可違。若李廣之失道。與張騫之後期。或逗留而怯敵。或敗北而喪師。失軍事之機會。故可以違節制而罪之。豈有肝腦塗地。身首分披。執干戈以衛社稷。援枹鼓而死邊陲。忘其大烈。捃此細微。縱一帥之有罪。顧三軍之曷其贈弔。不及賻贈。不時沒者已矣。生者長悲。其何以勵封疆之臣。而慰邊人之思。古者命將。付之閫外。便宜則行。不從中制。量敵而進。慮勝而會。利則伸而鈍。則蟠戰必勝。而攻則潰。亞夫細柳之營。雖君命有所不受。充國金城之略。雖衆口莫得而議也。後世行軍。顛倒紛綸。以將帥爲不足信。則盡護之。以中人。口含天憲。手握國鈞。功罪莫實。賞罰不倫。掣肘繫足。智謀曷伸。彼九節度之師。所以皆敗者。以有軍容之朝恩。而德裕之相。武宗之所以能討叛鋤逆者。以盡罷諸鎮之監軍。知此甚易。其誰敢陳。吾獨悲夫。事君之事。食君之食。荷戈從軍。死固其職。惟身沒而名頽。可嗟悼而歎息。茫茫虜地兮。流沙千里。空山無人兮。羌行如鬼。沙磧不毛兮。雪霜夏墮。魂兮歸來兮。彼西方不可以止。敷德澤于幽明兮。惟聖天子。

哀祭類

誄

元后誄 井序 揚雄

新室文母太后崩。天下哀痛。號哭涕泗。思慕功德。咸上柩誄之銘曰。

惟我有新室文母聖明皇太后。姓出黃帝。西陵昌意。實生高陽。純德虞帝。孝聞四方。登陟帝位。禪受伊唐。爰初胙土。陳田至王。營相厥宇。度河濟旁。沙麓之靈。太陰之精。天生聖姿。豫有祥禎。作合于漢。配元生成。孝順皇姑。聖敬齊莊。內則純備。後烈丕光。肇初配元。天命是將。兆徵顯見。新都黃龍。漢成既終。胤嗣匪生。哀帝承祚。惟離典經。尙是言異。大命俄顛。厥年天隕。大終不盈。文母覽之。千載不傾。博選大智。新都宰衡。明聖作佐。與圖國艱。以度厄運。徵立中山。庶其可濟。博采淑女。備其姪娣。覲禮高禴。祈廟嗣繼。靡格匪天。靡動匪地。穆穆明明。昭事上帝。弘漢祖考。夙夜匪懈。興滅繼絕。博立侯王。親睦庶族。昭穆序明。帝致支屬。靡有遺荒。咸被祚慶。冀以金火。赤仍有央。勉進大聖。上下兼該。羣祥衆瑞。正我黃來。火德將滅。惟后于斯。天之所壞。人不敢支。哀平天折。百姓分離。祖宗之愆。終其不全。天命有託。謫在于前。屢遭不造。榮極而遷。皇天眷命。黃虞之孫。歷世運移。屬在聖新。代于漢劉。受祚于天。漢祖受命。赤傳于黃。攝帝受禪。立爲真皇。允執厥中。以安黎衆。漢祖黜廢。移定安公。皇皇靈祖。惟若孔臧。降茲珪璧。命服有常。爲新帝母。鴻德不忘。欽德伊何。奉命是行。菲薄服食。神祇是崇。尊不虛統。惟祇惟庸。隆循人敬。先民是從。承天祇家。允恭虔恪。豐阜庶卉。旅力不射。恤民于留。不皇詭作。別計千邑。國之是度。還奉于此。以處貧薄。罷苑置縣。築里作宅。以處貧窮。哀此嫠獨。起常盈倉。五十萬斛。爲諸生儲。以勸好學。志在黎元。是勞是勤。春巡灞澆。秋臻黃山。夏撫樗杜。冬卹涇樊。大射饗飲。飛羽之門。綏宥耆幼。不拘婦人。刑女歸家。以育貞信。玄冥季冬。搜狩上蘭。寅賓出日。東秩陽谷。鳴鳩拂羽。勝降桑木。蠶于繭館。躬執筐曲。帥導羣妾。咸脩蠶族。分繭理絲。女工是敕。遐邇蒙祉。中外禔福。自京逮海。靡不仰德。成類存生。秉天地經。無物不理。無人不寧。尊號文母。與新有成。

世奉長壽。靡墮有傾。著德太常。注諸旒旌。嗚呼哀哉。以昭鴻名。享國六十。殂落而崩。四海傷懷。擗踊拊心。若喪考妣。遏密八音。嗚呼哀哉。萬方不勝。德被海表。彌流魂精。去此昭昭。就彼冥冥。忽兮不見。超兮西征。既作下宮。不復故庭。爰緘伊銘。嗚呼哀哉。

王仲宣誄 并序 曹植

建安二十二年正月二十四日戊申。魏故侍中關內侯王君卒。嗚呼哀哉。皇穹神察。詰人是恃。如何靈祇。殲我吉士。誰謂不庸。早世卽冥。誰謂不傷。華繁中零。存亡分流。天遂同期。朝聞夕沒。先民所思。何用誄德。表之素旗。何以贈終。哀以送之。遂作誄曰。猗歟侍中。遠祖彌芳。公高建業。佐武伐商。爵同齊魯。邦祀絕亡。流裔畢萬。勳績惟光。晉獻賜封。于魏之疆。天開之祚。末胄稱王。厥姓斯氏。條分葉散。世滋芳烈。揚聲秦漢。會遭陽九。炎光中曠。世祖撥亂。爰建時雍。三台樹位。履道是鍾。寵爵之加。匪惠惟恭。自君二祖。爲光爲龍。僉曰休哉。宜翼漢邦。或統太尉。或掌司空。百揆惟敘。五典克從。天靜人和。皇教遐通。伊君顯考。奕葉佐時。入管機密。朝政以治。出臨朔岱。庶績咸熙。君以淑懿。繼此洪基。既有令德。材技廣宣。強記洽聞。幽讚微言。文若春華。思若涌泉。發言可詠。下筆成篇。何道不洽。何藝不閑。碁局逞巧。博奕惟賢。皇家不造。京室隕顛。宰臣專制。帝用西遷。君乃驛旅。離此阻艱。翕然鳳舉。遠竄荆蠻。身窮志達。居鄙行鮮。振冠南嶽。濯纓清川。潛處蓬室。不干勢權。我公奮鉞。耀威南楚。荆人或違。陳戎講武。君乃義發。算我師旅。高尙霸功。投身帝宇。斯言旣發。謀夫是與。是與伊何。響我明德。投戈編郟。稽顙漢北。我公實嘉。表揚京國。金龜紫綬。以彰勳則。勳則伊何。勞謙靡已。憂世忘家。殊略卓峙。

乃署祭酒。與君行止。算無遺策。畫無失理。我王建國。百司儁乂。君以顯舉。秉機省闈。戴蟬珥貂。朱衣皓帶。入侍帷幄。出擁華蓋。榮曜當世。芳風晻藹。嗟彼東夷。憑江阻湖。騷擾邊境。勞我師徒。光戎路。靈駭風徂。君侍華轂。輝輝王塗。思榮懷附。望彼來威。如何不濟。運極命衰。寢疾彌留。吉往凶歸。嗚呼哀哉。翩翩孤嗣。號慟崩摧。發軫北魏。遠迄南淮。經歷山河。泣涕如頽。哀風興感。行雲徘徊。游魚失浪。歸鳥忘栖。嗚呼哀哉。吾與夫子。義貫丹青。好和琴瑟。分過友生。庶幾遐年。攜手同征。如何奄忽。棄我夙零。感昔宴會。志各高厲。於戲夫子。金石難弊。人命靡常。吉凶異制。此驩之人。孰先殞越。何寤夫子。果乃先逝。又論死生。存亡數度。子猶懷疑。求之明據。儻獨有靈。游魂泰素。我將假翼。飄颻高舉。超登景雲。要子天路。喪柩旣臻。將反魏京。靈轎迴軌。白驥悲鳴。虛廓無見。藏景蔽形。孰云仲宣。不聞其聲。延首歎息。雨泣交頸。嗟乎夫子。永安幽冥。人誰不沒。達士徇名。生榮死哀。亦孔之榮。嗚呼哀哉。

楊荊州誄 并序 潘岳

維咸寧元年夏四月乙丑。晉故折衝將軍荊州刺史東武戴侯滎陽楊史君薨。嗚呼哀哉。夫天子建國。諸侯立家。選賢與能。政是以和。周賴尙父。殷憑太阿。矯矯楊侯。晉之爪牙。忠節克明。茂績惟嘉。將宏王略。肅清荒遐。降年不永。玄首未華。銜恨沒世。命也奈何。嗚呼哀哉。自古在昔。有生必死。身沒名垂。先哲所躋。行以號彰。德以述美。敢託旒旗。爰作斯誄。其辭曰。

邈矣遠祖。系自有周。昭穆繁昌。枝庶分流。族始伯喬。氏出楊侯。奕世丕顯。允迪大猷。天厭漢德。龍戰未分。伊君祖考。方事之殷。鳥則擇木。臣亦簡君。投心魏朝。策名委身。奮躍淵塗。跨騰風雲。或統驍騎。或據領軍。

篤生戴侯。茂德繼期。纂戎洪緒。克構堂基。弱冠味道。無競惟時。孝實蒸蒸。友亦怡怡。多才豐藝。強記洽聞。目睇毫末。心算無垠。草隸兼善。尺牘必珍。足不輟行。手不釋文。翰動若飛。紙落如雲。學優則仕。乃從王政。散璞發輝。臨軹作令。化行邑里。惠洽百姓。越登司官。肅我朝命。惟此大理。國之憲章。君莅其任。視民如傷。庶獄明慎。刑辟端詳。聽參皋呂。稱侔于張。改授農政。于彼野王。倉盈庾億。國富兵彊。煌煌文后。鴻漸晉室。君以兼資。參戎作弼。用錫土宇。膺茲顯秩。青社白茅。亦朱其紱。魏氏順天。聖皇受終。烈烈楊侯。實統禁戎。司管閭闔。清我帝宮。苛慝不作。穆如和風。謂督勳勞。班命彌崇。茫茫海岱。玄化未周。滔滔江漢。疆場分流。秉文兼武。時惟楊侯。既守東莞。乃牧荊州。折衝萬里。對揚王休。聞善若驚。疾惡如讎。示威以德。以伐以柔。吳夷凶侈。僞師畏逼。將乘讎釁。席卷南極。繼褰糧盡。神謀不忒。君子之過。引曲推直。如彼日月。有時則食。負執其咎。功讓其力。亦既旋旆。爲法受黜。退守丘塋。杜門不出。游日典墳。縱心儒術。祁祁搢紳。升堂入室。靡事不咨。無疑不質。位貶道行。身窮志逸。弗慮弗圖。乃寢乃疾。昊天不弔。景命其卒。嗚呼哀哉。子囊佐楚。遺言城郢。史魚諫衛。以尸顯政。伊君臨終。不忘忠敬。寢伏牀蓐。念在朝廷。朝達厥辭。夕殞其命。聖王嗟悼。寵贈衾襚。誄德策勳。考終定謚。羣辟慟懷。邦族揮淚。孤嗣在疚。寮屬含悴。赴者同哀。路人增歎。嗚呼哀哉。余以頑蔽。覆露重陰。仰追先考。執友之心。俯感知己。識達之士。承諱忉忉。涕淚霑襟。豈忘載奔。憂病是沈。在疾不省。於亡不臨。舉聲增慟。哀有餘音。嗚呼哀哉。

楊仲武誄 井序 潘岳

楊綏字仲武。滎陽宛陵人也。中領軍肅侯之曾孫。荊州刺史戴侯之孫。東武康侯之子也。八歲喪父。其母

鄭氏光祿勳密陵成侯之元女。操行甚高。恤養幼孤。以保父夫家。而免諸艱難。戴侯康侯。多所論著。又善草隸之藝。子以妙年之秀。固能綜覽義旨。而軌式範模矣。雖舅氏隆盛。而孤貧守約。心安陋巷。體服菲薄。余甚奇之。若乃清才雋茂。盛德日新。吾見其進。未見其已也。既藉三葉世親之恩。而子之姑。余之伉儷焉。往歲卒於德宮里。喪服同次。綢繆累月。苟人必有心。此亦款誠之至也。不幸短命。春秋二十九。元康九年夏五月己亥卒。嗚呼哀哉。乃作誄曰。

伊子之先。弈葉熙隆。惟祖惟曾。載揚休風。顯考康侯。無祿早終。名器雖光。勳業未融。篤生吾子。誕茂淑姿。克岐克嶷。知章知微。鉤深探賾。味道研機。匪直也人。邦家之輝。子之邁閔。曾未亂髮。如彼危根。當此衝飄。德之休明。靡幽不喬。弱冠流芳。儁聲清劭。爾舅惟榮。爾宗惟瘁。幼秉殊操。違豐安匱。撰錄先訓。俾無隕墜。舊文新藝。罔不必肄。潘楊之穆。有自來矣。矧乃今日。慎終如始。爾休爾戚。如實在己。視予猶父。不得猶子。敬亦既篤。愛亦既深。雖殊其年。實同厥心。日昃景西。望子朝陰。如何短折。背世溼沈。嗚呼哀哉。寢疾彌留。守茲孝友。臨命忘身。顧戀慈母。哀哀慈母。痛心疾首。噉噉同生。悽悽諸舅。春蘭擢莖。方茂其華。荆寶挺璞。將剖于和。含芳委耀。毀璧摧柯。嗚呼仲武。痛哉奈何。德宮之艱。同次外寢。惟我與爾。對筵接枕。自時迄今。曾未盈稔。姑姪繼隕。何痛斯甚。嗚呼哀哉。披帙散書。屢覩遺文。有造有寫。或草或真。執玩周復。想見其人。紙勞于手。涕沾于巾。龜筮既襲。埏隧既開。痛矣楊子。與世長乖。朝濟洛川。夕次山隈。歸鳥頡頏。行雲徘徊。臨穴永訣。撫櫬盡哀。遺形莫紹。增慟余懷。魂兮往矣。梁木實摧。嗚呼哀哉。

夏侯常侍誄 井序 潘岳

夏侯湛字孝若。譙人也。少知名。弱冠辟太尉府掾。賢良方正徵。仍爲太子舍人。尙書郎。野王令。中書郎。南陽相。家艱乞還。頃之。選爲太子僕。未就命而世祖崩。天子以爲散騎常侍。從班列也。春秋四十有九。元康元年夏五月壬辰。寢疾卒于延喜里第。嗚呼哀哉。乃作誄曰。

禹錫玄珪。實曰文命。克明克聖。光啓夏政。其在于漢。邁勳惟嬰。思弘儒業。小大雙名。顯祖曜德。牧竟及荆。父守淮岱。治亦有聲。英英夫子。灼灼其儁。飛辯摛藻。華繁玉振。如彼隨和。發彩流潤。如彼錦繡。別素點絢。人見其表。莫測其裏。徒謂吾生。文勝則史。心照神交。唯我與子。且歷少長。逮觀終始。子之承親。孝齊閔參。子之友悌。和如瑟琴。事君直道。與朋信心。雖實唱高。猶賞爾音。弱冠厲翼。羽儀初升。公弓旣招。皇輿乃徵。內贊兩宮。外宰黎蒸。忠節允著。清風載興。泱彼樂都。寵子惟王。設官建輔。妙簡邦良。用取喉舌。相爾南陽。惠訓不倦。視民如傷。乃眷北顧。辭祿延喜。余亦偃息。無事明時。疇昔之遊。二紀于茲。班白攜手。何歡如之。居吾語汝。衆實勝寡。人惡雋異。俗疵文雅。執戟疲楊。長沙投賈。無謂爾高。恥居物下。子乃洗然。變色易容。慨焉嘆曰。道固不同。爲仁由己。匪我求蒙。誰毀誰譽。何去何從。莫涅匪緇。莫磨匪磷。子獨正色。居屈志申。雖不爾以。猶致其身。獻替盡規。媚茲一人。讜言忠謀。世祖是嘉。將僕儲皇。奉轡承華。先朝末命。聖列顯加。入侍帝闈。出光厥家。我聞積善。神降之吉。宜享遐紀。長保天秩。如何斯人。而有斯疾。曾未知命。中年隕卒。嗚呼哀哉。唯爾之存。匪爵而貴。甘食美服。重珍兼味。臨終遺誓。永錫爾類。斂以時襲。殯不簡器。誰能拔俗。生盡其養。孰是養生。而薄其葬。淵哉若人。縱心條暢。傑操明達。困而彌亮。樞輅旣祖。容體長歸。存亡永訣。逝者不追。望子舊車。覽爾遺衣。悞抑失聲。迸涕交揮。非子爲慟。吾慟爲誰。嗚呼哀哉。日往月來。暑退寒襲。

零露沾凝。勁風淒急。慘爾其傷。念我良執。適子素館。撫孤相泣。前思未弭。後感仍集。積悲滿懷。逝矣安及。嗚呼哀哉。

馬汧督誄 井序 潘岳

惟元康六年秋九月十五日。晉故督守關中侯扶風馬君卒。嗚呼哀哉。初雍部之內。屬羌反未弭。而編戶之氏。又肆逆焉。雖王旅致討。終於殄滅。而蜂蠆有毒。驟失小利。俾百姓流亡。頻於塗炭。建威喪元於好時。州伯宵遁乎大谿。若夫偏師裨將之殞首覆軍者。蓋以十數。剖符專城。紆青拖墨之司。奔走失其守者。相望於境。秦隴之僭。鞏更爲魁。旣已襲汧而館其縣。子以眇爾之身。介乎重圍之裏。率寡弱之衆。據十雉之城。羣氏如蝟毛而起。四面雨射城中。城中鑿穴而處。負戶而汲。木石將盡。樵蘇乏竭。芻蕘罄絕。於是乎發梁棟而用之。芻以鐵鑠機關。旣縱鑷而又升焉。爨陳焦之麥。柿栲桷之松。用能薪芻不匱。人畜取給。青煙傍起。櫪馬長鳴。凶醜駭而疑懼。乃闕地而攻。子命穴浚。塹。寘壺。鑄瓶甗以偵之。將穿響作。因焚穢火薰之。潛氏殲焉。久之。安西之救至。竟免虎口之厄。全數百萬石之積。文契書於幕府。聖朝疇咨。進以顯秩。殊以幢蓋之制。而州之有司。乃以私隸數口。穀十斛。考訊吏兵。以檀楚之辭。連之。大將軍屢抗其疏。曰。敦固守孤城。獨當羣寇。以少禦衆。載離寒暑。臨危奮節。保穀全城。而雍州從事。忌敦勳効。極推小疵。非所以褒獎元功。宜解敦禁劾。假授詔書。遽許。而子固已下獄。發憤而卒也。朝廷聞而傷之。策書曰。皇帝咨故督守關中侯馬敦。忠勇果毅。率勵有方。固守孤城。危逼獲濟。寵秩未加。不幸喪亡。朕用悼焉。今追贈牙門將軍印綬。祠以少牢。魂而有靈。嘉茲寵榮。然絜士之聞穢。其庸致思乎。若乃下吏之肆其噤害。則皆妬之徒也。嗟

乎。妬之欺善。抑亦買首之讎也。語曰。或戒其子。慎無爲善言。固可以若是。悲夫。昔乘丘之戰。縣賁父御魯莊公。馬驚敗績。賁父曰。他日未嘗敗績。而今敗績。是無勇也。遂死之。圍人浴馬。有流矢在白肉。公曰。非其罪也。乃誅之。漢明帝時。有司馬叔持者。白日於都市。手劍父讎。視死如歸。亦命史臣班固而爲之誄。然則忠孝義烈之流。慷慨非命而死者。綴辭之士。未之或遺也。天子旣已策而贈之。微臣託乎舊史之末。敢闕其文哉。乃作誄曰。

知人未易。人未易知。嗟茲馬生。位末名卑。西戎猾夏。乃奮其奇。保此泝城。救我邊危。彼邊奚危。城小粟富。子以眇身。而裁其守。兵無加衛。墉不增築。婪婪羣狄。豺虎競逐。鞏更恣睢。潛跣官寺。齊萬虓鬪。震驚台司。聲勢沸騰。種落煽熾。旌旗電舒。戈矛林植。彤珠星流。飛矢雨集。惴惴士女。號天以泣。爨麥而炊。負戶以汲。累卵之危。倒懸之急。馬生爰發。在險彌亮。精貫白日。猛烈秋霜。稜威可厲。懦夫克壯。霑恩撫循。寒士挾纊。蠢蠢犬羊。阻衆陵寡。潛隧密攻。九地之下。愜愜窮城。氣若無假。昔命懸天。今也惟馬。惟此馬生。才博智贍。偵以瓶壺。則以長壘。鍾未見鋒。火以起焰。薰尸滿窟。培穴以斂。木石匱竭。萁稈空虛。矚然馬生。傲若有餘。罵梁爲礪。柿松爲芻。守不乏械。歷有鳴駒。哀哀建威。身伏斧質。悠悠烈將。覆軍喪器。戎釋我徒。顯誅我帥。以生易死。疇克不二。聖朝西顧。關右震惶。分我泝庾。化爲寇糧。實賴夫子。思慕彌長。咸使有勇。致命知方。我雖末學。聞之前典。十世宥能。表墓旌善。思人愛樹。甘棠不翦。矧乃吾子。功深疑淺。兩造未具。儲隸蓋鮮。孰是勳庸。而不獲免。猾哉部司。其心反側。斲善害能。醜正惡直。牧人逶迤。自公退食。聞穢鷹揚。曾不戢翼。忘爾大勞。猜爾小利。苟莫開懷。于何不至。慨慨馬生。琅琅高致。發憤囹圄。沒而猶眊。嗚呼哀哉。安平出奇。

破齊克完。張孟運籌。危趙獲安。汧人賴子。猶彼談單。如何吝嫉。搖之筆端。傾倉可賞。矧云私粟。狄隸可殞。況曰家僕。剔子雙龜。貫以三木。功存汧城。身死汧獄。凡爾同圍。心焉摧剝。扶老攜幼。街號巷哭。嗚呼哀哉。明明天子。旌以殊恩。光光寵贈。乃牙其門。司勳頒爵。亦兆後昆。死而有靈。庶慰冤魂。嗚呼哀哉。

陽給事誄 井序 顏延之

惟永初三年十一月十一日。宋故寧遠司馬濮陽太守彭城陽君卒。嗚呼哀哉。瓚少稟志節。資性忠果。奉上以誠。率下有方。朝嘉其能。故授以邊事。永初之末。佐守滑臺。值國禍荐臻。王略中否。獯虜間釁。劇剝司亮。幽并騎弩。屯逼鞏洛。列營緣戍。相望屠潰。瓚奮其猛銳。志不違難。立乎將卒之間。以緝華裔之衆。罷困相保。堅守四旬。上下力屈。受陷勅寇。士師奔擾。棄軍爭免。而瓚誓命沈城。佻身飛鏃。兵盡器竭。斃于旗下。非夫貞壯之氣。勇烈之志。豈能臨敵引義。以死徇節者哉。景平之元。朝廷聞而傷之。有詔曰。故寧遠司馬濮陽太守陽瓚。滑臺之逼。誠厲固守。投命徇節。在危無撓。古之烈士。無以加之。可贈給事中。振卹遺孤。以慰存亡。追寵旣彰。人知慕節。河汴之間。有義風矣。逮元嘉廓祚。聖神紀物。光昭茂緒。旌錄舊勳。苟有概於貞孝者。實事感於仁明。末臣蒙固。側聞至訓。敢詢諸前典。而爲之誄。其辭曰。貞不常祐。義有必甄。處父勤君。怨在登賢。苦夷致果。題子行閒。忠壯之烈。宜自爾先。舊勳雖廢。邑氏遂傳。惟邑及氏。自溫徂陽。狐續旣降。晉族弗昌。之子之生。立績宋皇。拳猛沈毅。溫敏肅良。如彼竹柏。負雪懷霜。如彼駢駟。配服驂衡。邊兵喪律。王略未恢。函陝堙阻。灑洛蒿萊。朔馬東騫。胡風南埃。路無歸轉。野有委骸。帝圖斯艱。簡兵授才。實命陽子。佐師危臺。憬彼危臺。在滑之垆。周衛是交。鄭翟是爭。昔惟華國。今實邊亭。

憑巘結關。負河縈城。金柝夜擊。和門晝扃。料敵厭難。時惟陽生。涼冬氣勁。塞外草衰。邊矣獯虜。乘障犯威。鳴驥橫厲。霜鏑高聳。軼我河縣。俘我洛畿。攢鋒成林。投鞍爲圍。翳翳窮壘。嗷嗷羣悲。師老變形。地孤援闔。卒無半菽。馬實拊秣。守未焚衝。攻已濡褐。烈烈陽子。在困彌達。勉慰痍傷。拊巡饑渴。力雖可窮。氣不可奪。義立邊疆。身終鋒楛。嗚呼哀哉。賁父殞節。魯人是志。汧督効貞。晉策攸記。皇上嘉悼。思存寵異。予以贈之。言登給事。疏爵紀庸。恤孤表嗣。嗟爾義士。沒有餘喜。嗚呼哀哉。

陶徵士誄 井序 顏延之

夫璿玉致美。不爲池隍之寶。桂椒信芳。而非園林之實。豈期深而好遠哉。蓋云殊性而已。故無足而至者。物之藉也。隨踵而立者。人之薄也。若乃巢高之抗行。夷皓之峻節。故已父老堯禹。錙銖周漢。而緜世浸遠。光靈不屬。至使菁華隱沒。芳流歇絕。不其惜乎。雖今之作者。人自爲量。而道路同塵。輟塗殊軌者多矣。豈所以昭末景。汎餘波。有晉徵士尋陽陶淵明。南岳之幽居者也。弱不好弄。長實素心。學非稱師。文取指達。在衆不失其寡。處言愈見其默。少而貧病。居無僕妾。井曰弗任。藜菽不給。母老子幼。就養勤匱。遠惟田生。致親之議。追悟毛子。捧檄之懷。初辭州府三命。後爲彭澤令。道不偶物。棄官從好。遂乃解體世紛。結志區外。定迹深棲。於是乎遠。灌畦鬻蔬。爲供魚菽之祭。織絢緯蕭。以充糧粒之費。心好異書。性樂酒德。簡棄煩促。就成省曠。殆所謂國爵屏貴。家人忘貧者與。有詔徵爲著作郎。稱疾不到。春秋若干。元嘉四年。月日。卒于尋陽縣之某里。近識悲悼。遠士傷情。冥默福應。嗚呼淑貞。夫實以誄華。名由謚高。苟允德義。貴賤何算焉。若其寬樂令終之美。好廉克己之操。有合謚典。無愆前志。故詢諸友好。宜謚曰靖節徵士。其辭曰。

物尙孤生。人固介立。豈伊時邁。曷云世及。嗟乎若士。望古遙集。韜此洪族。蔑彼名級。陸親之行。至自非敦。然諾之信。重於布言。廉深簡絜。貞夷粹溫。和而能峻。博而不繁。依世尙同。詭時則異。有一於此。兩非默置。豈若夫子。因心違事。畏榮好古。薄身厚志。世霸虛禮。州壤推風。孝惟義養。道必懷邦。人之秉彝。不隘不恭。爵同下士。祿等上農。度量難鈞。進退可限。長卿棄官。稚賓自免。子之悟之。何悟之辯。賦詩歸來。高蹈獨善。亦旣超曠。無適非心。汲流舊巘。葺宇家林。晨煙暮藹。春煦秋陰。陳書輟卷。置酒絃琴。居備勤儉。躬兼貧病。人否其憂。子然其命。隱約就閑。遷延辭聘。非直也明。是惟道性。糾纏幹流。冥漠報施。孰云與仁。實疑明智。謂天蓋高。胡魯斯義。履信曷憑。思順何寘。年在中身。疢維疢疾。視死如歸。臨凶若吉。藥劑弗嘗。禱祀非恤。僚幽告終。懷和長畢。嗚呼哀哉。敬述靖節。式尊遺占。存不願豐。沒無求贍。省計却賻。輕哀薄斂。遭壤以穿。旋葬而窆。嗚呼哀哉。深心追往。遠情逐化。自爾介居。及我多暇。伊好之洽。接閭鄰舍。宵盤晝憩。非舟非駕。念昔宴私。舉觴相誨。獨正者危。至方則礙。哲人卷舒。布在前載。取鑒不遠。吾規子佩。爾實愀然。中言而發。遠衆速尤。迕風先蹶。身才非實。榮聲有歇。叡音永矣。誰箴余闕。嗚呼哀哉。仁焉而終。智焉而斃。黔婁旣沒。展禽亦逝。其在先生。同塵往世。旌此靖節。加彼康惠。嗚呼哀哉。

宋孝武宣貴妃誄 并序 謝莊

惟大明六年夏四月壬子。宣貴妃薨。律谷罷煖。龍鄉輟曉。照車去魏。連城辭趙。皇帝痛掖殿之旣闐。悼泉途之已宮。巡步檐而臨蕙路。集重陽而望椒風。嗚呼哀哉。天寵方降。王姬下姻。肅雍揆景。陟屺爰臻。國軫喪淑之傷。家凝實庇之怨。敢撰德於旂旒。庶圖芳於鍾萬。其辭曰。

玄丘烟燼。瑤臺降芬。高唐溼雨。巫山鬱雲。誕發蘭儀。光啓玉度。望月方娥。瞻星比婺。毓德素里。棲景宸軒。處麗絺綌。出懋蘋蘩。脩詩賁道。稱圖照言。翼訓如幄。贊軌堯門。綢繆史館。容與經闡。陳風緝藻。臨象分微。游藝殫數。撫律窮機。躊躇冬愛。惛悵秋暉。展如之華。實邦之媛。敬勤顯陽。肅恭崇憲。奉榮維約。承慈以遜。逮下延和。臨朋違怨。祚靈集祉。慶藹迎祥。皇胤璿式。帝女金相。聯跗齊穎。接萼均芳。以蕃以牧。燭代輝梁。視朔書氛。觀臺告禋。八頌局和。六祈輟滲。衡總滅容。輦翟毀衽。掩綵瑤光。收華紫禁。嗚呼哀哉。帷軒夕改。駟輅晨遷。離宮天邃。別殿雲懸。靈衣虛襲。組帳空煙。巾見餘軸。匣有遺絃。嗚呼哀哉。移氣朔兮。變羅紈。白露凝兮。歲將闌。庭樹驚兮。中帷響。金缸燿兮。玉座寒。純孝擗其俱毀。共氣摧其同樂。仰昊天。之莫報。怨凱風之徒攀。茫昧與善。寂寥餘慶。喪過乎哀。毀實滅性。世覆沖華。國虛淵令。嗚呼哀哉。題湊既肅。龜筮既辰。階撤兩奠。庭引雙輶。維慕維愛。曰子曰身。慟皇情於容物。崩列辟於上旻。崇徽章而出寰甸。照殊策而去城闔。嗚呼哀哉。經建春而右轉。循閭闔而逕渡。旌委鬱於飛飛。龍逶遲於步步。鏘楚挽於槐風。喝邊簫於松霧。涉姑繇而環迴。望樂池而顧慕。嗚呼哀哉。晨輶解鳳。曉蓋俄金山。庭寢日隧。路抽陰重。局闕兮。燈已黯。中泉寂兮。此夜深。銷神躬于壤末。散靈魄於天溇。響乘氣兮。蘭馭風。德有遠兮。聲無窮。嗚呼哀哉。

司馬相如誄

卓文君

嗟嗟夫子兮。亶通儒。少好學兮。綜羣書。縱橫劍伎兮。英敏有譽。尙慕往哲兮。更名相如。落魄遠游兮。賦子虛。畢爾壯志兮。駟馬高車。憶昔初好兮。雍容孔都。憐才仰德兮。琴心兩娛。永托爲妃兮。不恥當壚。生平淺促兮。命也難扶。長夜思君兮。形影孤。步中庭兮。霜草枯。雁鳴哀哀兮。吾將安如。仰天太息兮。抑鬱不舒。訴

此悽惻兮疇忍聽予。泉穴可從兮願殞其軀。

哀祭類

騷

九歌 屈平

東皇太一

吉日兮辰良。穆將愉兮上皇。撫長劍兮玉珥。璆鏘鳴兮琳琅。瑤席兮玉璫。盍將把兮瓊芳。蕙肴烝兮蘭藉。奠桂酒兮椒漿。揚枹兮拊鼓。疏緩節兮安歌。陳竽瑟兮浩倡。靈偃蹇兮姣服。芳菲菲兮滿堂。五音紛紛兮繁會。君欣欣兮樂康。

雲中君

浴蘭湯兮沐芳。華采衣兮若英。靈連蜷兮既留。爛昭昭兮未央。蹇將憺兮壽宮。與日月兮齊光。龍駕兮帝服。聊翱遊兮周章。靈皇皇兮既降。焱遠舉兮雲中。覽冀州兮有餘。橫四海兮焉窮。思夫君兮太息。極勞心兮憊憊。

湘君

君不行兮夷猶。蹇誰留兮中洲。美要眇兮宜修。沛吾乘兮桂舟。令沅湘兮無波。使江水兮安流。望夫君兮未來。吹參差兮誰思。駕飛龍兮北征。遭吾道兮洞庭。薜荔拍兮蕙綢。荃橈兮蘭旌。望涔陽兮極浦。橫大江兮揚靈。揚靈兮未極。女嬋媛兮爲予太息。橫流涕兮潺湲。隱思君兮陴側。桂櫂兮蘭枻。斲冰兮積雪。采薜

荔兮水中。搴芙蓉兮木末。心不同兮媒勞。恩不甚兮輕絕。石瀨兮淺淺。飛龍兮翩翩。交不忠兮怨長期。不信兮告余以不閒。朝騁驚兮江皋。夕弭節兮北渚。鳥次兮屋上。水周兮堂下。捐余玦兮江中。遺余佩兮澧浦。采芳洲兮杜若。將以遺兮下女。時不可兮再得。聊逍遙兮容與。

湘夫人

帝子降兮北渚。目眇眇兮愁予。嫋嫋兮秋風。洞庭波兮木葉下。登白蘋兮騁望。與佳期兮夕張。鳥何萃兮蘋中。罾何爲兮木上。沅有芷兮澧有蘭。思公子兮未敢言。荒忽兮遠望。觀流水兮潺湲。麋何爲兮庭中。蛟何爲兮水裔。朝馳余馬兮江皋。夕濟兮西澨。聞佳人兮召予。將騰駕兮偕逝。築室兮水中。葺之兮荷蓋。荃壁兮紫壇。播芳椒兮成堂。桂棟兮蘭橈。辛夷楣兮藥房。罔薜荔兮爲帷。擗蕙櫨兮旣張。白玉兮爲鎮。疏石蘭兮爲芳。芷葺兮荷屋。繚之兮杜蘅。合百草兮實庭。建芳馨兮廡門。九疑繽兮並迎。靈之來兮如雲。捐余袂兮江中。遺余襟兮澧浦。搴汀洲兮杜若。將以遺兮遠者。時不可兮驟得。聊逍遙兮容與。

大司命

廣開兮天門。紛吾乘兮玄雲。令飄風兮先驅。使凍雨兮灑塵。君回翔兮以下。踰空桑兮從女。紛總總兮九州。何壽夭兮在予。高飛兮安翔。乘清氣兮御陰陽。吾與君兮齊速。導帝之兮九阡。靈衣兮披披。玉佩兮陸離。壹陰兮壹陽。衆莫知兮余所爲。折疏麻兮瑤華。將以遺兮離居。老冉冉兮旣極。不寢近兮愈疏。乘龍兮鱗鱗。高馳兮冲天。結桂枝兮延竚。羌愈思兮愁人。愁人兮奈何。願若今兮無虧。固人命兮有當。孰離合兮可爲。

少司命

秋蘭兮蘼蕪。羅生兮堂下。綠葉兮素枝。芳菲菲兮襲予。夫人兮自有美子。荃何以兮愁苦。秋蘭兮青青。綠葉兮紫莖。滿堂兮美人。忽獨與予兮目成。入不言兮出不辭。乘回風兮載雲旗。悲莫悲兮生別離。樂莫樂兮新相知。荷衣兮蕙帶。儵而來兮忽而逝。夕宿兮帝郊。君誰須兮雲之際。與女沐兮咸池。晞女髮兮陽之阿。望美人兮未來。臨風恍兮浩歌。孔蓋兮翠旒。登九天兮撫彗星。竦長劍兮擁幼艾。荃獨宜兮爲民正。

東君

噉將出兮東方。照吾檻兮扶桑。撫余馬兮安驅。夜皎皎兮旣明。駕龍輅兮乘雷。載雲旗兮委蛇。長太息兮將上。心低徊兮顧懷。羌聲色兮娛人。觀者憺兮忘歸。緼瑟兮交鼓。蕭鐘兮瑤虞。鳴鱗兮吹竽。思靈保兮賢姱。翺飛兮翠曾。展詩兮會舞。應律兮合節。靈之來兮蔽日。青雲衣兮白蜺裳。舉長矢兮射天狼。操余弧兮反淪降。援北斗兮酌桂漿。撰余轡兮高馳翔。杳冥冥兮以東行。

河伯

與女遊兮九河。衝風起兮橫波。乘水車兮荷蓋。駕兩龍兮驂螭。登昆侖兮四望。心飛揚兮浩蕩。日將暮兮悵忘歸。惟極浦兮寤懷。魚鱗屋兮龍堂。紫貝闕兮朱宮。靈何爲兮水中。乘白鼉兮逐文魚。與女遊兮河之渚。流澌紛兮將來下。子交手兮東行。送美人兮南浦。波滔滔兮來迎。魚鄰鄰兮媵予。

山鬼

若有人兮山之阿。被薜荔兮帶女蘿。旣含睇兮又宜笑。子慕予兮善窈窕。乘赤豹兮從文狸。辛夷車兮結

桂旗被石蘭兮帶杜蘅。折芳馨兮遺所思。余處幽篁兮終不見天。路險難兮獨後來。表獨立兮山之上。雲容容兮而在下。杳冥冥兮羌晝晦。東風飄飄兮神靈雨。留靈修兮澹忘歸。歲旣晏兮孰華予。采三秀兮於山閒。石磊磊兮葛蔓蔓。怨公子兮悵忘歸。君思我兮不得閒。山中人兮芳杜若。飲石泉兮蔭松柏。君思我兮然疑作。雷填填兮雨冥冥。猿啾啾兮狢夜鳴。風颯颯兮木蕭蕭。思公子兮徒離憂。

國殤

操吳戈兮被犀甲。車錯轂兮短兵接。旌蔽日兮敵若雲。矢交墜兮士爭先。陵余陳兮躡余行。左驂殪兮右刃傷。霾兩輪兮繫四馬。援玉袍兮擊鳴鼓。天時懟兮威靈怒。嚴殺盡兮棄原野。出不入兮往不返。平原忽兮路超遠。帶長劍兮挾秦弓。首雖離兮心不懲。誠旣勇兮又以武。終剛強兮不可陵。身旣死兮神以靈。魂魄毅兮爲鬼雄。

禮魂

成禮兮會鼓。傳芭兮代舞。姱女倡兮容與。春蘭兮秋菊。長無絕兮終古。

招魂宋玉

朕幼清以廉潔兮。身服義而未沫。主此盛德兮。牽於俗而蕪穢。上無所考此盛德兮。長離殃而愁苦。帝告巫陽曰。有人在下。我欲輔之。魂魄離散。汝筮予之。巫陽對曰。掌夢。上帝其命難從。若必筮予之。恐後謝之不能復用。巫陽焉乃下。招曰。魂兮歸來。去君之恆幹。何爲乎四方些。舍君之樂處。而離彼不祥些。魂兮歸來。東方不可以託些。長人千仞。惟魂是索些。十日代出。流金鑠石些。彼皆習之。魂往必釋些。歸來歸來。不

可以託些。魂兮歸來。南方不可以止些。雕題黑齒。得人肉以祀。以其骨爲醢些。蝮蛇綦綦。封狐千里些。雄
 虺九首。往來儵忽。吞人以益其心些。歸來歸來。不可以久淫些。魂兮歸來。西方之害。流沙千里些。旋入雷
 淵。靡散而不可止些。幸而得脫。其外曠宇些。赤蟻若象。元蠶若壺些。五穀不生。叢菅是食些。其土爛人。求
 水無所得些。彷徨無所倚。廣大無所極些。歸來歸來。恐自遺賊些。魂兮歸來。北方不可以止些。增冰峨峨。飛
 雪千里些。歸來歸來。不可以久些。魂兮歸來。君無上天些。虎豹九關。啄害下人些。一夫九首。拔木九千
 些。豺狼從日。往來旻旻些。懸人以嬉。投之深淵些。致命於帝。然後得瞑些。歸來歸來。往恐危身些。魂兮歸
 來。君無下。此幽都些。土伯九約。其角鬻鬻些。敦胙血拇。逐人駸駸些。參目虎首。其身若牛些。此皆甘人。歸
 來歸來。恐自遺災些。魂兮歸來。入修門些。工祝招君。背行先些。秦篝齊縷。鄭絛絡些。招具該備。永嘯呼些。
 魂兮歸來。反故居些。天地四方。多賊姦些。像設君室。靜閒安些。高堂邃宇。檻層軒些。層臺累榭。臨高山些。
 網戶朱綴。刻方連些。冬有突夏。夏室寒些。川谷徑復。流潺湲些。光風轉蕙。泛崇蘭些。經堂入奧。朱塵筵些。
 砥室翠翹。絳曲瓊些。翡翠珠被。爛齊光些。蒨阿拂壁。羅幃張些。纂組綺縞。結琦璜些。室中之觀。多珍怪些。
 蘭膏明燭。華容備些。二八侍宿。射遞代些。九侯淑女。多迅衆些。盛鬋不同制。實滿宮些。容態好比。順彌代
 些。弱顏固植。奢其有意些。姱容修態。組洞房些。蛾眉曼睩。目騰光些。靡顏膩理。遺視矚些。離榭修幕。侍君
 之間些。翡帷翠幃。飾高堂些。紅壁沙版。元玉之梁些。仰觀刻桷。畫龍蛇些。坐堂伏檻。臨曲池些。芙蓉始發。
 雜芰荷些。紫莖屏風。文緣波些。文異豹飾。侍陂陀些。軒轅旣低。步騎羅些。蘭薄戶樹。瓊木籬些。魂兮歸來。
 何遠爲些。室家遂宗。食多方些。稻粢穠麥。挈黃梁些。大苦鹹酸。辛甘行些。肥牛之臠。臠若芳些。和酸若苦。

陳吳羹些。脯鼈魚羔。有柘漿些。鵠酸臙鼻。煎鴻鷓些。露雞臙蟻。厲而不爽些。粬糗蜜餌。有餽餽些。瑤漿靈
勺。實羽觴些。挫糟凍飲。耐清涼些。華酌既陳。有瓊漿些。歸來歸來。反故室。敬而無妨些。肴羞禾通。女樂羅
些。陳鐘按鼓。造新歌些。涉江採菱。發揚荷些。美人既醉。朱顏酡些。嫉光眇視。目曾波些。被文服纖麗。而不
奇些。長髮曼鬢。豔陸離些。二八齊容。起鄭舞些。衽若交竿。撫案下些。竽瑟狂會。擯鳴鼓些。宮庭震驚。發激
楚些。吳歛蔡謳。奏大呂些。士女雜坐。亂而不分些。放陳組纓。班其相紛些。鄭衛妖玩。來雜凍些。激楚之結。
獨秀先些。篔簹象棋。有六簿些。分曹並進。道相迫些。成臯而牟。呼五白些。晉制犀比。費白日些。鏗鐘搖虞。
楔梓瑟些。娛酒不廢。沈日夜些。蘭膏明燭。華鐙錯些。結撰至思。蘭芳假些。人有所極。同心賦些。耐飲國盡。
歡樂先故些。魂兮歸來。反故居些。亂曰。獻歲發春兮。汨吾南征。菘蘋齊葉兮。白芷生。路貫廬江兮。左長薄。
倚沼畦瀛兮。遙望博青。驪結駟兮。齊千乘。懸火延起兮。元顏蒸。步及驟處兮。誘騁先。抑鶩若通兮。引車右。
還與王趨夢兮。課後先。君王親發兮。憚青兕。朱明承夜兮。時不可淹。臯蘭被徑兮。斯路漸。湛湛江水兮。上
有楓。目極千里兮。傷春心。魂兮歸來。哀江南。

大招景差

青春爰謝。白日昭只。春氣奮發。萬物遽只。冥淩浹行。魂無逃只。魂魄歸來。無遠遙只。魂乎歸來。無東無西。
無南無北。只。東有大海。溺水洑洑只。螭龍並流。上下悠悠只。霧雨淫淫。白皓膠只。魂乎無東。湯谷寂寥只。
魂乎無南。南有炎火千里。蝮蛇蜒只。山林險隘。虎豹蜿只。鰐鱗短狐。王虺窩只。魂乎無南。蜮傷躬只。魂乎
無西。西方流沙。漭洋洋只。豕首縱目。被髮鬢只。長爪踞牙。談笑狂只。魂乎無西。多害傷只。魂乎無北。北有

寒山遑龍施只。代水不可涉。深不可測只。天白顛顛。寒凝凝只。魂乎無往。盈北極只。魂魄歸來。閒以靜只。自恣荆楚。安以定只。逞志究欲。心意安只。窮身永樂。年壽延只。魂乎歸來。樂不可言只。五穀六仞。設菹粢只。鼎臠盈望。和致芳只。內鷓鴣。味豺羹只。魂乎歸來。恣所嘗只。鮮蠃甘雞。和楚酪只。醢豚苦狗。膾苴蓴只。吳酸蒿蕞。不沾薄只。魂乎歸來。恣所擇只。炙鴟烝鳧。粘鶉臠只。煎鱖臠雀。遽爽存只。魂乎歸來。麗以先只。四酎并熟。不澀隘只。清馨凍飲。不歡役只。吳醴白蘘。和楚瀝只。魂乎歸來。不遽惕只。代秦鄭衛。鳴竽張只。伏戲駕辯。楚勞商只。謳和揚阿。趙簫倡只。魂乎歸來。定空桑只。二八接武。投詩賦只。叩鐘調磬。娛人亂只。四上競氣。極聲變只。魂乎歸來。聽歌謨只。朱脣皓齒。嫵以媠只。比德好閒。習以都只。豐肉微骨。調以娛只。魂乎歸來。安以舒只。媠目宜笑。娥眉曼只。容則秀雅。穉朱顏只。魂乎歸來。靜以安只。媠修滂浩。麗以佳只。曾頰倚耳。曲眉規只。滂心綽態。姣麗施只。小腰秀頸。若鮮卑只。魂乎歸來。思怨移只。易中和心。以動作只。粉白黛黑。施芳澤只。長袂拂面。善留客只。魂乎歸來。以娛昔只。青色直眉。美目嫵只。鑿輔奇牙。宜笑嗎只。豐肉微骨。體便娟只。魂乎歸來。恣所便只。夏屋廣大。沙堂秀只。南房小壇。觀絕靈只。曲屋步櫺。宜擾畜只。騰駕步遊。獵春囿只。瓊轂錯衡。英華假只。茝蘭桂樹。鬱彌路只。魂乎歸來。恣志慮只。孔雀盈園。畜鸞皇只。鷓鴣羣晨。雜鴝鶒只。鴻鵠代遊。曼鷓鴣只。魂乎歸來。鳳皇翔只。曼澤怡面。血氣盛只。永宜厥身。保壽命只。室家盈庭。爵祿盛只。魂乎歸來。居室定只。接徑千里。出若雲只。三圭重侯。聽類神只。察篤天隱。孤寡存只。魂乎歸來。正始昆只。田邑千畛。人阜昌只。美冒衆流。德澤章只。先威後文。善美明只。魂乎歸來。賞罰當只。名聲若日照。四海只。德譽配天。萬民理只。北至幽陵。南交趾只。西薄羊腸。東窮海只。魂乎歸來。尚賢士

只發政獻行。禁苛暴。只舉傑壓陞。誅譏罷。只直羸在位。近禹麾。只豪傑執政。流澤施。只魂乎歸來。國家爲只。雄雄赫赫。天德明只。三公穆穆。登降堂只。諸侯畢極。立九卿只。昭質旣設。大侯張只。執弓挾矢。揖辭讓只。魂乎歸來。尙三王只。

哀祭類

祈禱文

祭江祈晴文 張說

滔滔大江。南國之紀。協靈通氣。降福禦災。是載方冊。代存祀典。歲維秋季。苗稼大熟。雨霖猥集。農夫未收。油油秔稻。垂生芽蘖。上則神威將廢。下則人心何仰。公私憂窘。靡禱不周。訴爾明靈。撤此雲雨。欽儲牲幣。俟答神休。謹以嘉酌脯醢。敬崇禋請。

福州鱔溪禱雨文 曾鞏

嗟乎旱也。誰則爲之。芄芄之稼。將槁而萎。嗷嗷之衆。曷望而依。爲閩屬者。寇賊之罹。逮其旣附。我士已疲。餘醜成羣。百十睢睢。跳踉出沒。負力乘巖。亦有爲渠。諸偷所推。相望棋布。未受罽羈。室家莫寧。遠近並疑。我畜以柔。亦震以威。從有法賞。不從係纍。或擾而序。或就繯徽。逮歲朔易。盪定無遺。山林夜行。笑語追隨。吾人卽安。含糗而嬉。士馬亦奮。桓桓駉駉。天子聖德。海邦是綏。維此海邦。初亦難饑。今寧宇矣。師征始歸。今食足矣。廩實尙微。若歲大熟。如梁如茨。如京如坻。自公及私。獄無訟繫。里無盜闕。式于永世。方始在茲。今此大田。旣碩而齊。俾不卒成。孰忍爲斯。神有靈蹟。國人所祇。神有顯號。天子所躋。萎能起之。槁能澤之。

胡能有餘。斂而不施。我用卜日。蚤駕以馳。卽告潭側。尙其聽之。攘除驕陽。騰雲曠霓。播爲甘液。霑洒淋漓。俾農有秋。百物具宜。熄偷與爭。長置刑笞。人於報事。豈有斃思。

哀祭類

謝文

諸廟謝雨文 曾 鞏

吏之罪大矣。一切從事於謹繩墨督賦役而已。民之所欲不能與。所惡不能去。自恕以竊食。不知其可媿。安能使陰陽和風雨時乎。故若鞏者。任職於外。六年于茲。而無歲不勤於請雨。賴天之仁。鬼神之靈。閔人之窮。輒賜甘澤。以救大旱。吏知其幸而已。其爲酒醴牲饗。以報神之賜。曷敢不虔。維神尙終惠之。使永有年。則神亦無窮有依于人。

哀祭類

祝文

止雨祝 董仲舒

諾。天生五穀以養人。今淫雨太多。五穀不和。敬進肥牲清酒。以請社靈。幸爲止雨。除民所苦。無使陰滅陽。陰滅陽。不順于天。天之常意。在于利人。人願止雨。敢告于社。

祝皋亭神文 白居易

維長慶二年。歲次癸卯。七月癸丑朔。十六日戊辰。朝議大夫使持節杭州諸軍事守杭州刺史上柱國白

居易以酒乳香果。昭告於皋亭廟神。去秋愆陽。今夏少雨。實憂災沴。重困杭人。居易忝奉詔條。愧無政術。既逢愆序。不敢寧居。一時禱伍相神。祈城隍祠靈。雖有應。雨未霑足。是用擇日。祇事改請於神。恭惟明神。稟靈於陰。祇資善於釋氏。聰明正直。潔靖慈仁。無幽不通。有感必應。今請齋心虔告。神其鑒之。若四封之間。五日之內。雨澤霑足。稼穡滋稔。敢不增修像設。重荐馨香。歌舞鼓鐘。備物以報。如此則不獨人之福。亦惟神之光。若寂寥自居。肸鬻無應。長吏虔誠而不答。下民盼望而不知。坐觀田農。使至枯悴。如此則不獨人之困。亦惟神之羞。惟神裁之。敬以俟命。尙饗。

生擒西蕃鬼章奏告永裕陵祝文

蘇軾

大獮獲禽。必有指縱之自。豐年高廩。孰知耘耔之勞。憬彼西戎。古稱右臂。自嘉祐末。木征擾邊。至熙寧中。董氈方命。於赫聖考。恭行天誅。非貪尺寸之疆。蓋爲民除蝥賊。遂建長久之策。不以賊遺子孫。而西蕃大首領鬼章。首犯南川。北連拓拔。申命諸將。擇利而行。旋聞偏師。無往不剋。吏士用命。爭酬未報之恩。聖靈在天。難逃不漏之網。已於八月戊戌。生擒鬼章。頡利成擒。初無渭水之恥。郅支授首。聊報谷吉之冤。謹當推本聖心。益修戎略。務在服近而來遠。期於偃革以息民。仰冀威神。曲垂昭鑒。

哀祭類

祝香文

大禮畢車駕詣景靈宮恭謝祝香文 周必大

今皇帝蒞事泰壇。已拜慶成之況。告慶原廟。載昭垂裕之功。供養聖祖天尊大帝。伏願皇帝盛德日新。純

休天錫。益介萬年之壽。永觀四海之安。稽首歸依。無極大道。

孟春車駕詣景靈宮朝獻祝香文 周必大

孟春屆候。法駕親臨。恭焚寶香。供養聖祖。天尊大帝。伏願皇帝。堯天徧覆。舜日光昭。庶民咸樂於熙臺。萬物均陶于暖律。皇圖有永。睿算無窮。

哀祭類

上梁文

英德殿上梁文 王安石

天都左界。帝室中經。誕惟僊聖之祠。夙有神靈之宅。嗣開宏築。追奉睟容。方將廣舜孝於無窮。豈特尙漢儀之有舊。先皇帝道該五泰。德貫三儀。文摛雲漢之章。武布風霆之號。華夏歸仁而砥厲。蠻夷馳義以駿奔。清蹕甫傳。靈輿忽往。超然姑射山無一物之疵。邈矣壽邱臺有萬人之畏。已葬鼎湖之弓劍。將游高廟之衣冠。今皇帝孝奉神明。恩涵動植。纂禹之服。期成萬世之功。見堯於葬。未改三年之政。乃眷熏修之吉壤。載營館御之新宮。考協前彝。述追先志。孝嚴列峙。寢門可象於平居。廣拓旁開。輦路故存於陳迹。官師肅給。斤築隆施。揆吉日以庀徒。舉修梁而考室。敢申善頌。以相歡謠。

兒郎偉。拋梁東。聖主迎陽坐禁中。明似九天昇曉日。恩如萬國轉春風。

兒郎偉。拋梁西。瀚海兵銷太白低。王母玉鑲方自執。大宛金馬不須齎。

兒郎偉。拋梁南。丙地星高每歲占。千障滅烽開嶺徼。萬艘輸費引江潭。

兒郎偉。拋梁北。邊頭自此無鳴鏑。卽看呼韓渭上朝。休誇寶憲燕然勒。
兒郎偉。拋梁上。彷彿神游今可想。風馬雲車世世來。金輿玉辇年年往。
兒郎偉。拋梁下。萬靈隕社扶宗社。天垂嘉種已豐年。地產珍符方極化。
伏願上梁之後。聖躬樂豫。寶命靈長。松茂獻兩宮之壽。椒繁占六寢之祥。宗室蕃維之彥。朝廷表幹之良。
家傳慶譽。代襲龍光。肩一心而顯相。保饋祝之無疆。

外家別業上梁文 元好問

窮於途者返於家。乃人情之必至。勞以生而佚以老。亦天道之自然。方屬風霜叵薄之餘。而有里社浮湛之漸。茲焉卜築。今也落成。遺山道人蟬蠹書癡。雞蟲祿薄。猥以勃窣槃跚之迹。仕於危急存亡之秋。左曹之斗食未遷。東道之戈船已御。久矣公私之俱罄。困於春夏之長圍。窮甚析骸死唯束手。人望荆兄之通好。義均紀季之附庸。出涕而女於吳。莫追於既往。下車而封之杞。有覲於方來。謀則僉同。議當孰抗。爰自上書宰相。所謂試微軀於萬仞不測之淵。至於喋血京師。亦常保百族於羣盜垂涎之口。皇天后土。實聞存趙之謀。枯木死灰。無復哭秦之淚。初一軍搆亂。羣小歸功。却太學之名流。文鄭人之逆節。命由威制。佞豈願爲。就磨甘露御書之碑。細刻錦溪書叟之筆。蜀家降款。具存李昊之世修。趙王禪文。何預陸機之手迹。伊誰受賞。於我嫁名。悼同聲同氣之間。有無罪無辜之謗。耿孤懷之自信。聽衆口之合攻。果吮癰舐痔之自甘。雖竄海投山。其何恨。惟彼證龜而作鼈。始於養虺以成蛇。追韓之騎甫還。射羿之弓隨穀。以流言之自止。知神聖之可憑。復齒平民。僅延殘喘。澤畔而湘纍已老。樓中而楚望奚窮。懷先人之敝廬。可憐焦

土眷外家之宅相。更愧前途。豈謂事有幸成。計尤私便。東諸侯助竹木之養。王錄事寄草堂之貲。占松聲之一邱。近桃花之三洞。東牆西壁。無補圻之勞。上雨旁風。有閉藏之固。已與編戶細民而雜處。敢用失侯。故將而自名。因之挫銳以解紛。且以安常而處順。老盆濁酒。便當接田父之歡。春韭晚菘。尙媿奪園夫之利。彼扶搖直上。擊水三千。韋杜城南。去天尺五。坐廟堂佐天子。蓋有命焉。使鄉里稱善人。斯亦足矣。輒取合歡之意。演爲助役之謠。

哀祭類

釋菜文

己卯春釋菜先聖文 劉 因

聖代天言。明告萬世。寥寥方冊。孰傳聖言。天啓聖心。程朱將命。標晦浚關。聳聰瞽明。謂當後人。承此遺澤。孰云剽盜。資我而文。肆焉多歧。孰會其一。徒爲瞻仰。有惻此心。因早躁狂。若將有志。中實脆屈。未立已頽。揆厥無成。實由貪懦。時馳意去。凜不自容。顧念初心。悅焉如失。今此闕館。惟我之求。講學有徒。進修有地。研窮參訂。亦復有書。於古遺言。於今學者。尙有裨益。少慰此心。但懼悠悠。復循前軌。惟神啓迪。實有臨之。

哀祭類

歎道文

慶陽節玉晨觀歎道文 封 敖

莫高者天。莫大者道。天以不言而信。道以不宰而功。元關潛契於虛無。祕籙廣傳於妙有。由是自我聖祖。

選吾神孫。微言載流。真教不墜。膏濡動植。亭育生靈。豈獨鍊氣谷神。保元恬淡而已。伏惟仁聖文武至神。大孝皇帝陛下。生知至道。宿應上元。紹列聖之皇圖。冠羣仙於紫府。光承景運。溥濟含靈。凝旒而道用。沖深。端拱而元風。淡泊。伏以今月十一日。皇帝降誕之辰。女道士等焚香行道。敬修功德。伏惟聖壽山固。皇恩海深。將四序而周行。與三光而長燭。天覆地載。何得而名。道護神扶。臻乎無極。

憲宗忌日玉晨觀歎道文封 敖

清淨無爲之謂道。是非有作之謂名。道知其源。名亦歸正。由是羣生遂性。咸臻妙有之功。四氣順時。自契不言之信。洪鑪假喻。大塊無形。載厚地以繁滋。覆高天而悠久。伏以今月二十七日。憲宗皇帝忌。女道士等齋戒精修。焚香虔懇。伏願追蹤元運。息駕黃庭。保聖祚於無疆。降神功於有截。日月所照。福祐同霑。

哀祭類

齋文

爲相國隴西公黃籙齋文 李商隱

臣忝系仙枝。獲蒙道蔭。早佩相印。屢登齋壇。雖八景三清。麤聞科戒。而七情五賊。未勉脩持。入輔出征。綿時歷歲。伏慮政刑非常。賞罰或乖。積愆咎於元司。負委寄於皇渥。今謹齋薄具。仰獻微誠。伏乞太上三尊。十方衆聖。曲垂保佑。大賜滌除。俾善業克成。良願無擁。金柯玉葉。奉聖祖於千秋。黃屋丹墀。戴吾君於億載。百蠻康樂。萬國乂安。然後散及冥塗。霑諸艷部。寒靈罷對。滯爽騰輝。俱升仁壽之方。共奉太平之化。爲馬懿公郡夫人王氏黃籙齋文 李商隱

唐某年月日朔。上清大洞三境弟子妾某。本命某年若干歲某月日生。屬北斗某星。住河南府河南縣正平坊安國觀內。今謹攜私屬弟子某等。詣京兆府萬年縣永崇坊龍興觀內。奉謁受上法師東岳先生鄧君。奉依科儀於三聖會仙堂內。脩建黃籙妙齋三日三夜。轉經行道。奉爲先受法尊師。並道場男女官衆。及九元七祖弟子門徒等。懺罪拔苦。祈恩辭上。謁虛無元始自然天尊。太上大道君。太上老君。金闕後聖李君。十方靈真。三界官屬。三十六部尊經。元中大法師。天地水三官。北斗尊神。本命星尊神。洞天林谷。一切棲隱諸靈仙等。妾夙值師尊。欽聞教旨。伏以元皇布氣。時播羣生。太一傳形。肇流品庶。皆陶無始。成彼自然。及三古已還。九皇祕迹。羣妖衆孽。黷亂真元。鬼道尸邪。干迷至正。於是大分治化。廣闢章符。金板玉繩。載演修存之術。河源酆部。重明考治之科。故得三靈無墊。壞之虞。萬物被生成之德。妾內惟幼騃。晚遂脩持。爰在童蒙。被諸僭咎。去元和某年。獲託於故戶部尙書贈左僕射臣馬總。極紛華於少壯。結胎血之因緣。況臣總被沐君恩。久居藩鎮。受專征之寄。擅外閫之權。殄寇下城。所傷者不計。用刑持法。所坐者至多。雖事上之心。誠無顧避。而奉行之際。或爽重輕。故臣總平生之時。許妾以虛無爲念。冀因晚節。同結良緣。及臣總捐家。妾終喪紀。婚姻麤畢。門戶如初。故東都某觀道士南岳先生符君。哀妾香火之勤。成妾巾褐之願。爰從披度。驟歷年光。雖積穢行尸。感通莫冀。而三蟲六賊。制伏無虧。流輩之中。吹噓驟至。謂可以奉三洞之尊法。稽七真之異聞。勸請殷勤。推許重疊。妾雖榮從非望。亦念切良時。遂於某年於某處奉詣大洞師東岳先生鄧君。奉受上法。迴車畢道。交帶紫紋。負荷元科。叨忝真位。妾夙宵感勵。寢食慙惶。於今五年。益勤一志。兼誓除俗累。漸慕清修。休絕以來。志念愈潔。所希稍存真氣。可降衆靈。又按仙記云。師與

弟子能相保七年法者。當得道。況今國家奉元元之裔。聖上崇清淨之風。妾師奉爲君親。廣存濟度。妾又筋骸非病。齒髮未衰。仰佩元恩。實爲罔極。是敢重投靈地。再獻微誠。遂有同學男女官某。嘉妾至心。勉妾上路。卽以今夕。再次仙都。慶百生有幸之辰。登三聖會真之室。修崇始畢。朝禮云初。何必銀臺。遠居東海。詎資瑤闕。近到西昆。窺觀而羽翼疑生。行列而雲霓交映。欣榮過極。感泣不勝。謹用上按仙儀。旁徵齋法。特延清衆。重請本師。伏乞太上三尊。十方衆聖。曲流元澤。大降鴻私。錄妾一念之清心。赦妾億劫之重罪。伏願善緣益長。丹懇獲申。君王冀保於千齡。輔弼永綏於百福。五穀豐稔。四方乂寧。先授道師。遷洞天之位。今傳法主。享龜鶴之年。道俗二緣。咸蒙覆露。幽明兩代。並洗懣尤。先魂無冢。訟之辜。同志絕干城之患。陰幽滯爽。狴狂窮冤。皆獲遷昇。盡從寬釋。妾誓持女弱。永奉元微。苟負盟文。冀當冥考。妾某無任懇惻祈恩之至。謹辭。

十會齋文 司空圖

夫萬殊苦惱。神慈普救於幽冥。十會區分。王道同歸於平等。當穀觶求哀之地。是噉喙就涸之時。關夷路於前程。遏勝波於沸鼎。欲使天人共感。存沒均休。乃此日設齋之意也。況屬豐穰。方登仁壽。宜屬大衆。共緝良因。無緣則三道寶階。如登劍樹。有願則十方淨域。便越塵區。今則妙供已陳。散花乍雨。維摩赴會。捧瑞露以同沾。羅漢飛空。曳危峯而亦至。齋衆某等。或轅門上列。或金穴豪家。將雛則驥子超羣。命侶則龐眉狎至。軒車競路。士女傾城。法鼓雷轟。震泉扃而動鑰。天香馥烈。擁日氣以盤空。於是跪捧寶鑪。連枝玉軸。冀將功德。奉事莊嚴。伏願諸王及五道六曹真官。永作尊神。益匡善道。使幽冥共仰。靈蠢知歸。緡緡不

讓於樂輸。齊潔復申於衆懇。諸曹並受羣品旁沾。伏覬過去尊靈。見存家眷。皆憑護念。免怖沉淪。恃王心而若恃私心。觀地府而如觀天府。必致清涼山上。逢異鳥而先告吉祥。黑暗空間。遇神光而別迴照燭。雖營魂遊岱。去住無常。而苦海登舟。冤樂共濟。生生隨願。免在殊鄉。處處安居。便同極樂。凡聞梵誦。遽脫羈愁。用顯含靈。咸蘇密網。

迎修十會齋文 司空圖

非才非聖。過泰過榮。一舉高第。兩朝美官。遭亂離而脫禍。歸鄉里而獲安。門戶粗成。簪纓免絕。四十八年。已往未省。歸心百千萬劫。常來豈迷善道。令終可保。止絕何傷。災疾所縈。古今常理。但雖勤懺悔。未去羶腥。大宜均罪於鼓刀。小合誤傷於失手。況蚊蚋之類。屢有傷殘。僕乘之勞。時加箠楚。或存或沒。若重若輕。並願各遂逍遙。永祛冤結。目前眷屬。世世相逢。身後林泉。生生自適。仰慈悲之宏誓。成幽顯之勝因。蠢動有情。沾濡共泰。

哀祭類

願文

遼陽山寺願文 盧思道

齊興二十有三載。區宇乂安。列聖重光。百神受職。天平地成。禮諧樂暢。劍戟亡鑄。江海無波。皇帝體膺上哲。運鍾下武。以至德字黔首。大明臨赤縣。深仁俯漏。惠化潛通。榮鏡六幽。昭蘇八表。唐旌已立。芻輿不遠。而至殷網既開。肖翹咸遂其所。壇凝休氣。渚幕榮光。元扈告符。翠琰啓籙。阿閣朝誼。棘林夜靜。西瑄協律。

南嚮迎神。衣氣操龜之俗。懷音請吏。反踵修股之渠。膜拜空首。四海懾然。中外禔福。尉侯無警。書軌大同。猶以爲負辰垂旒。人世微業。功成治定。域中小道。投心覺海。束意元門。手執明珠。頂文甘露。調御天人。不徇巖廊之重。明行具足。寧屑裘冕之尊。十力四心。東漸西被。日月出矣。風雨潤之。屠門鮑肆。化成嚴淨之所。蟬螻蛄網。於仁壽之域。參墟奧壤。王迹所基。密都是宅。別館攸在。襟帶遐長。原陸爽秀。高巖鬱起。作鎮東偏。峯羅羣玉。鸞頭之狀。非美樹列三珠。雞足之形。可陋洞穴。條風生和雅之曲。圓珠積水流清妙之音。于時玉燭調年。金商在律。職方具禮。效駕西巡。六龍齊轡。七萃按部。雷動星移。凝鑾佇蹕。乃建仁祠。於彼勝地。成之不日。旣麗且康。昔周夜初明。漢池云鑿。事隔荒裔。道若存亡。哲王馭歷。弘濟區宇。前聖後聖。旦暮爲期。以此勝因。仰爲武成皇帝。及清廟聖靈。願西遇彌陀。上征兜率。雄視三界。高臨四衢。百年之神。俯輕羣后。一音所導。遠同佛日。皇太后福踰姜水。社邁塗山。壽比太陰。業均厚載。聖主齊明。兩曜合德。二儀受錄。錯于靈河。開金簡于仙嶽。龍官鳥紀。未可匹其光大。象天任地。焉能喻其長久。皇太子德茂元良。道高上嗣。牢籠啓誦。孕育莊丕。六宮眷屬。諸王昆弟。皆智慧莊嚴。王華松茂。永侍披香。長固磐石。以茲博利。被于萬品。當使法界虛空。生靈動植。俱沐定水。同陰法雲。斯誓或差。無取正覺。

哀祭類

醮辭

晉公后土醮詞 杜光庭

伏以惟地惟天。厚載廣覆。生成庶品。孕育羣靈。坤德母儀。光被萬有。粵自君臣父子。洎於動植飛潛。厥有

誠祈。盍申昭告。臣封境之內。戈甲屢興。害及丘墳。戮兼嬰耄。遠近塗炭。人鬼不寧。痛彼一方。毒深骨髓。念茲萬姓。誠切禱祈。瀝血披心。仰希鑒祐。伏冀曲哀。虔祝俯借威靈。命山川嶽瀆之神。助平災沴。勅雷電風雲之吏。共靜郊原。大開倚劍之門。不隔朝天之路。昭蘇疲俗。洗滌深冤。豈伊項籍之祠。能祛蜀難。無使蔣山之廟。獨助晉師。奉學陳詞。言興涕實。不任。

晉公北帝醮詞 杜光庭

伏以五緯在天。三元運氣。上宗斗極。下統人倫。陰陽有休否之期。躔次有照臨之數。伏慮元命之內。宮宿之中。因遇衡妨。遂成厄滯。敢憑吉日。虔備醮筵。上叩尊靈。特希鑒祐。使三命九宮之厄。盡獲銷禳。明星暗曜之災。並蒙寧息。一川康泰。萬姓輯和。解甲偃兵。年豐俗阜。永虔素懇。以答元慈。不任。

哀祭類

冠辭

漢昭帝冠辭

陛下離顯先帝之光耀。以承皇天嘉祿。欽順仲夏之吉日。遵並大道。邪或乘集。萬福之休靈。始加昭明之元服。推遠稚免之幼志。崇積文武之寵德。肅勤高祖清廟。六合之內。靡不息。陛下永永與天無極。

晉太子冠祝文

令月吉日。始加元服。皇帝穆穆。思宏袞職。欽若昊天。六合是式。率遵祖考。永永無極。眉壽惟祺。介茲景福。

鄭樾冠字祝辭 戴良

猗歟那歟。噲噲其正。誰闕斯慮。我寢我成。寢其成矣。羣材彙征。惟梃者桷。獨爾高乘。可陵沆漑。可摘日星。俯瞰千仞。危而不傾。我觀是木。產彼幽垌。一朝效用。巨細必登。居下而汗。闔闔是丁。卑而甚力。曰爲旅楹。閉閤戶牖。闌楯檻櫺。冗微瑣屑。僅脫薪蒸。彼哉梁棟。固莫與京。苟任之重。亦懼弗勝。豈若斯桷。負出杳冥。衆木仰視。靡或不承。獲躋登茲。伊誰之令。惟材之長。乃高其升。靖惟我人。同具是形。及其用世。或重或輕。或幽而辱。或顯而榮。何異此木。以材自呈。爾生鄭樾。今旣弱齡。寧復處卑。不是之懲。以茲吉日。具弁于庭。曰加爾首。俾棄孩嬰。本諸詩義。考諸禮經。字爾叔高。式敬爾名。爾其自今。毋替厥稱。苟材孔長。會處高明。矧爾孝義。九世繩繩。皇用褒之。有奕門旌。旣當承宗。奉此嘗蒸。猶桷梃然。衆木所憑。一不自持。載騫載崩。兢兢業業。孝道乃興。又況是道。古語有徵。曰先百行。惟孝爲能。人克履之。實洪厥聲。所處之高。舍此曷營。幸祇訓辭。勿忝所生。我言匪陋。惟聖道之程。

哀祭類

祝嘏詞

漢獻帝宗廟祝嘏辭 蔡邕

嗣曾孫皇帝某。敢昭告于皇祖高皇帝。各以后配。昔受命京師。都于長安。享國十有一世。歷年二百一十載。遭王莽之亂。宗廟墮壞。世祖復帝祚。遷都洛陽。以服土中。享國一十一世。歷年一百六十五載。予末小子。遭家不造。早統洪業。奉嗣無疆。關東吏民。敢行稱亂。總連州縣。擁兵聚衆。以圖叛逆。震驚王師。命將征服。股肱大臣。推皇天之命。以已行之事。遷都舊京。昔周德缺而斯干作。應運變通。自古有之。於是乃以二

月丁亥。來自雒。越三月乙巳。至于長安。飭躬不慎。寢疾旬日。賴祖宗之靈。以獲有瘳。吉旦齊宿。敢用潔牲。一元大武。柔毛剛鬣。商祭明視。薌合嘉蔬。香其醑醑。豐本明粢。醴酒用告。遷來尙饗。

哀祭類

賽文

賽蔣山廟文 沈約

我皇體天御宇。望日表尊。備樂變乎笙鏞。鬱禮華於俎豆。邇無不懷。遠無不肅。烏革元素之容。草移丹綠之狀。泉露改味。日月重光。仰惟大王年踰二百。世兼四代。揚玉桴。布瑤席。秦梁楚趙之巫。把瓊茅而延佇。燕衛宋鄭之音。結流風而成曲。九嶷之乘蔽日。三山之駕若雲。

禱雨賽蔣山文 陸倕

陸周祚胤。鍾嶽降精。聰明正直。得一居貞。無方無體。不疾不行。化馳九縣。位冠百靈。東掩屢憊。西郊已戢。偶龍矯首。泥人鶴立。神聽孔殷。靈應揮霍。儵覩翻伊。俄聞倒洛。樂周祈畢。恩洽酒闌。靈談抗袖。鬼笑投枓。推茲且引。於萬斯歡。

哀祭類

密詞

東太一宮開啓保夏祝聖壽金籙道場密詞 歐陽修

伏以寂然妙道。推善應以無方。瞻彼高靈。薦精誠而必達。屆此長嬴之候。是惟茂育之時。爰稽玉笈之真。

文載潔雲壇之淨醮。冀敷昭鑒。來集純禧。固壽歷之延昌。溥蒼黔而均祐。西太一宮續催生道場密詞。歐陽修。伏以吉月迎祥。靈禱叶應。爰卽清真之宇。虔修科式之儀。冀祓滌于害災。俾敷昭于福應。載昌儲慶。永佑基圖。

哀祭類

贊饗文

史記郊拜太一贊饗文 司馬遷

天始以寶鼎神策授皇帝。朔而又朔。終而復始。皇帝敬拜見焉。

史記拜祝祠太一贊饗文 司馬遷

德星昭衍。厥惟休祥。壽星仍出。淵耀光明。信星昭見。皇帝敬拜太祝之享。

哀祭類

告文

告伯父殯文 劉敞

古者庶人之喪。鄰里執事。其在士千里赴義。及其送葬。塗潦毋避。焉有至親。而或不至。某獨不幸。受命典城。戎馬是司。匍匐不能。不哭于堂。不祖于堂。不祖于庭。窆不復土。虞不奉牲。回望萬里。悲號失聲。門外之治。王命實行。蓋古亦云。不卽人情。於奠陳詞。以昭哀誠。

哀祭類

盟辭

漳河盟辭 袁紹

賊臣董卓承漢室之微。負甲兵之衆。陵越帝城。跨蹈王朝。幽鳩太后。戮殺弘農。提挈幼主。越遷秦地。殘害朝臣。斬刈忠良。焚燒宮室。烝亂宮人。發掘陵墓。虐及鬼神。過惡蒸皇天。濁穢薰后土。神祇怨恫。無所憑恃。兆人泣血。無所控告。仁賢之士。痛心疾首。義士奮發。雲興霧合。咸欲奉辭伐罪。躬行天誅。凡我同盟之後。畢力致命。以伐凶醜。同獎王室。翼戴天子。有渝此盟。神明是殛。俾墜其師。無克祚國。

盟新羅百濟文 劉仁軌

往者百濟先王。迷於順逆。不敦鄰好。不睦親姻。結託高麗。交通倭國。共爲殘暴。侵削新羅。剽邑屠城。略無寧歲。天子憫一物之失所。憐百姓之無辜。頻命行人。遣其和好。負險恃遠。侮慢天經。皇赫斯怒。恭行弔伐。旌旗所指。一戎大定。固可瀦宮污宅。作誠來裔。塞源拔本。垂訓後昆。然懷柔伐叛。前王之典。令興亡繼絕。往哲之通規。事必師古。傳諸曩冊。故立前百濟太子司稼正卿扶餘隆爲熊津都督。守其祭祀。保其桑梓。依倚新羅。長爲與國。各除宿憾。結好和親。恭承詔命。永爲藩服。仍遣使人右威衛將軍魯城縣公劉仁願。親臨勸諭。具宣成旨。約之以婚姻。申之以盟誓。刑牲歃血。共敦終始。分災恤患。恩若兄弟。祇奉綸言。不敢失墜。旣盟之後。共保歲寒。若有背盟。二三其德。興兵動衆。侵犯邊陲。明神鑒之。百殃是降。子孫不育。社稷無守。禋祀磨滅。罔有遺餘。故作金書鐵券。藏之宗廟。子孫萬代。無敢違犯。神之聽之。是享是福。

哀祭類

誓文

爲會稽內史稱疾去郡於父墓前自誓文

王羲之

維永和十一年三月癸卯朔九日辛亥。小子羲之。敢告二尊之靈。羲之不天。夙遭閔凶。不蒙過庭之訓。母兄鞠育。得漸庶幾。遂因人乏。蒙國寵榮。進無忠孝之節。退違推賢之義。每仰詠老氏周任之誠。常恐斯亡。無日將憂及宗祀。豈在微身而已。是用寤寐永歎。若墜深谷。止足之分。定之于今日。謹以今月吉辰。肆筵設席。稽顙歸誠。告誓先靈。自今之後。敢渝變此心。貪冒苟進。是有無尊之心。而不子也。子而不子。天地所不覆載也。名教所不得容也。信誓之誠。有如皦日。

爲建安王誓衆詞

陳子昂

諸總管部將旗長隊正各聽命。夫聖人用兵。以伐有罪。奸慝竊命。戎夷不襲。則必肆諸市朝。大戮原野。我皇周子毓萬國。寵綏百蠻。遐荒戎狄。莫不率職。聚兵帥衆。非欲勞人。蓋逆不可縱。亂不可長。所以屈已推轂。垂涕泣辜。誠恐蒼生顛墜塗炭。今契丹凶羯。敢亂天常。爲封豕長蛇。薦食上國。玉帛皮幣。棄而不貢。名器正朔。僭而有謀。乃將紿神虐人。暴殄天物。故皇帝命我肅將王誅。今大師已集。方將問罪。公等諸將及士卒已上。須各嚴職事。肅恭天命。契丹凶賊。本爲中國奴隸。昏狂不道。勞我師徒。今與公等及士卒久勤干戈。冒犯霜露。夫四郊多壘。士大夫之恥。蕞爾狡兇。一鈕可屠。况皇帝義兵。尅期誅翦。此猶泰山壓卵。鴻毛在爐。今日之伐。須如雷霆之震。虎豹之擊。搴旗斬馘。掃孽除凶。上以摠至尊之憤。下以息邊人之患。鼓

以作氣。旗以應機。公等各宜戮力。務當其任。若能奮不顧命。陷堅摧鋒。金紫玉帛。國有重賞。若進退留顧。向背失機。斧鉞嚴誅。軍有大戮。各宜勉勵。無犯典刑。

哀祭類

青詞

下元金籙道場青詞 張元晏

維乾寧二年歲次丙辰十月戊申朔十二日己未。嗣皇帝臣稽首太上聖祖大道金闕元元天皇大帝。伏以強名曰道。迴出氤氳之表。惟天爲大。是生恍惚之中。融和氣以陶蒸。藹真風而煦育。況黃庭碧落。集列聖之威儀。絳闕丹臺。聚羣仙之步武。爰起祈恩之路。實開請福之門。敢用真誠。陳於下會。今雖物無疵癘。年獲豐登。遠人不倦於梯航。絕塞靡虞於烽燧。而鯨鯢作慝。蛇豕爲妖。塗炭黎元。黷亂紀律。宮朝載罹於焚毀。簪裾仍迫於羈離。敢不寤寐思憊。曉夕引咎。於是廣延真侶。重叩元關。幣帛交陳。香燈備設。伏願堅覆露之德。暢亨毒之恩。使氛祲盡消。萬彙咸泰。復安宗社。大定寰區。及臣眇身。同霑宏造。謹詞。

河南府平陽洞河陽濟瀆北海水府投送龍簡青詞 歐陽修

伏以九區至廣。萬物類居。惟川嶽之宅靈。繫真仙而總治。載稽道祕。實有舊章。粲然玉簡之清文。蜿若金鱗之瑞質。茲爲鎮信。輔以精誠。伏冀冲鑒昭臨。純祺錫羨。保邦家之永固。均動植以蒙休。

哀祭類

附錄

漢交趾都尉胡夫人黃氏神誥 蔡 邕

夫人江陵黃氏之季女。字曰列羸。其先出自伯翳。別封于黃。以國氏焉。高祖父汝南太守。曾祖父延城大尹。祖父番禺令。父以主簿嘗證太守事。奉明君以立臣節。漢南之士。以爲美談。初都尉君娶于故尉州刺史。卽黃君之姊。生太傅安樂侯廣。及卷令康而卒。繼室以夫人。生童紀。未齠而夭。夫人懷聖善之姿。韜慈母之仁。撫育二孤。導以義方。思齊先姑。神罔時恫。故能迄用有成。誕膺繁祉。廣歷五卿。七公再封之祿。康亦由孝廉宰牧二城。九鼎之義。夫人是享。爰暨稚孫。更仕三宮。或典百里。或作虎臣。銀艾貂蟬。進侍顯尊。受茲介福。于我夫人。自都尉仕于京師。及廣兄弟。式敍漢朝。夫人居京師六十有餘載。其乘輅執贄。朝皇。后。採柔桑于蠶宮。手三盆于繭館者。蓋三十年。上有帝室寵光之休。下有堂宇斤斤之祚。心耽其榮。體安其遠。圖長慮迥。用遺舊居。欲留此焉。康寧之時。亟以爲言。太夫人年九十一。建寧二年。薨于太傅府。是月辛酉。公之季子陳留太守碩。卒于洛陽左池里舍。公銜哀悼。祇慎其屬。遵奉遺意。不敢失墜。乃俾元孫顯。咨度羣儒。以考其衷。僉曰。昔帝舜沒于蒼梧。殯于虞郊。二妃薨于江湘。不卽兆于九疑。延陵季子。實惟吳人。長子道終。卜葬羸博。夫遭時而制。不遠遷徙。魂氣所之。不繫邱壠。帝舜以之。神罔時怨。季札以之。仲尼嘉焉。鑒帝籍之高論。綜精靈之幽情。稽先人之遐迹。順母氏之所寧。茲事體通而義同。允不可替。于是公乃爲辭。昭告先考。然後卜定宅兆。龜筮悉從。遂營窀穸之事。舉封樹之禮。十月旣望。粵翌日己酉。葬我夫人黃氏及陳留太守碩于此。高原雒陽東界關亭之阿。天子使中常侍謁者李納弔。且送葬。持賻錢二十萬。布二百疋。再以中牢祠。羣后畢會。榮哀孔備。于時濟陽故吏舊民中常侍句陽于肅等二十三人。思應

慕化推本議銘著斯碑石俾諸昆裔瞻仰以知禮之用是爲神誥乃申頌曰

於穆夫人家邦之媛昔在嬴代黃國氏建至于近祖亦降于漢天祚明德福祿流行旣作母儀履信思順登壽耄耄用永蕃變子孫以仁追稽先典厝茲洛濱齊跡湘靈配名古人休矣耀光千億斯年

訟風伯 韓愈

維茲之旱兮其誰之由我知其端兮風伯是尤山升雲兮澤上氣雷鞭車兮電搖幟雨澹澹兮將欲墜風伯怒兮雲不得止陽烏之仁兮念此下民闕其光兮不鬪其神嗟風伯兮其將謂何我於爾兮豈有其他求其時兮修祀事羊甚肥兮酒甚旨食足飽兮飲足醉風伯之怒兮誰使雲屏屏兮吹使醜之氣將交兮吹使離之鑠之使氣不得化寒之使雲不得施嗟爾風伯欲逃其罪其又何辭上天孔明兮有紀有綱今我上訟兮其罪誰當天誅加兮不可悔風伯雖死兮人誰爾傷

觀音懺文 司空圖

伏以聖感至誠祥符吉夢久期瞻仰輒用莊嚴上以報罔極之恩下以遂平生之願亦冀仁滋庶類福必旁臻且自叨竊一名曉夕三省慮增隱匿有負深知以此歸心誠無愧色必也行欺暗室業墮分陰飾偽沽名伏機稔惡於家則崎嶇自奉忍骨肉之饑寒於國則苟且求容啄生靈之膏血是乃神惟必照鬼得而誅敢將有覆之身曲累無私之照至若見持蹇分將觸禍機或不幸以逢尤或求全而受毀卽常希擁佑必保孤危況積疹初平殊恩有自置齋生日用表成功所期劫蓋微塵不竭依投之懇慶流末裔共成香火之緣粗寫丹誠仰迴元鑒

瘞旅文 王守仁

維正德四年秋月三日。有吏目云自京來者。不知其名字。攜一子一僕將之任。過龍場。投宿土苗家。予從籬落間望見之。陰雨昏黑。欲就問訊。北來事不果。明早遣人覘之。已行矣。薄午。有人自蜈蚣坡來。云一老人死坡下。傍兩人哭之哀。予曰。此必吏目死矣。傷哉。薄暮。復有人來云。坡下死者二人。傍一人坐哭。詢其狀。則其子又死矣。明日復有人來云。見坡下積尸三焉。則其僕又死矣。嗚呼傷哉。念其暴骨無主。將二童子持畚鍤往瘞之。二童子有難色然。予曰。噫。吾與爾猶彼也。二童閔然涕下。請往就其傍山麓爲三坎埋之。又以隻雞飯三盂。嗟吁涕洟而告之曰。嗚呼傷哉。繫何人。繫何人。吾龍場驛丞餘姚王守仁也。吾與爾皆中土之產。吾不知爾郡邑。爾烏乎來爲茲山之鬼乎。古者重去其鄉。遊宦不逾千里。吾以竄逐而來此。宜也。爾亦何辜乎。聞爾官吏目耳。俸不能五斗。爾率妻子躬耕可有也。胡爲乎以五斗而易爾七尺之軀。又不足而益以爾子與僕乎。嗚呼傷哉。爾誠戀茲五斗而來。則宜欣然就道。胡爲乎吾昨望見爾容蹙然。蓋不勝其憂者。夫衝冒霜露。扳援崖壁。行萬峯之頂。飢渴勞頓。筋骨疲憊。而又瘴癘侵其外。憂鬱攻其中。其能以無死乎。吾固知爾之必死。然不謂若是其速。又不謂爾子爾僕亦遽然奄忽也。皆爾自取。謂之何哉。吾念爾三骨之無依而來瘞耳。乃使吾有無窮之愴也。嗚呼傷哉。縱不爾瘞。幽崖之狐成羣。陰壑之虺如車輪。亦必能葬爾於腹。不致久暴爾。爾旣已無知。然吾何能爲心乎。自吾去父母鄉國而來此三年矣。歷瘴毒而苟能自全。以吾未嘗一日之戚戚也。今悲傷若此。是吾爲爾者重而自爲者輕也。吾不宜復爲爾悲矣。吾爲爾歌。爾聽之歌曰。連峯際天兮。飛鳥不通。遊子懷鄉兮。莫知西東。莫知西東兮。維天則同。異

101012432

域殊方兮環海之中。達觀隨遇兮莫必予宮。魂兮魂兮無悲以恫。又歌以慰之曰。與爾皆鄉土之離兮。蠻
之人言語不相知兮。性命不可期。吾苟死於茲兮。率爾子僕來從予兮。吾與爾遨以嬉兮。參紫彪而乘文
螭兮。登望故鄉而嘯唏兮。吾苟獲生歸兮。爾子爾僕尙爾隨兮。道傍之冢累累兮。多中土之流離兮。相與
呼嘯而徘徊兮。餐風飲露無爾飢兮。朝友麋鹿暮猿與栖兮。爾安爾居兮。無爲厲於茲墟兮。



編主五雲王

庫文有萬

種千一集一第

編簡鈔文今古樓芬涵

冊十二

編祺會吳

路山寶海上
館書印務商 者刷印兼行發

埠各及海上
館書印務商 所行發

版初月十年八十國民華中

究必印翻權著作有書此

The Complete Library
Edited by
Y. W. WONG

HAN FEN LAU KU CHIN WEN
CHAO CHIEN PIEN

By
WU TSENG CHI
THE COMMERCIAL PRESS, LTD.

Shanghai, China
1929

All Rights Reserved

國家圖書館



001671904



2
0

籍